

FAAITOITO RAA NO TE PO MATAHITI 1993
31 NO TITEMA

Taiòraa :Nehemia 8/ 10 (vahi hopeà)
Taramo 30.

Irava Tumu: Nehemia pene 8 irava 10 (vh hopeà)

“... o te òaòà rā no ô ia Iehova ra, o to òutou ia maitai...”.

To te huifaaroo nei, Ia ora na maitai i roto i te here rahi o to tātou Atua i to tātou fārerei raa nei, te âmui atoà nei i to tātou reo haamauruuru raa i to tātou Atua tei taitai mai ia tātou i te pae hopeà no teie nei matahiti 1993, no teie nei âruì hopeà 31 no titema. Mai te hoê taata tei paiuma i nià i te mouà teitei roa ae o teie nei ao e tei tapae i nià roa, te i nei to na âau i te òaòà no te mea ua tapae o ia i te hopeà e te fāriu nei to na mata i muri no te hiò i te êà ta na i haere mai, te mau fifi ta na i fārerei, te mau vāhi poopoo ta na i faaruru e tae noa atu i te mau vāhi âfaro, te mau taima toètoè e te ua, te mau taima veàveà atoà hoì, taua mau mea taatoà nei ua hope ia no te mea ua tāpae i te hopeà e i muri aè i te tahi maa taima faafaaearaa, te faaineine nei o ia no te pou i raro. O te hohoà atoà ia e nehenehe e faaauhia no tātou te huifaaroo nei, teie tātou ua tāpae i te hopeà, eere ānei i te mea òaòà. Te fāriu atoà nei to tātou mata i muri no te faaineineraa i to tātou tere i mua. Na vai e tauturu ia tātou i roto i te vaiihoraa i te mau mea i muri no taua tere i mua ra. Na roto i to tātou tiàraa taata faaroo, na te Parau mana ia a to tātou Atua e taua Parau ra tei maitihia no teie nei âruì o te reo ia no te perofeta Nehemia i te pene 8 irava 10 i te vāhi hopeà tei haapii mai e,

“ ... o te òaòà rā no ô ia Iehova ra, o to òutou ia maitai...”.

O Nehemia nei, tei riro ei hoê o te mau haavā i te tau no te Hau Peretia i roto i te area matahiti 450 hou te Metia. Na roto i to na tiàraa taata Ati-Iuda, ua peàpeà o ia i te faarooraa e ua parari roa te âua no te hiero no Ierutarema e tae noa atu hoì i te hiero iho. E no reira, ua ani o ia i te parau faatià i te Arii ra ia ARETEHASASETA (Artaxerxes I) no te Hau Peretia no te haere i Paretetina no te patu faahou i te mau âua tei parari. Ua itehia te parau no Nehemia na roto i to na faatià-faahou-raa i te âua o te

hiero moà no Ierutarema, e òhipa ta na i rave na roto i te fifi. E inaha, i muri aè i to na patu-faahou-raa i te âua no Ierutarema, e aha te tahi mau òhipa ta Nehemia i rave. Mai te hoê raatira pahī tei fārerei i te hoê vero rahi i tua, e i muri aè ra, te hiopoà nei o ia i to na pahī, te mau horopātete e te faaitoito nei ia rātou ia òre te manaò peàpeà e te òto.

Oia atoà o Nehemia. I muri aè i te paturaa i te âua, e nehenehe ia tātou ia parau te òhipa mātamura roa ta Nehemia i rave maori ra o te TAIORAA i te taata tei hoī mai, mai Papuronia mai. Ia au i te pene 7 i te Irava 66 tei nià i te faito 42.360 taata. Te piti o te òhipa ta Nehemia i rave maori ra o te TAIORAA TURE ia au i te pene 8 e inaha, ia hiòhia terā te tahi fifi rahi roa ta te mau tamarii Iteraera i fārerei. Ua vaiho rātou i te Parau na te Atua, te Puta Ture a te Atua e ua haere noa te taata i te vāhi ta na i hinaaro, ua rave i te òhipa ta na i hinaaro, aita e aveià faahou, ua tāverehia rātou e te òpape no teie nei ao. I te taimē rā i rave ai o Etera pāpai-parau i te puta-Ture ia au i te pene 8 irava 2 - 3 te taio-faahouraa i mua i te nūnaa, ua itehia te manaò peàpeà i roto i te taata, ua òto to rātou âau, ua tātarahapa i ta rātou mau hara, to rātou mau taivaraa i to rātou Atua e tae noa atu i te faaruèraa i te aveià.

E no reira, i mua i taua huru peàpeà e te òto o te taata, te tià nei o Nehemia no te faaitoito ia rātou ia au i te Irava 10 ta na i parau,

“... Eiaha e òto, te òaòà rā no ô ia Iehova ra, o to òutou ia maitai”.

E hoa here mā, te ite nei tātou i ô nei, na roto ia Nehemia, aita te Atua i hinaaro ia faaea te taata i roto i te peàpeà, i roto i te òto a riro atu ai ei taata paruparu, ei taata tei òtohe noa. Te òaòà ta Nehemia e parau nei, e ere ia i te òaòà no teie nei ao. Te parau ra hoī te apotetoro ra o Pauro i to Philipi,

“... E òaòà i te Fatu eiaha e faaea ...” (Philipi 4/ 4) e inaha ia hiòhia tei roto o ia i te àti. Ua parau atoà hoī Ietu i roto i te mau Peatiu,

**“A òaòà, e ia òuàua noa i te òaòà ...
i na reira hoī rātou i te hāmani ìno
i te mau perofeta ra, o mua ia ia òutou”.** (Mataio 5/ 12).

E no reira, e òaòà-raa taaê roa teie ta Nehemia e parau nei no ô mai ia Iehova ra. E aha rā hoì taua huru òaòà raa ra e parauhia nei.

A tahi, te òaòà-raa no ô mai ia Iehova ra o to te taata ia maitai, o to tātou ia maitai. Eere ānei hoi te ôpuaraa a te Atua no tātou te taata nei o te maitai ia. No taua maitai ra i tonono mai ai o ia i ta na Tamaiti, ia maitai tātou te taata nei. Teie rā, mea onono aè na te taata i te rave i te mau mea e ino ai o ia. Noa atu rā taua huru ra o te taata, aita te Atua i tauino aè i to na huru mai te tau e tae roa mai i teie nei āruì hopeà roa no teie matahiti.

A piti, te òaòà-raa no ô mai ia Iehova ra o to te taata ia puai, o to tātou ia puai. Ua faaite te Atua i to na huru puai i roto i ta na Tamaiti o ia tei àro i te tara riàrià no te pohe e tei Tiàfaahou mai mai te pohe. Ua riro taua òhipa ra oia hoì te parau no te pohe e te Tiafaahouraa o te Metia ei parau òaòà rahi no te huifaaroo taatoà. Te titauhia nei te mau teretetano atoà ia hoè i nià i te faaite raa i taua parau apī òaòà ra. I roto i ta na epitetore i to Torinetia, i faahiti na te apotetoro Pauro i te parau no te mau mero o te tino, e tuhaa òhipa anaè ta rātou. Aita e mero i te hiti e aore ia i rāpae mai i te tino. I parau atoà na hoì te tahi parau paari.

“... ta te tãhoè e faatupu o te pūai ia”.

E no reira, te Atua ta tātou e tiāturi nei e Atua puai ia, o to tātou ia òaòà raa.

A toru, te òaòà-raa no ô mai ia Iehova ra o to te taata ia haapūraa, o to tātou ia ùtuàfare vārua. Ua maìti te rururaa na te Hau Amui (O.N.U) i te matahiti 1994 ei matahiti no te ùtuafare. O ta tātou atoà ia tumu parau no te hepetoma pure no te matahiti i muri nei, te parau no te ùtuafare o te Atua. I mua i te hoè ao i roto i te āmahamaha, i mua i te hoè ùtuafare tei pararī, i teie mahana te titauhia nei te mau teretetano atoà ia ora i roto i te mau òhipa no te faaroo, ia ora i roto i te Parau na te Atua, ia òre te tiāturiraa e te faaroo ia morohi e ia pohe na roto i te mau fifi rau e tupu nei i roto i teie nei ao e i roto atoà i to tātou nei fenua. Ia ìte mau hia te hanahana o te Atua i roto i te mau ùtuafare tātai tahi. Ua faariro te mau tãvini no te Atua i roto i te pīpīria mai ia Tavita ra, i te Atua ei haapūraa no te mea o te Atua iho te Fatu, e vāhi hau te reira e o to tātou atoà ia òaòà raa.

E to te huifaaroo nei, i muri aè i te tere roa ta tātou i haere mai nei, e 365 mahana te maoro, i muri aè i te mau òhipa rarahi ta tātou i amo mai, e i muri aè atoà i ta tātou mau horoà no te òhipa na te Atua, eita e òre i teie nei ā âruì, te parau nei tātou, i muri aè i te faarooraa i ta tātou parau, e ua fārerei atoà tātou i te mau mea fifi mai tei fārereihia e te mau tamarii Iteraera tei turai ia rātou ia tauì te aveià e no te haere na roto noa i to rātou iho puai ma te tiāturi e e maitai rātou na roto ia rātou iho. Eita e òre vetahi o to tātou mau ùtuafare tei taiva roa i te òhipa na te Atua no roto ānei i te tahi mau peàpeà, te tahi mau fifi.

I te taima a ìte ai te mau tamarii Iteraera i to rātou hape i te faaruèraa i te Atua, ua tatarahapa rātou, ua hiòhiò faahou ia rātou e ua faahohonu faahou i to rātou faaroo e to rātou tiaturiraa i te Atua i te mea hoì ua piri roa rātou i te pohe. I mua i taua huru ra, ua faahiti te papaì Taramo 30,

“... ua faahoì mai òe ia ù e Iehova mai hāte mai e ua faaora òe ia ù ia òre au ia tae i raro i te āpoo ra”

(Taramo30/3).

E te parau atoà ra hoì teie pāpai Taramo i te irava 12, i te na òraa e,

“E Iehova e haamaitai ā vau ia òe e amuri noa atu”.

O te titauraa atoà teie ia tātou i teie nei ā âruì hopeà. Mai te peu e ua tāpae tātou i te pae hopeà no teie nei matahiti, mea tià roa ia hiòhiò i to tātou mau taata i roto ānei i te pāroita nei, te mau āmuiraa, e hiòhiò atoà i te feia āpi e tae noa atu hoì i te mau tamarii, o vai mā tei mairi i roto i te tere tei haerehia mai. O te òhipa te reira ta Nehemia i rave i muri aè i te patu-faahouraa i te āua no te hiero e tae noa atu hoì i te faahohonuraa i te faaroo o te taata ia òre te taata ia faatea ia na i te Atua i roto i te mau taima fifi e te mau taima òaòà-raa. Ia na reira atoà tātou i teie nei Matahiti Apì i roto i teie nei ā tere, ia mau te aveià no to tātou tere e òre e taùeue no te mea o te Atua to tātou maitai, o te Atua to tātou pūai e o te Atua to tātou haapūraa.

Ei ôpaniraa, teie te reo no te apotetoro Pauro i to Ephesia,

“E tena na, ia itoito òutou i te Fatu e i to na ra pūai rahi”.

Ia ora na e ia maitai i te Matahiti Apì.

TAUIRA Marama
Orometua.

MATAHITI API

(Mahana maa O1 no Tenuare 1994)

Taiòraa : Roma 8, 31 - 39Aòraa : Roma 8, 31 v. h.***“... No tātou te Atua ra, e tià ia vai ia mârô mai?”***

E parau faaitoitōraa teie o ta te Apotetoro ra o Pauro e horoà nei i te Etāretia e vai ra i roto i te òire no Roma, i te fenua Itaria.

Teie to na reō i te mau taata faaroo e vai ra i roto i taua òire ra:

“... No tātou te Atua ra, e tià ia vai ia mârô mai?”

Teie nei parau i faahitihia e te Apotetoro ra e Pauro, te faaara nei ia ia tatou, eiaha i te hoê manaò feaa i roto i te tiātūriraa i te mau poroiraa a te Metia, i te hoê râ parau papū tei orahia e te Apotetoro i roto i to nā oraraa e i to nā mau tere poro-evāneria i terā fenua e i terā fenua.

Mai te peu e, na Pauro teie nei parau i faahiti, a tiātūri tātou e, e parau mau ta na e parau ra, e ère râ i te hoê parau tei matara mai mai roto mai i te hoê moemoeà. E no to nā hinaaro ia riro atoà te parau e tiātūrihia ra e ana ei parau mau atoà no te mau tane e te mau vahine, no te mau taeaè e te mau tuahine e ora ra i Roma, i pii ai o ia i ô nei i te na ôraa e : ***“... No tātou te Atua ra, e tià ia vai ia mârô mai?”***

E parau mau roa. Ua tae mai te parau apī ia Pauro ra o tei faaara mai ia na i te huru e i te fifi no te oraraa e fārereihia ra e te mau taataa faaroo e ora ra i raro aè i te faatereraa a te emepera no te Hau Roma ra o Nero, o te hamani-ino e o te taparahi pohe

roa i muri aè i te mau taata faaroo i ore i tuàti i ta nā huru faatereraa !

I mua i te mau fifi e fārereihia ra e te Etāretia i Roma, te papaì nei o Pauro i teie nei rata ia ratou no te faaitoito i to ratou tiàturiraa ia ore ia paruparu, no te faahaamanaò ia rātou e, te mau fifi no te oraraa, te mau ati e te mau tamataraa no te oraraa, aita te reira i faataaēhia i te feia tei hinaaro e tei here atoà i te Atua.

Tei roto ratou i teie nei ao oia hoi i te hoē vahi tei reira te oaoa, e parau mau, i te hoē atoà ra vahi tei reira te àti ; i te hoē vahi tei reira te manuia, e parau mau, i te hoē atoà râ vahi tei reira te manuia-ore ... Aita ratou i rapae i teie nei ao, tei roto râ i teie nei ao e tei roto hoi i te oire no Roma, i te hoē vahi tei reira te maitai e te ino atoà.

Teie râ, i roto i taua mau fifi no te oraraa e fārereihia ra e ratou, i roto i te mau tamataraa no te tāviniraa e orahia ra e ratou, tei reira atoà te Fatu no te aro e ratou atoà, no te tauturu e no te tatara ia ratou i rapae i taua mau fifi ra, mai te peu e, o to na ia hinaaro.

E ta Pauro e titau nei ia ratou maori râ ia tiàturi mai ia ratou i ta na parau, e aore ia, ia tiàturi i te mau poroìraa a te Fatu e, “e parahi o ia i pihai iho i to na ra mau taata i te mau mahana atoà e tae noa atu i te hopeà o teie nei ao”.

No to Pauro iteraa i te manaò feaa e vai ra i roto i te aau o te mau taeae e te mau tuahine i Roma, i manaò ai o ia i te papaì roa i teie nei rata ei faahaamanaoraa ia ratou e, aita e mea e e mana atoà e vai ra i raro aè i teie nei raì o te faataaē ia ratou i te aroha o ta te Metua i heheu mai i to te ao nei na roto i ta na Tamaiti otahi ia Ietu-Metia i te anotau o to na noho-tino-roa-raa mai i te ao nei.

Eaha ta teie nei parau e haapapû nei i te feia e tiàturi ra i te Atua i Roma ? Teie ïa : ua hau aè te puai no te aroha o te Atua i

te taata o ta na i hamani i te puai no te mau mana haamou atoà e vai ra i roto i te òire no Roma. Ua hau aè te puai no te here o te Atua i te taata i te puai no te mana o te pohe e vai ra i roto i teie nei ao.

Ua parau Ietu i te are o te moana e faatomo ra i te poti o te mau pipi i nià i te roto no Tarirea e, “a mania !” Ua mania te miti. Ua faaue Ietu i te matai e faataupupu râ i te tere o te mau pipi na nià i te poti i nià i te roto no Tiperia, “A faaea !” Ua faaea te matai . Ua faatià faahou te Metua i te raï i ta na Tamaiti mai te pohe mai e ua tià faahou mai Ietu e te ora nei i teie mahana i te pae atau i te terono o te Metua ei arai no tātou.

Ua tamâ Ietu i te feia i maihia i te mai repera e o tei faataaêhia i to rātou mau utuâfare, i te nunaa, e ua mâ ratou i to ratou mai, i parau ai te taata e, “Aita ia huru ohipa i tupu aè nei i ô tātou nei, e perofeta rahi tei itea i ô tātou nei !”

Ua ite Pauro i te auraa no te parau o ta na e parau ra i to Roma. E parau mau o tei orahia e ana, o tei itehia e ana e o tei faaitoito ia na ia tāvini i te Atua mai te manaò papû e te àueue-ore, inaha hoi, ua hau aè te puai no te aroha o te Atua i te pohe, i te mai, i te àti e i te mau mana iino atoà e vai ra i te ao nei.

I parau ai o ia e : “... *No tātou te Atua ra, e tià ia vai ia mârô mai?*”

Ua mairi aè nei te matahiti 1993 i muri ia tātou e te mau ohipa atoà i tupu na i roto i taua matahiti ra. I teie mahana, te tià nei tātou i te omuaraa no te hoê matahiti apî.

Eita e ore e, ua oaoa tātou i te matahiti i mairi i muri ia tātou no te mea ua tupu te mau opuaraa i hinaarohia e tātou no te ohipa a te Atua e aore ia no to tātou oraraa ùtuafare e o ta tātou e tiâturi nei e, e riro â teie nei matahiti o ta tātou e haere atu nei mai te huru o te matahiti i haerehia mai e tātou. Ia haamaitaihia ia te Atua no te reira e tià ai.

Eita atoà râ e ore tātou i te manaònaò i te huru no teie matahiti apî o ta tātou e haere atu nei i te mea e, aita te matahiti i mairi aè nei i pahono i ta tātou mau tiairaa e aita atoà hoi i horoà noa mai ia tatou i te maitai anaè, ua horoà atoà mai râ i te peàpeà !

Te parau nei râ te Fatu ia tātou tatai-tahi : “Noa atu te huru o te mau ohipa e tupu mai i nià i to oe eà i teie matahiti o ta oe e hiò nei, e parahi mai au i pihai iho ia oe no te tiai ia oe, no te faaitoito ia oe e no te apee ia oe. A tiàturi mai oe i ta ù parau mai to ù ra tavini ia Pauro i tiàturi i to na ra anotau.”

E peu na tātou i te pae hopeà e aore ia i te omuaraa o te hoè matahiti i te faatae i te hoè mau poroi faatau-aroha i te feia i herehia e tātou ia maitai, ia manuia e ia oaoa ratou i roto i te matahiti apî e fâ maira i mua ia ratou.

Taua mau poroi faatau-aroha ra, ei faaiteraa ia na tātou i to tātou here ia ratou.

I teie mahana matamua no teie matahiti apî 1994 o ta tātou e tià nei, teie te poroi faatau-aroha o ta te Atua e faatae mai nei ia tātou, ia tià ia tātou ia haere na roto i te roaraa o teie matahiti ma te taià-ore e ma te tiàturi i teie nei parau na te Apotetoro ra o Pauro: “ *... No tātou te Atua ra, e tià ia vai ia mârô mai ?*”

Ia haamaitai mai te Atua ia outou paatoà !

Ia ora na i teie Matahiti Apî.

Jacques IHORAI
Orometua



VEA OROMETUA

Episetole papaihia ei faaitoitoraa
e ei taamura a i te mau tavini o te Atua
tonohia e te Ekalesia

N° 41
1994

Papeete, i te 21 no Mati 1994.

REÇU LE
29 AVR. 2002

I te mau taeae orometua,

Ia ora na i te aroha o te Atua.

Terâ mai ta tatou veà-orometua ei tautururaa ia tatou i te mau
taime no te mau oroà tumu i muri nei:

1) Hepetoma-moà :

- Amaa (oroà euhari) : Tapati 27 no Mati 1994
- Monire 28 no mati
- Mahana piti 29 no mati
- Mahana toru 30 no mati
- Mahana maa 2 no eperera

- Pâta (oroà euhari) : Tapati 3 no eperera 1994

- 2) Revaraa (oroà euhari) : Mahana maha 12 no Mè 1994

- 3) Penetetote (oroà euhari) : Tapati 22 no Mè 1994

I roto i te Hepetoma-Moà, ia haapao-maite-hia ia te parau
no te pureraa i te mau ahiahi no te mau mahana atoà o taua
hepetoma ra mai te monire e tae atu i te mahana maa, a taa atu ai
te parau no te pureraa no te faraire-moà (haapaeraa-maa) o te
haamata mai te hora 8 i te poipoi e o te faaoti i te hora 2 i te
avatea (eiaha râ na mua aè i te hora piti).

No te faraire-moà (haapaeraa-maa), ua oti mai ia ta tatou
puta papa-haamori apî, o ta tatou e faaohipa mai teie atu matahiti


Eiaha ia outou e faaohipa faahou i te puta no te mau
matahiti i mairi aè nei ! E rave râ i te puta apî. Mauruuru.

(Ua ara te mau peretiteni-Tuhaa atoà i teie parau e te tiàturi nei au e, na roto i ta ratou faaararaa atoà ia outou, ua hope paatoà ia outou i teie nei i te poroi mai i te faito puta e au no tā outou mau paroita tatai-tahi).

Na roto i teie nei veà-orometua, te hinaaro nei au, na nià i to tatou ioà, e haamauruuru maitai i te mau taeà orometua o tei faaineine mai â na tatou i te hoê mau hohoà aoraa te au no te Hepetoma-Moà, no te Revaraa e no te Penetetote.

Ia itoito i te faatereraa i te haapiiraa i roto i ta tatou mau paroita e tae noa atu i ta tatou oroà faatupuraa parau (Mê) no teie matahiti ei tautururaa i te Etaretia i roto i ta na faaiteraa.

Ia oaoa i te taviniraa !

Te peretiteni,

Jacques IHORAI

Faaitoitoraa no te Tapati no te mau amaa

Taiòraa: Ioane ev 12/ 12-16

Irava faaitoitoraa: (13): "Ua rave ae ra rātou i te âmaa tamara haere atura e farerei ia na, e ua pii atura: Hotana. Ia ora na te Arii o Iteraera o tei haere mai ma te iôa o te Fatu."

E te mau taeae e te mau tuahine i te faaroo
Ia ora na i te Aroha o te Atua i to tatou farereiraa i teie Tapati no te mau âmaa. I teie mahana tātou e iriti ai i te parau no te hepetoma moà no teie matahiti. I teie mahana atoà tātou e haamata ai i te âpee i to tātou Fatu i roto i te mau âti rau o tana i faaruru.

Te na ô ra ta tātou irava: "Ua rave ae ra rātou i te âmaa tamara haere atura e farerei ia na, e ua pii atura: Hotana. Ia ora na te Arii o Iteraera o tei haere mai ma te iôa o te Fatu"

No to letu tomoraa i Ierutarema, ua îte te tahi mau taata i te reira. Ua hinaaro teie mau taata e ia rave hia te tahi fariiraa taaé no letu. Te ôhipa i tupu "ua rave ae ra rātou i te âmaa tamara e haere atura e farerei ia na". E peu teie tei rave hia no te fariiraa i te tahi taata tiaraa teitei mai te arii ra. Te auraa, te faaite noa ra te mau taata no Ierutarema na roto i te peu o ta rātou e rave ra e te farii ra rātou ia letu mai te hoê arii ra. I roto i ta rātou hiòraa, e taata faufaa roa o letu. Ia tuâti ihoa ia te huru fariiraa i niâ i te taata e farii hia ra. Te ôhipa ia ta te mau taata no Ierutarema i rave, ua faatano rātou i ta rātou fariiraa i niâ i te huru taata o ta rātou e farii ra. Mai te peu o letu e Arii ôia no Iteraera, e rave ia te fariiraa e au i te arii. Ia au i te huru faatiâraa a Ioane papai evaneria, eita tātou e hape i te parauraa èere teie fariiraa i te mea faaineine atea hia. I to rātou faarooraa âore ra iteraa e haere o letu i roto i to rātou òire, ua rave rātou i teie mau faanahoraa ta tātou i hiò mai. Eita e òre e peu mataro hia teie e te taata i te raveraa i te tahi ôhipa no te natura âore ra i te tahi ôhipa ê atu mai te reva tahirihihi no te fariiraa i te tahi taata tiaraa teitei. I to letu tomoraa i Ierutarema, ua rave te taata i te âmaa tamara no te fariiraa ia na. Aita anei i roto i te mau taata no Ierutarema te manaò e ia ò atoà mai te Natura i roto i te fariiraa i te tamaiti a te Atua.

Ua faaite te peu i ta na tuhaa i roto i te fariiraa. Na te reo pii e haapâpû roa i te mea ta te peu e faaite ra. Te na ô ra te reo pii o te mau taata no Ierutarema: "Hotana. Ia ora na te Arii o Iteraera o tei haere mai ma te iôa o te Fatu". Teie reo pii to teie mau taata no roto mai te tuhaa rahi i te Taramo 112 i te irava 26. Eita e òre e parau mau âau teie ia rātou. I roto i te mau papai evaneria, o Ioane anae tei faahiti i te parau no te Arii o Iteraera. Teie reo pii te faaite mai ra i to rātou ôaôa i te fariiraa ia letu i niâ i te tiaraa Arii no Iteraera. Ia hiò anae hia, e au ra aita hoê ae mea e haafifi ra âore ra e faaapiapi ra ia rātou i te raveraa i teie huru piiraa.

Te mea e ìte hia ra: e òaòà rahi to teie mau taata. Aita rātou i tuatapapa eita anei rātou e fifi i roto i te òhipa e rave ra. E aha te manaò o te mau aratai faaroo, to Herota e te tià no te Hau Roma i mua teie piiraa a te nunaa. Aita to rātou parau i faahiti hia i roto i ta tātou taiòraa. Eita ra e òre vetahi i te huru ê. Te vāhi faufaa ta tātou e ìte ra, to te nunaa ia faaiteraa i to na òaòà rahi i te fariiraa i te Fatu.

Teie atoà te parau ta tātou e tapeà mai no tātou i teie Tapati no te mau àmaa, teie òaòà rahi to te mau taata no Ierutarerna i te fariiraa i te Fatu. Ia òaòà atoà tātou i te fariiraa i te Faaoranui i nià i to tātou fenua. E rave tātou i te fariiraa ta te fenua i haapii ia tātou.

E tupai te pahu, e tairi te toère, e faaòto te pū. E himene te tarava, te tuki. E òri. E faahei ia na i te tiare māòhi. E farii ia na ma te reo pii o te àià: Manava, Maeva, Ia ora na. Haere mai , Haere mai...

Tehaapapa òrometua

HEPETOMA MOA 1994

MONIRE 28 NO MATI

- Taioraa : Ioane 18, 1-11

"To Ietu hoo-raa-hia e Iuta"

E parau maitai roa te parau no te hoa. I roto râ i ta tatou tumu parau, te faarirohia nei ia taua parau maitai roa ra ei parau fifi roa e Iuta.

Te hoohia nei Ietu e Iuta. Te haavare nei Iuta ia Ietu. Te totovahia nei Ietu i Natareta e Iuta Itatariota.

Te nounou taoà, te nounou-tiàraa atoa paha ... O te hoê ia nau tumu no teie huru tauraa i to Iuta.

Ua ore anei teie nei mau huru peu i roto i to tatou oraraa i teie mahana ?

Aita anei te taata e tamau noa nei â i te rave i te hoê mau ohipa itehia e te mata o tei huna râ i te mea mau e titauhia ra i muri mai e o te nehenehe hoi e riro ei ati no vêtahi ê ?

Aita anei "Iuta" e ora noa ra i teie nei â tau ?

E parau maitai roa te parau no te hoa. Te haapapû nei Ietu ia Iuta (e i te feia atoà i arataihia mai e ana e i te mau pipi iho) i te huru mau no te hoa.

Aita o ia e haere atu nei i mua i te aro o Iuta (e to na pupu taata) ma te mauhaa no te pohe i roto i te rima, ma te mauhia râ o ia e te parau a te Atua tei faatumuhia i nià i te parau no te ora.

To Ietu oreraa e rave i te mauhaa no te paruru ia na, e haapapūraa te reira ia tatou e, eita roa atu te puai no te mauhaa-tamai e riroraa na te Etaretia ei raveà no te faatupuraa i te hinaaro faaora o te Atua i nià i te fenua nei no te hoê oraraa hau e te parautià.

To na anaè tiàturi i te parau a te Atua (i te Atua, e tià hoi te mau mea atoà) te riro ei raveà no ta na faaiteraa evaneria.

Te hiàraa no te pupu o Iuta i raro i mua i te parau a Ietu "O vau" tei haapapū mai ia tatou i te puai no te parau a te Atua e te paruparu no te raveà o te mauhaa-tamai !

Aita anei hoi te reira parau e moèhia ra i te pupu-taata no Ietu i Natareta i roto i ta na faaiteraa i teie mahana ?

MAHANA PITI 29 NO MATI

- Taioraa : Ioane 18, 12-27

"To Ietu huna-raa-hia e Petero"

Hou aè to na haru-raa-hia e to na haava-raa-hia, i haaputuputu na Ietu i ta na mau pipi i Ierutarema no te hoè amuraa maa hopea, no te horoà ia ratou i te hoè mau poroiraa hopeà ei tautururaa ia ratou i roto i te parau no te tāviniraa.

I taua amuraa maa ra to na atoà horoiraa i te avae o ta na mau pipi o tei haamatahia atu e ana na nià i te avae o Petero.

Ei faahaamanaoraa taua ohipa ra ia ratou e, aita ratou i titauhia ia tavinihia no te tavini râ.

I pure atoà na Ietu i to na Metua ia nehenehe i ta na mau pipi ia parahi noa i roto i taua manao ra e ia ore ia faarue i te parau mau.

I roto i ta tatou tumu parau, te huna nei Petero i to na Fatu e te huna atoà nei i te parau mau !

Tei tuuhia e tatou i te vahi pouri, e tae mai ia i te vahi maramarama i te taima e i te hora manao-ore-hia e tatou : i aaoa ai te moa. Tei hunahia e Petero i te vahi pouri, ua tuuhia mai ia e te moa i te vahi maramarama.

I te taima te faaite ra Ietu i te parau mau i mua i te aro o to na mau haava, te huna nei ia o Petero i te parau mau i mua i te aro o te potii tia i uputa.

Ua moèhia ia Petero e, te eà o te taviniraa, e ere ia i te eà aano, e eà pirihaora râ. E eà tei reira te oaoa, e eà atoara râ tei reira te ati. "O tei tapeà râ e tae noa atu i te hopea, e noaa ia ia na te torona ora".

Ua itehia te papû o te tiaturiraa o te hoè mau taata faaroo i roto i te mau taima fifi o te oraraa o ta ratou i fārerei i te mau tau i mairi (e i teie â mahana). Aita ratou i huna i to ratou faaroo e i to ratou tiàraa pipi na Ietu.

Ua mau papû ratou i tei noaa ia ratou e tae noa atura i te pohe !

Ua ite-atoà-hia râ tei huna i to ratou faaroo no to ratou mataù i te mau haavîraa e i te pohe. No to ratou nounou i te ora. "Tei to tatou râ hoi horoàraa i to tatou ora, e noaa mai ai te ora, e tei te tapearaa mai tatou i te ora, e ere mau ai tatou i te ora".

I muri aè i terâ parau i ta Petero ia Ietu e, "E horoà vau i to ù ora no oe", te tau nei te parau a Petero e, "Aita vau i ite e, o vai tena taata" oia hòi "Eita vau e horoàraa i to u ora no tena taata !"

Aita anei tatou i teie mahana i tau atoà i ta tatou faîraa faaroo, mai ia Petero te huru, no to tatou anei haamâ o te faainohia tatou e aore ia no to tatou anei taiâ o te haafifihia tatou i roto i to tatou oraraa e i ta tatou mau vahi raveraa ohipa ?

MAHANA TORU 30 NO MATI

- Taioraa : Ioane 18, 28-40

"To Ietu haava-raa-hia e Pirato"

To Ietu haava-raa-hia e te mau faatere no te faaroo ati-luta e te tià no te Hau Roma ra o Pirato, e mau tapao anaè ia, e parau mau, o tei faaite mai ia tatou i te farii-ore o te feia faatere i te oraraa faaroo e i te oraraa poritita o te nunaa i te parau mau, i to te Ture atoa râ riroraa eiaha no te taatoàraa no te tahi noa râ pae.

Terâ faahoihoi-noa-raa e te turairai-noa-raa ia Ietu i mua i te haavaraa a terâ tià mana o te nunaa, e a terâ tià mana o te nunaa, e mau tapao anaè ia o tei faaite atoà mai ia tatou i te tià o Ietu i mua i te mau ohipa i ravehia e ana i roto i to na oraraa e te ati rahi o te hoê nunaa ia arataihia e te hoê mau faatere tei ore i ite i te faatura i te tiàraa o te taata e o tei faariro i te Ture ei mauhaa eiaha no te tauturu i te taata i roto i to na oraraa, no te faateiaha râ ia na ...

I roto i teie nei ao, te tupu noa nei â ia mau huru haavâraa ... Te feia e ore nei e tapiri i to ratou vaha i mua i te mau ohipa tià-ore e tupu nei i roto i to ratou fenua, te haruhia nei ia e te hurihia nei i roto i te fare tapearaa. E no te mea, aita ratou e farii nei i te mau peu petaraa, te haavîhia nei ratou, te hamani-ino-hia ra e te taparahi-pohe-roa-hia ra i te tahi taima.

E rave rahi ratou tei pohe no to ratou aroraa ia tupu te parautià e no to ratou hoi here i to ratou nunaa ... **"No ratou râ te patireira o te Atua oia hoi no te feià i hamani-ino-hia no te parautià"**.

Aita anei te reira mau huru ohipa e tupu atoa ra i ô tatou iho nei i teie mahana ? Mai te mea e, aita te reira mau huru faanahoraa e tupu ra i ô tatou nei, e ere anei ia no te mea ua mamû noa tatou i mua i te tupuraa o te hoê mau ohipa tià-ore ?

I mua ia Pirato, aita Ietu i huna i te parau mau. Aita ta na parau i tau. E hau arii to na, eiaha râ mai to teie nei ao o te tihepu i te taata na roto i te mau raveà haaví e te faahepo, na roto râ i te vaihoraa i te tiàmâraa i te taata tatai-tahi no te farii e aore ia no te patoi i te titauroa ora a te Atua.

I mua ia Ietu, aita Pirato i faaite mai i te huru no te hoê faatere fenua tei here e tei manaonao i te parau o te nunaa, ua faaite mai râ o ia i te hohoà no te hoê aratai o tei manaõnaõ i to na iho tiàraa, o ta to na horoiraa i to na rima i haapapû mai ia tatou, o te nehenehe ia maramaramahia mai teie i muri nei : "Te tano e aore ia te tano-ore o te hoê taata, eaha te vahi taaê ? E ere te reira i te ohipa na ù ! O vau ia maitai, o taù ia i ite !"

O te reira hoi te parau mau : **o te oreraa e farii i te parau haavare !** O ta Ietu i aro i roto i to na oraraa e o tei riro ei tumu no te inoinoraa o te feia e haava ra ia na ... o te taparahi pohe roa ia na i muri aè !

Aita anei e feia e haavahia ra e e faautua-atoà-hia ra i ô tatou nei, i teie mahana, ma te parautià-ore ? Eaha ta tatou i rave no ratou, no te parururaa ia ratou ?

Aita anei e mau "Pirato" e vai atoà ra i ô tatou nei i teie mahana ?

Eaha tei ravehia e tatou i mua ia ratou no te faaiteraa i te parau mau ia haamanao ratou i te auroa mau o to ratou tiàraa e o ta ratou hopoià ?

MAHANA MAA 2 NO EPERERA

- Taioraa : Ioane 19, 31-42

**"To Ietu poheraa e to na tuu-raa-hia
i raro i te menema"**

Ua pohe Ietu i te pohe hara-ore i te hora mau e, i roto i te mau utuafare ati-Iuta atoa i Ierutarema, te taparahi-atoà-hia ra te arenio no te oroà o te pata ei haamanaoraa i te rui i faaorahia ai te mau tamarii a Iteraera i te riri parautià o te Atua tei iri tià i nià i te nunaa no te fenua Aifiti.

Ua pohe Ietu i te pohe hara-ore no te faatiàmâ râ e no te aratai i te ati-Iuta, i te ati-Roma, i te ati-Hereni e i te mau nunaa atoà o te ao nei mai roto mai i te "Aifiti tahito no te títiraa e no te pohe" i roto i te "Tanaana apî no te tiamâraa e no te ora-mure-ore".

Mai nià mai i te tatauro, ua hopoihia atu te tino o Ietu i raro i te hoê menema e vai ra i pihai iho i taua vahi ra i faatataurohia ai o ia.

Ei haapapûraa te reira ia tatou i te huru taata no Ietu o te pohe nei mai te mau taata atoà e pohe ra.

E tona tuu-raa-hia i raro i te menema, ei haapapûraa ia ia tatou e, ua pohe mau Ietu, ia au i te faïraa faaroo e faïhia nei e tatou i te mau tapati atoà.

To na tino tei tae i roto i te ô, te faahaamanoa ra ia ia tatou i te haamataraa no te mau mea atoa, i te vahi no reira mai te taata matamua i te iriti-raa-hia e o tei tiàvaruhia i rapae i muri aè i to na hararaa e o tei pohe i rapae i te ô no taua tumu ra.

I teie mahana, e nehenehe ia parauhia e, te hoi nei te "Atamu apî" i te vahi no reira mai te rave-raa-hia te Atamu matamua.

I teie mahana, e tià ia parauhia e, na roto i to Ietu vehi-raa-hia i te ahua a tuuhia atu ai i raro i te menema, i roto i taua ô ra, ua monohia te rau tute, tapao no te haamâ o te hara i ravehia e te Atamu matamua e te haamâ-ore no te ohipa parautià i ravehia e te Tamaiti fanau tahi a te Atua.

I pohe na te Atamu matamua ma te rau tute atoà i te poheraa, areà te Atamu apî, e tià mai ia i nià ma te haapae atu i taua ahū vehi ra.

O ta Ietu ia i faaara maite atu i ta na mau pipi i te mau taimē rii hopeà o to na oraraa e o ta na atoà e titau nei ia tatou ia tiàturi : "Inaha, te haere nei tatou i Ierutarema ; e e tuuhia te Tamaiti a te taata nei i te mau tahuà rarahi, e te mau papai parau, e e faahapa mai ratou ia na ia pohe, e e pūpū atu hoi ia na i te Etene ra : e tãhitohito mai ratou ia na, e e papai mai, e tufa mai hoi i te huare i nià ia na, e e taparahi pohe roa mai hoi ; e tià faahou mairã o ia ia tae i te rui toru".

TAPATI TIAFAAHOURAA

(3 no eperera 1994)

Taioraa : Mareto 16/ 1-8

... Ua tià ia oia i nià ... (Irava 6).

O te parau âpī òaòà ia o ta tatou e faaroo nei i teie poipoì, mai roto mai i te vaha o teie taata âpī e parahi nei i roto i te menema o Ietu Metia, to tatou Fatu. E parau âpī òaòà o ta na e parau nei i nià i na vahine tootoru, o Maria i Matatara, Maria te metua vahine o Iatopo, e o Tarome. Ratou tei tià i nià i te poipoì roa no teie mahana matamua o te hepetoma, tei hoo i te raau noànoà no te faatavai ia Ietu i roto i te menema, areà i te mau tãne ra, te mau pipi, tei roto ā ia i te piha, o ta ratou i matau i te haaputuputu, te tauà parau ra i nià i te mau òhipa atoà i tupu i taua hopeà hepetoma ra.

Te huru no teie mau vahine, te faaite maira ia ia tatou i to ratou here, e to ratou atoà pūpūraa ia ratou no te òhipa a te Fatu.

Teie rā, to ratou tiàturiraa i teie poipoì no te mahana matamua o te hepetoma, tei roto ia i te hoê Fatu e te hoê Metia tei pohe. I haere ai ratou i te menema e te raau noànoà no te faatavai ia na. Eita e òre, e ô atoà teie tiàturiraa i roto ia tatou, ahiri e, o tatou tei haere i te menema i taua poipoì ra, e ahiri atoà aita te mau Evaneria i faaite e ua tiàfaahou o Ietu Metia. Te tiàturiraa i te hoê Fatu e te hoê Metia pohe, eere ia tei roto noa i na vahine tootoru nei, nehenehe atoà ia parau e tei roto atoà ia tatou te mau Maru-Metia, tatou i ore i faatupu i te here e te aroha, tatou e māmū nei i mua i te mau fifi rau e farereihia nei e te nunaa Māòhi, te mau tamarii, te feiā âpī, te mau ùtuafare. Tatou e faaino nei i te rahu a te Tumu Nui, o ta na iho i parau e "Mea maitai" nehenehe ia parauhia e tei roto to tatou tiàturiraa i te hoê Fatu e te hoê Metia pohe.

Te haere nei teie na vahine too toru e hiò i te tino, no te Fatu tei herehia e ratou, i roto i te menema. E inaha, i mua i te parau a teie taata âpī e "ua tià ia òia i nià", "ua roohia ihora ratou e te rurutaina, e te maere e te mataù rahi" (Irava 8).

E hoa here mā,

te faaite mai nei o Mareto ia tatou, e na roto i te tiàfaahouraa o te Fatu, ua faufaa òre ia te mau ohipa atoà i faàineinehia e te mau vahine, e ua faufaa òre atoà hoì to ratou tapitapiraa i te parau no te ôfaì i te ùputa o te menema, i te mea e, te òhipa o te òre roa e maraa ia ratou i te rave, ua rave e hia na e te Atua. E te haamanaò atoà mai nei teie parau ia tatou e, e riro atoà ta tatou mau faaïneineraa rau e rave nei i roto i to tatou oraraa faaroo, e tae noa atu i to tatou mau tapitapiraa i te faufaa òre, mai te peu eita tatou e tiàturi e ua tiàfaahou o Ietu-Metia. E na roto i to na tiàfaahouraa, ua upootià oia i nià i te pohe, e ua hoo faahou mai o ia ia tatou.

Aita oia i pohe no na iho, ua pohe rā e ua tiàfaahou, no tatou, no te taata e rave rahi, e no to te ao.


No reira te taata tei tiàturi e ua pohe te Metia e ua tiàfaahou no na, nehenehe ia parauhia e tei nià oia i te eà no te ora, ia òre rā oia ia parahi noa i nià i te eà, ia haere rà e ia titau i te vāhi tipaeraa, te vāhi tei reira te ora, tei te Atua ra te ora. E no te tapae i reira, e mea titauhia òia ia ora e ia faatupu i te Hinaaro o te Atua.

No reira e hoa here mā, te ite ra tatou e, e tapura ohipa rahi teie i mua ia tatou, tatou tei tiàturi e ua tiàfaahou to tatou Fatu. E mea titauhia tatou ia faatupu i te Hinaaro o te Atua.

Ua ite e ua maramarama atoà tatou i te Hinaaro o te Atua. To na hinaaro ia here e ia aroha i te taata tupu, ia tauturu i te òtare e te ivi. Ia faaitoito e ia tamahanahana i te feià i roto i te mau iui, te àti, te toto, te peàpeà e te parahi ra hoì i roto i te moèmoè. Ia atuàtu e ia aupuru i te mau mea atoà o ta na i rahu, e te vai atura to na mau hinaaro ia tatou. No reira te ite ra tatou i te rahi no to na Hinaaro ia tatou e to te hui faaroo. No reira e hoa here mā, e mea tià ia tatou i mua i te rahi o te Hinaaro o te Tumu Nui, ia faaiti e ia faaiti roa i ta tatou mau faanahoraa e to tatou atoà mau hinaaro i roto i to tatou oraraa faaroo, ia nehenehe ia tatou ia pahono hope roa i te Hinaaro o te Atua. Ia ore rā tatou ia tāfifi noa i roto i ta tatou mau faanahoraa moèhia atu ai ia tatou te Hinaarao e te titauroa a te Atua ia tatou.

Ia ora na.

Teiva TAPU
orometua



EKALESIA EVANGELIA NO POLINESIA FARANI

Veà Orometua EPM

VEA OROMETUA

Episetole papaihia ei faaitoitoraa
e ei taamura a i te mau tavini o te Atua
tonohia e te Ekalesia

272

N° 42
1994

Papeete, i te 7 no Novema 1994

*I te mau tino orometua
i roto i na Tuhaa e 8,*

*Ia ora na i te aroha o te Atua i to tātou fārereiraa na
roto i teie nei veà-orometua.*

*E hoa here mâ e, terâ mai i roto ta tātou veà-orometua
te hoê mau hohoà poroiraa e e faaitoitoraa i faaineine-maite-hia
mai e te hoê mau taeae orometua o ta tātou e haamauruuru
maitai nei ei tautururaa ia outou i roto i te mau oroà hopeà e e
omuaraa matahiti :*

- Tiairaa 1 : Tāpati 27 no novema 1994
- Tiairaa 2 (Oroà) : Tāpati 04 no titema 1994
- Tiairaa 3 : Tāpati 11 no titema 1994
- Tiairaa 4 : Tāpati 18 no titema 1994
- Noera (Oroà) : Tāpati 25 no titema 1994
- Pô matahiti : Mahana maa 31 no titema 1994
- Matahiti Apî : Tāpati 01 no tenuare 1995

*Te faahaamano-faahou-hia atu nei outou e, te vai ra
ihoa ta tātou pureraa pô Noera i te pô mahana maa 24 no titema,
mai tei matarohia e tātou.*

*Ia haapaòhia ia taua pureraa ra i roto i te mau paroita
atoà e tià ai.*

*No ta tātou pureraa hepetoma no te hoêraa o te
Etāretia, e haamata o ia i te tāpati 1 no tenuare e e hope i te
tāpati 8 no tenuare 1995 i nià i te tumu parau : "Te amui-tahi-raa
i roto i te Atua e te amui-tahi-raa i rotopû ia tātou iho". (Ioane
15/ 1-17).*


E riro ia taua pureraa ra tei iriti i te parau no te pureraa hepetoma ei pureraa Matahiti Apì atoà no tātou.

E faatiàhia ihoa ia te Oroà a te Fatu i te taime no te iritiraa e no te opaniraa i ta tātou pureraa hepetoma.

Ta tātou ohipa tumu o te faaìteraa ia i te Evaneria e te ohiparaa no te maitai o te tino o te Metia. No reira, ia faataa maite tātou i to tātou taime e ia tātou iho no na e no te nunaa.

I te vahi tei reira to outou tāviniraa, ia riro atoà outou ei reo e ei tià no te Apooraa Rahi Amui o ta tātou Etāretia no te faatupu i te mau ohipa atoà e vai paari ai te tuatiraa e te hoêraa i rotopū ia tātou.

Ia faaihia â outou, i teie oroà Noera e te Matahiti Apì 1995, i te here e i te oaoa no nià mai i roto i te tau tāviniraa i faataahia na outou i roto i ta outou mau paroita ei hanahana no te Atua e a farii atoà mai outou i te poroi faatau-aroha o te Apooraa Faatere o ta tātou Etāretia.

Te peretiteni,
The image shows a circular official stamp with the text "PRÉSIDENT" in the center and "FEDÉRATION DES POLYNÉSIAIS" around the perimeter. A handwritten signature in black ink is written over the stamp.

Jacques THORAI Orometua

TIAIRAA I

(Tāpati 27 no novema 1994)

Ruta21/25-36

Irava 28 : *E nānā i to outou mata i niā, e faateitei i to outou upoo, te fatata maira hoi to outou ora.*

Irava 36 : *E tenā na, e ara outou, tamau maite ā i te pure...*

E hoa here mā,

Ia ora na tātou paatoà i teie tāpati matamua no teie tau no te tiairaa no te haereà mai no te Tamaiti a te Atua, o Ietu Metia, te Faaora o teie nei ao.

E toru tau tuhaa o ta tātou e farerei nei i roto i te taiòraa o ta tātou i faaroo aè nei i te taiòraahia i mua ia tātou.

* Namua roa, mai te irava 25 - 28 : te ite nei tātou i reira i te mau parau, te ohipa e e te mau tapaò taaè o te tupu i te haereà no te Tamaiti a te taata nei.

* Te piti no te tuhaa, mai te irava 29 - 33 : te ite ra tātou i reira i te parapore no te tumu tute e te mau raau atoà, ei hohoà e ei faaauraa na te Fatu i te huru no te haereà mai e te vaveraa mai no te Hau o te Atua.

* E te tuhaa hopeà i roto i ta tātou taiòraa, mai te irava 34-36, te ite ra tātou i reira i te titaauraa na te Fatu i tana mau pipi e te feià atoà i tiāturi ia na, ia ara, eiaha ia paruparu i mua i te mau ohipa atoà e tupu ra e o te riro ā i te tupu mai. Ia ara rā i mua i te reira e ia tamau maite ā i te pure.

Tei Ierutarema Ietu e tana mau pipi, e nehenehe ia parauhia e ua tae atoà oia i te mau taima rii hopeà no to na oraraa e no ta na ohiparaa i te ao nei. No reira, te hinaaro nei oia i teie nei e faaitoito i to na mau taeaè e tona mau hoa rave ohipa,

e e faaineine atoà ia ratou i mua i teie parau no to na taaêraa ia ratou. Ma te horoà atoà rā i te tiàturiraa i roto ia ratou e, e hoi mai ā oia.

E parau mau atoà rā aita teie na tumu parau (oia hoi to na taaêraa e to na hoïraa mai) i maramaramahia, aita i haapaòhia e aita atoà i fariihia e tana mau pipi i te taime a faaïte ai Ietu i te reira mau parau i mua ia ratou.

E nehenehe rā ia parauhia, e i muri aè i te tupuraa no te tahi mau parau ta te Fatu i faaïte ia ratou, oia hoi, i muri aè i to na mau mauïui, to na pohe i nià i te raau tarava, e i muri aè i to na tiàfaahouraa mai mai te pohe mai, na te reira i tūrama i te mau pipi i te iteraa e te farii atoà raa i te mau parau atoà o tei faaïtehia ia ratou e o ta tātou e ite nei i roto i ta tātou taiòraa te tahi tuhaa no taua mau parau.

Oia mau, eere i te mea ohie ia farii i te tahi mau parau mai teie te huru o ta tātou e farerei nei i roto i ta tātou taiòraa, i nià i te mau ohipa o te riro i te tupu e te mau tapaò taaê, tapaò peàpeà e te riàrià atoà o te itehia e o te faaïte mai i te huru no te hoïraa mai no te Tamaiti a te taata nei e no te tupuraa no te Hau o te Atua. E piri te itehia i roto i te mahana, te marama e te mau fetià. E parahi te mau fenua atoà o te ao nei i roto i te ati rahi e te ahoaho. E tarapape hoi te aāu o te taata i te mataù.

Teie rā, i mua i teie mau òhipa atoà o te tupu, te horoà ra Ietu i te faaitoitoraa i roto i tana mau pipi, e te titau nei ia ratou ia nānā i te mata i nià, ia faateitei i te upoo, no te mea, o te mau tapaò te reira e te haere maira, te fatata maira e inaha teie mai nei te ora. Oia hoi, te hinaaro nei te Fatu e aratai i ta na mau pipi i te iteraa i te mea e vaira i ō mai i teie mau tapaò taaê, i ō mai i te mau ati o te tupu, ia ore ratou ia paruparu e ia hià i mua i te reira, ua riro rā teie mau mea atoà ei tapaò tei faaïte ia ratou e te haere mai nei te ora. Ei reira ratou, e tae noa atu i te feiā atoà tei tiàturi i Ta na Parau, e riro ai ei mau ite matamua roa no te haapāpūraa a te Fatu, oia hoi, no te tupuraa e te haamataraa no te faaoraraa e te faatiamāraa i te mau taata atoà. E ia au i te

oteoraa no te tute e te mau raau atoà tei faaite mai e, ua fatata roa te tau no te auhune i reira, mai te reira atoà te tupuraa no teie mau tapaò, o te faaite mai e, ua fatata roa, e inaha, te haere mai nei te Faaora.

E a taa noa atu ai teie mau tapaò e teie mau ohipa taaê ta te Fatu e titau nei i ta na mau pipi ia ara e ia ore ia paruparu i mua i te reira, te faahoi mai nei letu i ta na mau pipi e ia tatou atoà, i roto i te oraraa no te mau mahana tataitàahi e te mau ohipa atoà e tupu ra o ta te taata e horoà ra i to na tiàturiraa, e o te riro i te faaturori, te faataupūpū e te faateimahana ia ratou. Mai te parau no te maa, no te ava, te faufaa e te mau manaò rau atoà o teie nei ao, o te riro ei here pata e ei marei no te taata faaroo o te aratai ia na i roto i te ati e o te riro i te faatea ia na i te Fatu. E i mua i te reira mau fifi, aita atu e mauhaa ta te Fatu e horoà nei, oia te araraa, e te parahi tamauraa i roto i te pure, ia noaa i te mau pipi e ite mau taata o tei tiàturi i te Fatu, te puai e te itoito i te faateararaa ia ratou i teie mau mea e te haapae atoà raa hoi i te reira, a nehenehe atu ai ia ratou ia tià atu i mua i te Tamaiti a te taata nei ma te oaoa e te tiàmā.

No reira, no tatou e te hui faaroo i teie tapati matamua no te tiairaa, ia parahi tātou i roto i te araraa i nià i te mau ohipa atoà e tupu ra i roto i to tatou oraraa i te mau mahana tataitàahi. Ia parahi tāmāu tatou i roto i te pure no te mau fifi e tupu ra i roto i to tatou fenua e i roto i teie nei ao. No te mau àti atoà e tupu ra, te mau hamani inoraa e ravehia nei i nià i te taata e te mau mea ora atoà e vai nei.

Ia horoàhia mai te puai e te itoito ia tatou, ia nehenehe ia tatou ia ora i roto i te tiàituru no te hoìraa mai o te Fatu ma te hanahana.

Ia ora na.

Thierry TAPU
Orometua

TLAIRAA II

(Tāpati 4 no Titema 1994)

Taiòraa: Marati 3. 1-3 ; Ruta Ev. 3. 1-16.

Irava: Ruta Ev. 3. 3.

“ Haere atura oia na te mau vahi atoa i te pae i Ioritana ra i te poro haerea i te papetito tatarahapa ia faaorehia te hara.”

E hoa here mā,

E parau teie no te aito o te Metia, tei tonono hia ei veà no te faaàra i te taata atoà e te haere mai nei te Faaora o te ao. Ua papū maitai ia tātou i te huru no te parau no teie nei taata o Ioane Papetito e to na parau tei tohu atoà hia mai tahito mai a.

I roto i ta tātou nei nau pene parau no teie mahana te papu ra ia tātou e e mau ohipa rarahi teie e faaineine ra i te tupu. E ia faaroo tātou i te tairaa reo o te Marati 3.2, o tei na ô mai “E tià ra ia vai ra ia faaoromai ia tae i te mahana e haere mai ai oia ra ? e o vai te mau ia fa mai oia ra?”, e oioi noa tātou i te maramarama raa e eita teie ohipa ta Ioane Papetito e rave nei i te ohipa haùti. No reira atoà paha oia i parau atu ai i te tahi pae o te mau taata tei amui mai i teie parau “ E te mau fanauà ehitena, na vai outou i faaàra e e maue ê atu i te pohe e fatata mai nei?”.

I roto i teie nau uiraa e piti te papu ra ia tātou e te vai nei te tahi tuatiraa, e taua tuatiraa ra tei roto ia i te fâ no teie ohipa tei faaue hia ia Ioane Papetito “E haere e poro haere i te papetito tatarahapa”. Ua papu ia Ioane Papetito e eita teie ohipa i te mea ohie i te mea e tupu mai te tahi mau ohipa huru ê e te auraa ore e i te fifi atoà no na e no te Fatu ta na e tavini ra.

No Ioane Papetito ua papu ia na e eita oia e au hia e te mau taata tei mataro e faaea noa i nia i te mau ohipa tei matau hia e tei ore roa atu i ineine i te tau, e mai te peu e tamata hia e hauti i to

ratou oraraa e riro ratou i te aro e te hamani ino i te taata, no te tapeàraa i te mau mea o ta ratou i fanào noa na e o ta ratou i tiàturi e tei reira to ratou ora tirara atu ai. E patoì uàna ratou i te mau titauraa a te haapiiraa a Ioane Papetito no te mea ua ite ratou e e riro te reira i te vavahi roa i to ratou ao .“O vai te mau ia fā mai oia ra” o ta Marati ia e haere mai nei e faahamanào ia tātou.

Te piti no te fifi e tupu mai oia hoi o to te taata ia tamata raa e haavarevare tatarahapa, e te reira no te imi raa noa i te tahi raveà no te faaora raa ia ratou noa atu ia e aita te aau i tae roa. O te mau taata ia o ta Ioane Papetito e parau ma te ani “a tuu mai na i tei au i te tatarahapa”, oia hoi e haere mai ma te hinaaro mau i te tatarahapa eiaha te ohipa haavarevare noa. Te vahi fifi ia i roto i teie huru ohipa i ta Ioane Papetito, e ô noa mai te mau huru taata atoà, aita' tu ra e faataa raa i te mea mau e te haere noa mai no te tamatamata.

E inaha eita e tau i te fā no te ohipa ta te Fatu i faaue ia Ioane Papetito, e haere e faaineine, e poro i to na haerea mai. No reira hou oia a tae mai ai e tano i te taatoà raa e tau i te e tatarahapa. E te hohoà tei rave hia e Marati no te haamaramarama i teie parau o te parau ia no te tama moni e te tama ahu. E nau hohoà teie no te tahi nau rave ohipa tei mataro maitai hia e te mau taata i te tau o Marati e to Ietu atoà.

Ua ite te taatoà raa o te taata e eaha te huru ohipa a te tama moni e ta te tama ahu, oia hoi o te tama raa ia i te mau repo atoà te mau viivii atoà e vai ra i nia i te moni e te ahu no te faaunauna faahou ia ratou ia ananatae te feia ona i te hoo i te moni , e ia hinaaro faahou te taata i te oomo i te ahu ma.

Na teie hohoà tei faaohipa hia e Marati e faaite papū mai ia tātou i te auraa o teie parau te tatarahapa oia hoi e tamaraa te huru, e horoiraa no te faaapī e no te faaore i te mau viivii e te peu tano ore e vaira i nià i te taata e i roto i to ratou oraraa. O te raveà anàe e faarii mai ai te Fatu ia tātou i mua i to na aro, no te pupu i te tutia na te Atua.

Teie tau no te tiairaa e tau tano maitai no te faatupu raa i teie titauraa tei na roto mai i te vaha o Ioane Papetito, e tama i te hara. Teie ra ia au i te mau hiòraa tei horoàhia atu, te papu ra ia tātou e eita i te mea ohie no te mea te vai nei te mau vahi e tau i roto i to tātou oraraa. Aita ra e eà ê atu e tupu ai te tama raa no te hara oia hoi e tau na mea noa, e faarue i te mau mea tahito e e rave mai i tei tano no te titauraa a te Fatu.

Na teie manàò hopeà e haapapū maira ia tātou e te auraa mau no teie parau te Tiairaa e Tauiraa ia. E tau teie no te faatauiraa i te mau peu mataro noa hia no te haamaitai à e no te imiraa i te raveà e tapiri faahou i te hinaaro o te Atua. Ua papū te hinaaro o te Atua o te faaora raa ia ia tātou, e to tātou hinaaro ua papu atoà anei. O te reira te uiraa rahi i teie tāpati no te Tiairaa 2, aita rea e mahana toe no te horoà raa i ta tātou pahono raa, e e ara atoà tātou eiaha ia hape i te taima e pahono ai tātou.

E pahono papu tātou mai ta Petero, Toma e te mau pipi, “E te Fatu e to matou Atua”. E eiaha tātou e mataù, eita oia e faarue faahou ia tātou, ua na mua noa ra oia ia tātou i te mau taima atoà.

Ia parahi tamau tātou i roto i te Aroha o te Atua.

Ia ora na.

Ralph TEINAORE
orometua

TIAIRAA III

(Tapati 11 no Titema 1994)

Taiòraa: Mita 5/ 1-4 V.M.
Hepera 10/ 5-10

Ruta Evaneria 1/ 39-45

Faaitoitoraa : Ruta Ev. 1/ 42 V.M.

“O oe tei hau i te maitai i te vahine nei, e e maitai hoi te huaai o to oe opu.”

E hoa ino ma,

I roto i teie tiairaa toru na tatou i to tatou Fatu. Ia ora na amui tatou i te aroha o te Atua.

Aroharaa....

Te ohu nei te tau, te tupu nei te mau ohipa api, te vai nei tatou i roto i te uiuiraa. Te tae mai nei te parau api oaoa. tei faaite hia mai nei ia Eritapeta i to na farereiraa i Maria i te parau api oaoa.

Inaha teie parau api oaoa, te parau ia i tohu hia e te perofeta o Mita i to na ra tau e tei riro atoa ei taioraa na tatou no teie mahana. Tei nao mai e: << ***E teie nei, e tuu atu o Iehova ia ratou, e ia tae i te taima e fanau mai ai te fanau ra*** >>

Te tahi tau tenetere i muri iho, ua tia mai o Maria i te tahi poipoi, aita to na manao e topa ra, ua hinaaro oia e fererei i te tahi fetii to na, o Eritapeta tei ioà e parahi i roto i te tahi oire iti no Iuta. O Eritapeta, e hoa vahine no Tetaria, tei roto atoa oia i te tahi taima tiairaa, te roto i te ineineraa no te fanau mai i roto i teie nei ao, te tahi aiu iti o tei topa hia tu tei ioa o Ioane. Haapapuhia teie parau i roto i te Ruta Ev. 1/ 63 << ***O Ioane to na ioà***>>.

Te auraa teie ia : te horoa a te Atua. E oia mau i roto i te faanahoraa no te natura. Te haere atura o Eritapeta i te paariraa,

aita oia e tiaturi faahou e tamarii faahou hia ona. e i to raua Maria farereiraa, i te taime a aroha atu ai o Maria ia na : ouàùà tura te aiu o Eritapeta i roto to na opu. E i taua taime ra, ua i atura o Eritapeta i te Varua Maitai. Maramarama atura oia e, o vai teie tamahine i mua ia na, e ere noa i to na fetii e te tama e amora, e ere noa i te tahi aiu rii noa nei. Ua parau atura oia ia Maria : **<< O oe tei hau i te maitai i te vahine nei, e e maitai hoi te huaai o to oe opu>>** E te maere atoa i roto ia Eritapeta : No te aha : No te aha ? O oia tei maitihia e te Atua no te faaite ia na e : o vai mau na teie aiu i roto i te opu o Maria.

Te pahono raa teie : Ua maitihia o Ioane ta na aiu iti, ei tia no te faaite, no te faaineine i te ea. I roto i te Ruta Ev. 3/4-6, teie to na taitairaa : **<< Mai te papaihia i roto i te puta a te perofeta ra o Itaia : E reo no te hoê i te poro haere raa i te metepara ra, a haamaitai i te ea o te Fatu, e faatitiaifaro i to na haerea. Ia hope te peho i te faaihia, ia hope te moua e te mau aivi i te haapapuhia, ia faatitiaifaro hia te ea pio, e ia haamaninahia te ea puupuu, ia ite te taata atoa i te ora a te Atua>>** E oia mau, teie te ohipa e titauhia ra ia Eritapeta ia faaineine oia i ta na tamaiti ia Ioane no te opuaraa faaora a te Atua.

Te tumu ia i tia mai o Maria, no te haere e farerei ia Eritapeta. tei roto raua toopiti atoa i te faaineineraa.

Faaineineraa no te faarii i ta raua aiu iti.

Faaineineraa no te faaite i te opuaraa a te Atua.

Faaineineraa no te aratai i te taata i te Atua ra.

O te mea ia e titau atoa hia ra ia tatou i teie mahana, teie ra, ua ineine anei tatou no te faarii i teie aiu, ua ineine anei tatou no te faataa ia tatou no te opuaraa a te Atua. Ua ineine anei tatou no te aratai te taata i te Atua ra !!!

Tera te mau titau raa ia tatou i teie mahana. Ua hope te tau e, te orometua anae tei ite i te hinaaro o te Atua, te mau tiatono anae te aratai mau, te poro evaneria anae tei ite i te poro. Te titau hia oe, o oe i tae mai i teie mahana i te pureraa ia faatupu i te

hinaaro o te Atua oia hoi ; ia ite hia te huru e te hohoa o te Atua i nia ia oe.

inaha te piri mai nei te mahana o te Fatu, te mahana o te Atua. Te piri mai nei te mahana, e tae mai ai te tamaiti a te Atua. I roto i teie tau no te tiairaa. Ia faaineine tatou ia tatou no to na taeraa mai. Te uiraa e tia i onei : No te Aha ? Te pahonora tei roto i te toru no ta tatou taioraa no teie mahana i roto i te puta hepera i te pene ahuru irava 10 o tei nao mai e :

<<No taua hinaaro ra e moa ai tatou nei, i te pupuraa hoe i te tino o Ietu Metia ra>> Oia hoi te metia tei haamoa ia tatou, tei tama ia tatou, tei faataa ia tatou no te haere i te Atua ra.

Ia ora na

Hitiura BENNETT
Orometua

TIAIRAA IV

(Tāpati 18 no Titema 1994)

Taiòraa : Hepera 10/5-10

Irava tumu : Irava 9 v. r.

“...INAHA E TAU ATUA, TE HAERE NEI AU E FAATIA I TO OE HINAARO...”

Ia ora na to te huifaaroo i te farerei raa i teie tāpati hopeà no te tau no te tiairaa. Ta tātou parau no teie tāpati ua rave hia mai ia mai roto mai i te puta Hepera i te irava 9 no te pene 10 no teie puta tei haapii mai e,

“...INAHA E TAU ATUA, TE HAERE NEI AU E FAATIA I TO OE HINAARO...”

Mai te peu e, te parau no te taata tei papai i teie rata eere roa i te mea papu, mai ta te hoê taote no te Pipiria(Theologien) i parau,

“O te Atua ana’e tei ite i te Fatu mau no teie rata i to te mau Hepera”

Area râ no te mau manao i faahiti hia, ua huru papu ia ia tātou eaha te mau manaò ta te papai Hepera e hinaaro ra i te parau ; te hoê o taua manao ra o ta tātou e hi’o mai i roto i ta tātou pene parau maori râ o te parau ia no te pupu raa tutia. No te aha te papai Hepera i faahiti mai ai teie parau.

Eaha te tuati raa no teie parau i roto i teie tau no te tiairaa. Ua papu maitai i roto i to’na manao e, te ohipa tei rave hia e te Metia ra e Ietu na roto i to’na pohe, ua matara ia te hoê hi’oraa e te hoê auraa api no taua ohipa pupu raa tutia ra.

I teie nei, mea tia atoà ra ia tātou ia hi’o eaha te faanaho raa no te pupu raa tutia i rave hia e te mau Ati-Iuta ihoa ra hou te tae raa mai no te taime o te Fatu. E ite tātou te reira i roto i te mau irava rii matamua no ta tātou pene parau (mai te irava 1 e tae i te irava 4). Aita tātou i poiri i te parau raa e, no te mau Ati-Iuta mea

na roto i te rave raa i te hoê tutia animara e faaore hia ai te hara a te hoê taata. Teie hoi te auraa, na te toto animara e tamā i te hara a te taata e taua faanahoraa ra tei mau maite hia e te mau Ati-Iuta.

E i teie nei, te ite nei te taata papai i teie rata i te hoê auraa api na roto i te pohe e te Tiafaahouraa o te Fatu. No'na, te ite nei oia i te hope raa no terâ faanahoraa tahito no te pupu raa tutia e te haamata raa no te hoê faanahoraa api tei iriti hia mai e te Fatu. E ere faahou atura na te toto animara e tamā i te aau viivii o te taata na te toto taata ra oia hoi te toto o te Metia i parau ai oia i te irava 5 : ***“No reira te Metia i na ô ai ia'na i haere mai i te ao nei aita a'e nei i tia ia oe te tutia e te parotefora, ua faaau râ oe i te hoê tino no'u”.***

Eaha te tahi auraa no teie parau. E hoa here mâ, i ô nei e matara mai ai te hoê auraa api no tatou na roto i teie parau maori râ, no te Atua, eita te toto animara e faufaa faahou hia i roto i te ohipa faaore raa hara mea na roto râ i te toto taata, te toto o ta'na iho Tamaiti. No teie manao, te faahamano maira teie parau ia tātou i te reo o te Papai taramo 40 irava 6 i te nao raa e : ***“Aore oe i hinaaro i te tutia e te tutia amu, ua haafatafata oe i to'u pue taria; te tutia taauahi e te tutia no te hara aita oe i titau i te reira”.***

Mai te peu e te matara maira te parau no te faufaa ore raa no te tutia animara i mua i te toto o te Metia, te turai faahou atura te taata papai i to'na manao i mua atu, oia hoi no te ohipa tei rave hia e to tātou Fatu, e nahea taua parau ra e faufaa hia ai no tātou. Na mua roa, no te Fatu, te mea faufaa rahi roa atu, o te haapao raa ia i te hinaaro o to'na Metua i parau ai oia na roto i ta ttou irava tumu : ***“...Inaha e tau Atua, te haere nei au e faatia i to oehinaaro...”.***

I mua i te parau no te faatupu raa i te hinaaro o te Atua, e ere noa ia i te hoê ohipa na te fatu ana'e, e ite atoa râ tātou ia tātou iho i roto i taua ohipa ra, mai ta te fatu i rave, ia riro atoa ia te faatupu raa i te hinaaro o te Atua ei tutia na tātou tei hau atu i

te tutia animara mai tei faahiti hia e Tamuera i to'na ra anotau ia'na i parau: **“...Tei te tutia taauahine e te mau tutia atoa i mauruuru ai Iehova? Tei te faaroo raa i te parau a Iehova te maitairahi i te haapao raa i te tutia...”** (I Tamuera 15/22).

E hoâ here mâ, no tātou, te tutia rahi i roto i te faatupu raa i te hinaaro o te Atua o to tātou ia ite hohonu raa eaha mau na te mau hinaaro o te Atua. Ua tauturu mai te Fatu ia tātou i te ite raa i te vêtahi o taua mau hinaaro o te Atua tei faahiti atoa hia e te perofeta Hotea ta'na i parau: **“Hinaaro hoi au i te aroha, eiaha te tutia, te ite raa i te Atua eiaha râ te mau tutia taauahine”** (Hotea 6/6)

O te faatupu raa te aroha e te tamata raa i te ite i te Atua e tutia rahi te reira na tātou no te mea e na roto i te Fatu e na roto atoà ia tātou i te faatupu raa i te here raa e te aroha raa i te Atua e ia tātou iho.

I teie tãpati hopeà no te tiairaa, te ite nei tātou na roto i ta tātou parau, aore rea e taima e toe râ e ite faahou ai tātou i te tupu faahou raa no te hinaaro o te Atua no tātou to te ao nei, te haere raa mai e te fanau raa no ta'na Tamaiti, o Immanuera, e ite ai tātou i roto i te aiu no Immanuera te hinaaro hohonu o te Atua ia ora tātou e ia haamaitai hia oia eiaha na roto i te pupu raa i te tutia animara, na roto râ i te pupu raa ia tātou iho ei tutia ora no te faatupu raa i to'na mau hinaaro.

Opani:

Mita 6/7-8 “E mauruuru anei Iehova i te tutia mamoe e ia tautani... Ua faaite mai oia e o te taata te mea maitai e ta Iehova e hinaaro ia rave i te parau tia e ia hinaaro hoi i te aroha e te haere raa ma te haehaa i te aro o te Atua?”

Ia haamaitai mai te Atua ia outou i roto i te ohipa faatupu ra i to'na mau hinaaro.

Ia ora na

TAUIRA Marama
Orometua.

MATAHITI API

(TAPATI O1 no Tenuare 1995)

Taiòraa : Ioane 15 : 1-6

Poroi : Ioane 15 : 5

"O vau te vine, o outou te amaa. O te ati mai ia ù ra, e o te ati atu vau ia na ra, o ia te hotu rahi; ia taa ê atu outou ia ù ra, aore roa ia e mea e tià ia outou".

E hoa here mā,

Ia haamaitai hia te Atua tei faatomo mai ia tātou i roto i teie matahiti apî, e tei faaite faahou ia tātou e, te faaapî noa nei o ia i te mau tau atoà i te parau no to na here e to na aroha.

I te ùtu no teie nei matahiti apî e iriti atoà ai tātou i teie hepetoma pureraa no te hoêraa o te mau maru-metia, haamauhia i nià i te tumu parau ra : "Koinonia : amuitahiraa i te Atua e ia tatou iho", te faataa faahou nei tātou i teie matahiti, mai te tahi matahiti aroraa na tātou i te mau mea atoà e faaino i te "amuitahiraa" i roto i na orapa atoà o te oraraa o te taata : poritita ; turu-utaa ; tapi-hooraa-taoà e faaroo.

I mua i teie tumu parau no te Amuitahiraa, te titau mai nei ta tatou parau no teie mahana, e faatioi faahou i to tatou putarià i te reo o to tātou Fatu, tei na ô mai e, "O vau te vine, o outou te amaa. O te ati mai ia ù ra, e o te ati atu vau ia na ra, o ia te hotu rahi; ia taa ê atu outou ia ù ra, aore roa ia e mea e tià ia outou".

Ua rave o Ietu i te parau no te hoê tumu raau, oia hoi, te tumu vine no te tatara i te faufaa no te amuitahiraa e vai ra i rotopû i te tumu vine, te amaa vine, te maa vine e te tuhaa a te taata faaapu i mua i te ohipa i ravehia e ta na rima. E tià roa atoà ia tatou ia rave i te hohoà no te tumu ùru no te tatara i te auraa

no te amuitahiraa ia au i te hiòraa a te Māòhi. Eita teie hohoà e faahoi ia tatou 100 matahiti i muri, e turai rà ia tatou 100 matahiti i mua.

I roto i teie taiòraa tei maìtihia na tātou no teie nei mahana, o te hitu teie o te taima to te Fatu faahitiraa i teie parau e "O vau te ...", tei iritihia mai mai roto mai i te taò hereni ra "Ego eimi". Te auraa no teie parau "O vau te ...", oia hoi, aita atu e hohoà, e aore ra, e parau o te tià ia tapirihia atu i nià i teie manaò. E ere teie tumu vine i te tumu vine maitai roa aè i rotopū i te mau tumu vine atoà i raro aè i teie nei raì. E tumu vine otahi teie, aita e tumu vine o te tià ia faaau ia na.

Mai te mau parau faahohoà atoà tei faaohipahia e Ietu, te tatara nei ia i to na iho parau e ta na tapura ohipa, mai te pane o te faaore i te poia, mai te maramarama o te aratai i te taahiraa avae o te taata, mai te tiaì mamoe maitai o te horoà i te ora no te mamoe, mai te eà e aratai i te ùtuafare metua, te ùputa e te vai atura ... Ua riro atoà te parau no te vine ei hohoà maramarama maitai hia e te nunaa Ati-Iuta i roto i te faaauraa matamua.

Ua riro noa na te parau no te vine ei hohoà no te nunaa Iteraera i roto i te faaìteraa a Itaia. Teie rà, mai te peu e, te haamauhia nei teie parau i nià iho i to Iteraera maitiraa hia e te mau maitai atoà ta te Atua e horoà nei ia na, ua ite atoà hia rà te pahonora a teie vine i mua i te here o te taata faaapu. Aita o ia e hoè iti aè i pahono noa aè i te mea i hinaarohia ia na ia faahotu e tei horoà i te taata faaapu i te tahi faaotiraa teimaha roa e "huti tumu" roa ia na (Jeremia 2 : 21 ; Taramo 80 : 9-17 ; Itaia 5 : 1 - 7).

No reira, i roto i ta tātou taioraa no teie mahana, te rave faahou nei Ietu i te hohoà no te vine no te tatara i to na iho parau e ta na ohipa. Aita o ia i faatupu noa aè i te manaò peàpeà i roto i te aau o te taata faaapu, oia hoi, te Atua Metua. E i nià atoà i teie tumu vine e titauhia ai te mau amaa api (te nunaa api o te Atua) ia ati atu i te tumu e ia hotu rahi.

Mai te peu e, te titauhia nei te mau amaa ia hotu, te faaara atoà hia ra rà ratou e, ia ore noa atu ratou ia pahono i teie titauroa, ua mairi ê na te opahi i nià ia ratou.

Te tahi parau faufaa ta tātou e tapeà mai i roto i te oraraa o te vine e te mau amaa, maoti iā, e mau mea ora anaè ratou. No reira, te titauroa a te Fatu i ta na mau pipi ia ati papū ia na, a riro atu ai ratou ei nunaa apī titauhia ia hotu rahi i te maa no te Atua.

Te ite atoà rà tatou i te tuhaa a te taata faaapu i roto i te tupu maitai raa o te vine e ia hotu hoi i te maa.

No reira, te mau raveà atoà i faaohipahia e te taata faaapu, mai te tapū raa i te mau amaa hotu-ore e te topetoperaa hoi i te tahi atu mau amaa, ua riro ia ei raveà no te faatahe puai i te tapau i roto i te mau amaa, e ia faahotu mai i te maa.

I roto i te parau no te "tapū", e ite atoà hia te manaò no te "haavā raa". I mua i teie parau no te vine, te ite ra ia tatou e eita e tià i te tumu vine ia tapū i te mau amaa, no te mea tei nià iho ia na te mauraa te mau amaa. Eita atoà hoi e tià i te mau amaa ia tapūpū ia ratou iho. Hoê noa taata o te tià e rave i taua tapura ohipa rà maoti o te taata faaapu, oia hoi o te Atua anaè te tià e haavā. Areà te topetope ra, ia au i te taò haa hereni i faaohipahia (cathairō), te tatara ra iā i te parau no te "tamāraa". Ua tamā ê na te parau a te Fatu i te mau pipi i te 13 : 10. No reira i mua i te mau tamataraa e te mau manuia-ore-raa i roto i te oraraa, e tià roa i te parau a te Fatu i te tamā i te feia faaroo, no te faahoi ia ratou i te tumu mau o te oraraa o ia hoi, te atiraa atu i to tatou Fatu. O te mau manaò ia ta tatou e ite mai i te irava 4 e te 5.

I mua i teie parau "a ati mai outou ia ù, e na ù e ati atu ia outou", tei faahiti atoà hia i te 6 : 56 e te 14 : 20, ua riro teie parau mai te tahi titauroa i te feia faaroo ia ite e, na roto i to ratou papetitoraa, te faatahe noa nei te Fatu i te ora i roto i to ratou oraraa, mai te tumu vine e faatahe i te tapau i roto i te

mau amaa. Te tuhaa a te mau amaa, o te faarii raa ia i teie ora horoà noa.

E titauraa onoono atoà teie i te mau pipi oia hoi, te atiraa atu ia Ietu, no te haapapū i te tahi taamuraā papū i to ratou Fatu, eiaha rà mai te tahi ohipa ta-ùtu noa atu. I roto i te reira huru ati-papūraa, e faahotu ai te pipi i te maa. Ua papū atoà ia tatou e, te tahi amaa aita i mau papu i nià i te tumu, aita e ohipa maitai ta na e faahotu mai, e eita roa atu o ia e hotu mai i te maa. Te auraa mau ia no tera parau ta Ietu e, "i rapae aè ia ù, aita roa atu ta outou e ohipa maitai i reira".

Aita rà Ietu e faahapa nei i te mau ohipa maitatai e ravehia, noa atu e, eita e itehia i reira te tiàturiraa.

Te manaò tumu e vai ra i ô nei, e ia au atoà i te mau tapura ohipa atoà e ravehia e te hoê pipi, ia riro te reira mai te tahi faaiteraa (témoignage), e no te faahanahana atoà i te taata faaapu, oia hoi, te Metua. Ia ore te pipi e te taata faaroo ia ati papū i te Fatu, te mau ohipa atoà o ta ratou e rave, aore roa ia to ratou e auraa. Ua haapāpu Ietu i te reira parau no na iho, mai te parau e, "aore roa e ohipa e oti ia na, i rapaeau aè i te faauerāa a to na Metua" (5 : 19, 30 ; 9 : 33).

Te faaara faahou ra Ietu, "o te ore noa atu e ati ia na, e tatarahia te reira amaa, e e mārō atu ai. E haaputuhia te mau amaa hotu-ore, e e tahuhia ratou i te auahi" (irava 6). Teie te hohoà no te faautuāraa o te mairi i nià i te feia tei ore i pahono i te hinaaro o te Atua mai tei faaara ateà atoa hia na e te perofeta ra e Etetiera (15 : 4).

Te ui atoà ra tatou e, no vai mau na teie huru faaararaa teiaha roa. No te mau taata atoà tei ati i te Fatu (te feia atoà te titirohia i nià ia ia ratou te tiaraa pipi) tei ore i faahotu mai i te maa. E hohoà teie no te feia faaroo tei ore i aāhia i roto i te faaroo. Ia tae mai te hamani-ino raa no tera mea, aitā reā e mauraa, mahitu tumu noa ihora to ratou oraraa taatoà e paapaà iho ra.

Te riro atoà ra teie mau parau faaara no tatou i te omuaraa no teie matahiti apî 1995, e i roto atoà i teie hepetoma pure no te hoêraa o te mau maru metia, mai te tahi titauroa o te horoà ia tatou i te puai no te imi i te maitai o te faatupu i te oaoa i roto i te aau o to tatou Metua.

"O vau te Tumu vine, o outou te amaa, o ta ù Metua te taata faaapu. O te ati mai ia ù ra, e o te ati atu vau ia na ra, o ia te hotu rahi, ia taa ê atu râ outou ia ù ra, aore roa ia e mea e tià ia outou".

Ia ora na i te matahiti apî 1995.

Julien MAHAA
orometua

FAAITOITO RAA NO TE PO MATAHITI

(31 NO TITEMA 1994)

Taiòraa : Mataio 4/ 12-17.

Irava faaitoitoraa : ir. 17 :

**"I reira to Ietu haamataraa i te aò i te na ô raa e,
a tatarahapa te fatata mai nei te patireia o te ao".**

I roto i na evaneia e 3 a Mataio, Mareto e o Ruta, te faaite hia ra e ua haamata o Ietu i ta na òhipa na mua roa i Tarireia i muri ae i to na tamataraa hia e te tiàporo i te metepera. O Mataio anae raua o Mareto tei haapāpū e : "i to Ietu iteraa e ua tapeà hia o Ioane Papetito i reira to na haereraa i Tarireia, e haamata atu ai i ta na òhipa". Ia hiò anae tātou i te faatiàraa a te mau papai evaneria, e ite tātou e 2 òhipa faufaa roa ta te Fatu i ora hou oia a haamata ai i ta na òhipa òia hoi to na papetitoraa hia e Ioane e to na tamataraa hia e te tiàporo.

I roto i te parau no to Ietu papetitoraa hia e Ioane, ua ite tātou i to Ietu fariiraa i teie faanahoraa e na Ioane ihoa e rave. Te vai atoà ra te haapāpūraa a te Atua i to na mauruuru i ta na Tamaiti. Aita e òhipa i ite hia atu ra mai teie te huru. Ta tātou i mataro, ia rave te taata i te òhipa e ia ite hia e mea maitai ta na òhipa i rave i reira ia e haamauruuru ai ia na. No Ietu, te ite ra tātou e faanahoraa taaê to na. Ua na mua te haamauruuru i te òhipa, e tapaò faaite te reira i to te Atua tiàturi i ta na Tamaiti. Ua faaite te Atua i to na tiàturi i ta na Tamaiti hou òia a rave ai i te òhipa.

I roto i te parau no to Ietu tamataraa hia e te tiàporo, ua faaite mai òia i reira i to na tuàtiraa pāpū i te Atua. Noa atu te mau raveà rau a te tiàporo, eita òia e vī ia na, e eita atoà òia e faaruè i te Atua.

Te ite ra tātou i te rahiraa maitai i roaa ia Ietu i to na oraraa i teie na òhipa faufaa mau. No te mea e rave òia i ta na òhipa ma te tiāturi pāpū hia e te Atua. E ua ite pāpū atoà òia i mua i te mau raveà paari a te Enemi eita òia e hià, e upootià ra òia.

Te na ô ra ta tātou irava : **"I reira to Ietu haamataraa i te aō i te na ō raa e, a tatarahapa, te fatata mai nei te patireia o te ao"**.

I roto i te hiòraa a Mataio, e 3 òhipa rahi ta Ietu i rave i roto i to na oraraa ia au i te pene 4/ 23 : "Haere atura Ietu na Tarireia e àti ae i te haapiiraa i roto i to rātou mau tunato, te aòraa i te parau maitai no te patireia o te ao e te faaoraraa i te mau mai e te mau pohe atoà o te taata". Te faaite noa mai ra ta tātou irava i te òhipa rahi matamua tei rave hia e Ietu o te Aòraa i te parau maitai no te patireia o te ao. Teie aòraa ta Ietu i haamata i Tarireia, ua rave hia e Ioane Papetito i te metepara no Iutea ia au i te pene 3/ 1-2. Ia hiò anae tātou i teie faanahoraa, e au ra ua hinaaro o Ietu e haamata ta na aòraa na nià i te òhipa tei rave hia mai e Ioane Papetito. Eita e òre e rave rahi mau tumu i rave faahou ai Ietu i te parau i aò hia e Ioane Papetito.

Ia au i ta tātou i hiò mai, e ua haamata o Ietu i ta na òhipa i to na iteraa e ua tapeà hia o Ioane. Eita e òre e parau faufaa roa te parau no te tatarahapa e te taeraa mai no te patireia o te ao. I to Ioane parauraa i teie parau, ua ite hia te tahi mau taata i te papetitoraa hia e ana. E tapaò faaite te reira e ua farii rātou i te parau a Ioane.

I rave faahou ai o Ietu i teie parau, eita ihoa ia e òre e parau faufaa mau teie. Te na ô ra ta tātou parau : **"I reira to Ietu haamataraa i te aò i te na ô raa e, a tatarahapa, te fatata mai nei te patireia o te ao"**. I roto i te faanahoraa parau a Mataio, i muri ae i teie aòraa a Ietu ua ite hia te tahi òhipa tei tupu òia hoi to Aneterea, Timona Petero, Iatopo e o Ioane fariiraa i te pee ia Ietu. E tapaò faaite te reira e ua farii rātou i te parau a Ietu.

Te haapii noa mai ra teie mau parau ia tātou, i te mau taimē i parau hia ai teie parau : **"A tatarahapa, te fatata mai nei te patireia o te ao"**, ua ite hia te tahi mau taata i te fariiraa i teie parau na roto i to rātou fariiraa e ia papetito hia rātou aore ra na roto i to rātou fariiraa i te pee ia Ietu.

"A tatarahapa, te fatata mai nei te patireia o te ao"

I teie pō hopeà no teie matahiti, te faaroo nei tātou i teie reo to Ietu i te parauraa mai ia tātou. Ua ite tātou e te titau mai ra te Fatu ia tātou i te tahi tauraa aore ra i te tahi faaâpīraa no te mau òhipa o ta tātou i rave mai, no te mau huru o ta tātou i faaite e no te mau parau o ta tātou i parau.

I mua i te parau no te tatarahapa, e au tātou i teie mau fee tei òre i hinaaro faahou e tãpii i nià i te tahi mau toà. Te tahi toà ta tātou e àpe roa i te tãpii o te toà ia no te tatarahapa. Ia au i ta tātou parau no teie pō, te hinaaro rahi o Ietu ia tãpii tātou i nià i te toà no te tatarahapa no te mea i reira te tahi mau peàpeà to tātou e hau ai, i reira te tahi mau fifi to tātou e matara ai. Te vāhi pāpū ra, i reira te òaòà e te hau e hoì faahou mai ai. Eere anei e te faatupuraa ia tātou i te Hau o te Atua.

Mataio 6/33 : "E mata na i te ìmi i te patireira o te Atua e te parau tià na na, e âmui atoà hia mai taua mau mea ra ia òutou".

IA ORA NA.

TEURURAI Tehaapapa
orometua.

<p style="text-align: center;">FAAITOITORAA NO TE MAHANA NOERA (TAPATI 25 no titema 1994)</p>
--

TAIORAA : RUTA EV. 1/ 46-55

E hōa here mā, ia ora na i te aroha o te Atua i teie mahana òaòà.

E mahana òaòà, eiaha no te mea tei roto tātou i te tau no te mau ôroà hopeà matahiti tei matarōnoa-hia e tātou, eiaha no te rahi o te mau mōri e àma ra i te pō, e aore ia no te nehenehe o te mau faaùnaùna na roto i te òire, na roto i te mau toa, e tae noa atu i to tātou iho mau utuafare.

Eiaha atoà no te mea ua ineine te mau amuraa-māa taaê i te faaineinehia e te tiaï mai ra hoï te mau hoa no te ùmere-âmui-raa i to tātou òaòà.

E mahana òaòà rā, no te mea, ua tupu te parau i tiaï maoro-hia. Ua tupu te ôpuaraa faaora a te Atua. Tei reira te tumu matamua roa no te òaòaraa o te himene hia nei e MARIA i teie poïpoï na roto i ta tātou nei taiòraa.

Tei roto i te reira huru òaòaraa to ù faataeraa atu ia òutou paatoa na te tapaò no te aroha.

Outou paatoà e parahi na i te mau motu atea, mai te mau tāvini no te Atua, te mau taeaè òrometua e to òutou mau ùtuafare. Na reira atoà i te mau âpooraa tiàtono, te mau taeaè e tuahine ia vai te òaòà o Noera i roto i to òutou mau motu, mau ùtuafare e i roto atoà i to òutou ààu mā te haamanaò atoà i te feià tei roto i te teimaha tei tapeāhia te tino e te mai, tei roto i te fare tapeāraa no òutou atoà te òaòà o Noera. Ia haamaitāhia te Atua e tiā ai.

Teie nei taiòraa na tātou no teie poïpoï, ua riro ia mai te tahi piïraa, e aore ia mai te tahi fairaa i te rahi o te òaòà e vai ra i roto i te ààu o teie vahine o Maria te metua vahine o to tātou Fatu.

Te ite nei tātou e, aita te òaòà o Maria i mau i roto ia na. Ua riro rā mai te tahi pape pihaa. Eita atoà e ore ua riro teie haamaitairaa ta Maria i to na Fatu mai te tahi fairaa o te tià atoà ia tātou ia rave i teie mahana te faaite atoà-raa i to tātou òaòà. Ia òre ta tātou òaòaraa ia haamau-noa-hia i nià i te mau mea pohe.

Rahi roa atu te òaòà o Maria i te mea e, aita te Atua i vahavaha i to na haehaaraa. Ua ite mai rā ia na no te faatupu i ta na ôpuaraa.

Oia mau, eita e òre i roto i te òhipa i tupu i nià ia na ua tupu atoà te huru ê, te mataù i te mau parau a te taata, i te mea e, ua momoàhia o ia ia Iotefa. Aita te mau Evaneria, e i roto atoà hoi i te faaiteraa a Ruta e horoà mai ra à te tahi mau haamāramaraa i hiā i te manaò o Iotefa i te òhipa i tupu i nià ia Maria. Noa atu te reira mau faataupupuraa, ua puai aè te manaò haamaitai i te Atua, o'ia i maìti ia na.

I roto i te òhipa a te Atua, te ite nei tātou i to na tiàmāraa no te maìtiraa i te taata o ta na e hinaaro no te faatupuraa i ta na òhipa. Noa atu te reira tiàmāraa ra te faahuru ê ra i te faanahoraa o te Totaiete, mai ta tātou e ite nei no Maria rāua o Iotefa. Tapaò faaite atoà ia tātou e, tei nià aè te Atua i ta tātou mau faanahoraa atoà, e te tumu hoê roa no to na tiàmāraa o te ora ia e noaa ia tātou.

Mai roto mai i te haehaaraa o Maria, te huru tano òre no te òhipa i tupu (ia au i te hiòraa taata), ta te Atua faatupuraa i ta na òhipa faaora. Mai roto mai i taua huru paruparu ra te fānauraa mai te ora âpi. No te faaite atoà mai ia ia tātou i te mana o te Atua.

E ôpuaraa teie tei faaite maoro-hia mai e te mau hui-tupuna. Te haamata ra i teie nei. Ua riro te huru paruparu o ta tātou i tauà-parau iho ei papu i reira e niuhia ai te tupuraa no to na ra Patireia.

E tano atoà ia tātou ia parau e, te faahuru ê nei te Atua i te mau mea atoà i haamauhia e te

taata na mua roa. Ia riro te mea atoà i teie nei ei òhipa âpi no te hoê ao âpi.

Na roto i te mahana Noera, èere ta tātou òhiparaa i te haamanaò-noa-raa i to te Atua nohoraa mai i ò tātou nei, e aore ia to tātou haamanaòraa i to tātou fāriiraa i te Tamaiti a te Atua i rotopū ia tātou.

E mahana rā tei faatupu i te òaòà tei faahuru ê ia tātou. E mahana no te haamataraa o te tahi ao âpi. E mahana tei faaâpi i to tātou hiòraa i teie nei ao.

" E haapūrara o ia i te manaò teitei o te teòteò
E hurihia te feiā mana i raro i to rātou terono
E faateitei i te feiā haehaa
E faai o ia i te feiā i ère i te maitai
E te feiā taoà rahi ra, e faahoì o ia mā te òre".

Te ìte ra tātou i ò nei, te hurihia nei te mau faanahoraa i mataro-noa-hia e te taata i te reira tau. Eita e òre, ua riro atoà na teie mau faanahoraa ei fā i reira te mau taata e tuu ai i to rātou tiàturiraa. Òia hoì, teie mau mea ta te Atua e faahuruê nei ua riro ia ei faahinaaroraa, e te reira atoà te tapaò faaite i te manuiaraa no te oraraa o te hoê taata e aore ia no te hoê nūnaa. Na te reira i turai i te taata i roto i te manaò haavī, te manaò pipiri tei òre i au i te huru o ta te Atua i hinaaro no ta na mau tamaraii.

Ia hiò aè tātou i to tātou oraraa i teie mahana, te ìte nei tātou e, te vai atoà ra te reira huru i ìtehia i te tau i reira te tupuraa o ta tātou taiòraa. Eita atoà e òre, tei roto atoà tātou i te àtuàturaa i teie huru faanahoraa no to tātou totaiete. Ei tapaò faaite atoà i te faufaa, e aore ia te manuiaraa no te hoê taata.

Inaha te faaite mai nei, Maria na roto i ta na himene-haamaitai i te Atua i te tumu no to na òaòà, tei roto ia i to te Atua faataahuriraa i teie mau faanahoraa.

Tei reira te tupuraa te Evaneria i roto i to tātou oraraa, i roto ia tātou iho. Te reira atoà te haamataraa no teie ao âpi ta Noera e faaite mai nei ia tātou.

Ia riro teie Noera, ei himene-haamaitai na
tātou i te maitai rahi o to tātou Atua.

AMENE.

MARAEA Taarii
òrometua



VEA OROMETUA

Episetole papaihia ei faaitoitoraa
e ei taamura a i te mau tavini o te Atua
tonohia e te Ekalesia

N° 43
1995

Papeete, i te 3 no eperera 1995

RATA HAAATI

E hoa here e,

Ia ora na i te aroha o te Atua.

E hoa here e, terà mai ta tatou Vea orometua ei tautururaa ia tatou i roto i te mau oroà teretitiano e fatata mai nei ia tatou, ia au i te mau faataaraa i muri nei, o te anihia atu nei ia tatou ia auraro maite :

- Tapati no te mau Amaa : tapati 9 no eperera
(oroà euhari)*
- Haapaeraa maa : mahana pae 14 no eperera
(oroà euhari)*
- Tiafaahouraa : tapati 16 no eperera
(oroà euhari)*

(e te hoê mau faaitoitoraa popoto i faataahia no te mau pò pureeraa Hepetoma-moà :

- manire 10 no eperera*
- mahana piti 11 no eperera*
- mahana toru 12 no eperera*
- mahana maa 15 no eperera).*
- Revaraa : mahana maa 25 no me
(oroà euhari)*
- Penetetote : tapati 4 no tiunu
(oroà euhari)*


Ei faahaamanaoraa : no ta tatou haapaeraa maa, ia faaohipa ia tatou i te puta o te matahiti 1994 ra e e haamata ta tatou pureraa mai te hora 8 i te poipoi e e faaoti i te hora 2 i te avatea. (É ere i te mea fifi ia faaoti tatou na muri aè i te hora 2, eiaha râ na mua aè !)


E mea tià ia tatou ia faatura maite mai i te mau titauraa e anihia atu nei ia tatou. Mauruuru.

Aroha maitai atu i ta tatou mau Apooraa Tiàtono e tae noa atu i ta tatou mau paroita e i to tatou mau utuàfare.

Ia vai hoê noa tatou e ia oaoa noa i roto i te taviniraa.

I te ioà o te Apooraa faatere :

Te peretiteni,

Jacques IHORAI



Poroì no te 5 no Māti 1995

Taiòraa : Ruta Ev. 4 : 1-13

Poroì : Ruta Ev. 4 : 3 vr, 9 vr : *"E Tamaiti òe na te Atua ra..."*

E hoa here mā

Ua fatata i te 200 matahiti i teie nei to tātou haamanaò-noa-raa i to te Evāneria taeraa mai i ô tātou nei. I te 5 no Mati 1997 i reira te Etāretia Evāneria e tapaò ai i te 200 raa o te matahiti no te fanauraa o te parau āpī òaòà no te here e te aroha o te Atua i roto i te aai e te oraraa o te nūnaa Māòhi.

Te riro atoà ra te reira taiò mahana mai te tahi taime faufaa rahi i reira te huī faaroo porotetani, no teie mau taa mōtu e hiò faahou ai i te huru no te tupuraa o te Evāneria ora a te Atua i roto i to tātou fenua. Eaha te huru no te faaroo o te mau marū-metia. Ua mau tutuaau noa anei i nià i te tumu mau no te ora, e aore ra, te tāfifi pohue hanoa ra i nià i te mau āmaa o te mau mea e huritua i te here o te Atua Rahūnui.

Ia hiòhia te parau no teie Iupiri ta tātou e fatata nei i te ora āmui i roto i te òaòà e te aau mehara, e hohoà rii atoà mai te taime haapāpū-faahou-raa na tātou i to tātou tiaturiraa i te Atua, tei tiaì, tei paruru e tei tauturu ia tātou i mua i te mau tamataraa o teie nei ao, mai teie atoà e orahia nei e to tātou Fatu i roto i ta tātou taiòraa no teie nei mahana.

Te parau ta tātou e faaroo faahou nei i teie nei mahana, e parau atoà ia tei faatià atoà hia i roto i te Evāneria a Mataio 4 : 1-11, o ia hoì to Ietu arataìraa hia e te Varua i roto i te metepara ia tamatahia o ia e te tiāporo. Te vahi huru taa ê rii noa i roto i teie na faatiàraa toopiti, māoti ia to Ruta haapāpūraa e e ua i o ia i te varua maitai, i muri aè i to na pāpētioraa hia i te pāpē i Ioritana.

I Ioritana hoì te horoàraa hia teie Tiàraa tamaiti here ia na, ei haapāpūraa i to na huru taata mau, o te òre roa e tià ia faaau i te huru o te tahi atu taata. O ia mau, ua faaòhipa te Atua i te rai no te fauraò i to na reo i nià i teie nei taata o ta na e tapaò nei i teie taime nei ei Tamaiti here na na.

Te parau ta te Atua i faahiti i nià i ta na Tamaiti i te taima no te pāpētitoraa, o te parau atoà ia e faaòhipa hia nei e te tiàporo no te tamata ia Ietu :

“E tamaiti oe na te Atua ra”, e aore ra, “mai te peu e, e Tamaiti òe na te Atua..”

Te hinaaro tumu o te tiàporo, o te titauroa ia ia Ietu ia haapāpū i to na tiàraa Tamaiti na te Atua, e tae noa atu i to na vairaa i roto i te paparaa tupuna o to na mau metua.

“A parau òe i teie mau òfai ia riro ei pane”

I roto i te âravihi no ta na mau peu, e ta na mau parau rii faatavai manino, ua tiai noa te tiàporo ia poia roa Ietu, i reira o ia e ani ai ia Ietu ia faariro i te òfai ei māa, e aore râ, ei faraoa. I te mau mana atoà o te rai e te fenua tei horoàhia i roto i to na rima, e tià roa ia Ietu ia pāhono i teie aniraa, e i te faaite atoà i to na tiàraa Tamaiti na te Atua i mua i teie titauroa. Aita râ Ietu i vaiho ia na ia topa i roto i te here-pata a te tiàporo, e ua rave o ia i te haana no te parau a te Atua ei mauhaa na na i roto i na tamataraa atoà e toru. E te mau òfai pupuhi o ta na i faaòhipa, no roto ia i te puta Teuteronomi 8 : 3 ; 6 : 13-14, 6 : 16, o ia hoì, te tahi haapāpū faahouraa no te ture i horoà ia Mote, e o ta te Atua hoì e horoà nei i te taata, ei niu aè no to na taahiraa avaè i mua i te mau tamataraa e rave rahi.

I mua i te pahonora a mātamua a Ietu, te tuu nei o ia ia na iho na mua roa eiaha i nià i te eà, e aratai ia na i te parau no te maa, i nià râ i te eà no te haapaò hope roa i te hinaaro o te Atua. Ua faaara è na hoì te Atua i te taata e, e eita rātou e ora i te maa anaè, eiaha ia te tiàporo e manaò e e ofati ia vau i te reira faaueraa i teie taima.

Teie atoà paha te tahi ture e ofatifati pinepine hia nei i teie tau, o ia hoì, te haapaoraa i te hinaaro o te Atua. Ia tano te hauti a te maa, e taninito te varua tiāturi atua. Eaha atu te huru ahiri te ofai e riro mai ei iò puaatoro na roto noa te parau, e aore râ, te tahora pāpē ei âpoo mori arahu, ua atua è na ia te taata i ò na iho.

Aita râ teie Fatu ta tātou e tavini nei e horoà nei i te reira huru haapiiraa ia tātou. Te faatioi tamau nei o ia i to tātou mata i nià i te Atua, te Fatu no te māa e te mau mea atoà no te tauturu ia tātou i roto i to tātou oraraa. E vaha amu noa tātou, e e rima rave noa tātou i te mau mea i oti aè na i te haamaitahia e te Atua.

...”E horoà atu vau i te hau e te hinuhinu i teie nei mau fenua ia oe”...

Ia onono tātou no te faahinaaro i te raì e te hinuhinu o te mau pātireia o teie ao, e te faaairo i to tātou tau puè âvae ei turuà tuturiraa no te feia rii e no Ietu, te hoa o te feia riiri, te paaina faahou rā ia te ofai pupuhi a te Teuteronomi :

“O te Atua rā o Iehova ta oe e mataù, o ia ta oe e haamori, e tapu hoì òe i to na ra iòā..” (Teut. 6 : 13-14).

I roto i teie tamataraa piti, te faaite pāpū ra Ietu e, horoà noa mai a te tiàporo i te mau maa atoà, eita rā to na turi e maìri i raro i mua ia na.

Ia tae mai tātou i teie tamataraa hopeà, te hohora atoà ra te tiàporo i ta na pipiria, ma te parau e,
“E haamairi ia òe i teie nei vahì, ...” ua oti hoì i te papaihia e
“E poroi te Atua i ta na mau merahi no te tiaì ia òe... e na rātou e mau ia òe, ia ore to âvae ia tano i nià i te ofai”
 (Taramo 91 : 11-12)

Aita teie tamataraa i faaea noa i nià i te Tamaiti a te Atua, i nià atoà ra i te hapa o teie Tamaiti. E i roto i te pahonora a Ietu te haapāpū faahou ra o ia e, eita te Atua e tamatahia. Te reira huru rā, tei nià iho ia i te tara te taahiraa.

I mua i teie mau parau ta tātou i hiò mai nei, te ìte rā tātou ia Ietu i to na faaereraa ia na i to na mana e to na hanahana, no te vaiiho i to na oraraa taatoà i roto i te rima faaôra o to na mētua. I roto i to na tiàraa taata, ua vaiiho o ia na iho i raro aè i te mana faatere no te ture a te Atua, i roto i te auraro hope roa raa i to na hinaaro.

Te upotiàraa tei noaa ia na, e upotiàraa ia, no te hoè taata tei ore i tāpū i te tuàtiraa i rotopū ia na e ta na Metua.

Ia riro atoà teie oroà 5 no Māti no teie matahiti, mai te tahi faahio faahou raa ia tātou i te faufaa rahi no te hoè tuàtiraa tei mau pāpū i nià i te toà no te mana o te Atua.

Te manuia raa tei noaa i to tātou Fatu, te haamanaò noa mai ra ia e, e manuia atoà tātou i mua i te mau tamataraa atoà o te oraraa, ia âpee tātou i te taahiraa âvae o to tātou Fatu. Iaorana.

Julien Mahaa orometua.

TAPATI NO TE MAU AMAA (Tapati 9 no Eperera 1995)

TAIORAA : RUTA EV. 19/28-48

Te manaò tumu : Te tomoraa no Ietu i Ierutarema tei tupu aena, ia riro ia i teie mahana ei faaara raa ia mahuta faahou to tātou faaroo e no te turai i ta tātou hioraa Atua i mua..

E hoa here ma e,

E mahana parau rahi teie, no te mea te iriti nei oia ia tātou i te hoê hepetoma pureraa, no te apee faahou i to tātou Fatu i roto i te mau taima rii hopea no tona oraraa.

Mea tano ra ia faahamanaò hia; e to Ietu tomoraa i Ierutarema; ua tupu aena te reira òhipa, e hia matahiti i teie nei.

I teie tapati, aita tātou e faatomo faahou ra ia Ietu i Ierutarema. Aita atoa hòi tātou e afai faahou ra iana i roto i te hiero, no te tiavaru i te feia hoohoo i rapae.

Te hinaaro nei ra tātou, e na roto i teie mau òhipa tei tupu aena i roto i te oraraa o te Fatu, te hinaaro nei tātou, e hio, e te hinaaro nei tātou e imi , *eaha ta te Atua Metua poroi ia tātou e ora nei i teie tenetere*

I roto i ta tātou taiòraa, te faatia nei te parau a te Atua i to te Fatu tomoraa i te oire pû o te mau Ati-Iuta, oia hoi, o Ierutarema, e te faatia atoa nei i tona tomoraa i roto i te hiero, no te tiavaru i te feia e haaviivii ra i te hiero o te Atua. E ere a tahi ra Ietu a haere ai i Ierutarema. Ua faahiti na te mau Evaneria, e ua haere aena te Fatu i roto i taua oire ra.

I teie ra taima, e tomoraa taae teie, no te mea, eita oia e tomo faahou mai tana i matau, inaha, te maiti nei oia i te tua no te hoê animara, ei faurao no tona tomoraa hopea i te oire pû.

I roto i te òhipa ta Ietu e rave nei, te faatupu nei te reira i te mau parau tohu ia au i te Tetaria pene 9 irava 9

“ A oaoa hua na oe, e te tamahine o Tiona e ; a pii na e te tamahine o Ierutarema e ; inaha te haere maira to arii ia oe ra : e

parautia tana, e o te ora hoi oia, haehaa tona i te parahiraa i nia i te atini e te pinia te fanaua o te atini”.

Teie parau, te haapii mai nei oia e :

Aita te Atua i Faairi i te tua o te taata ei faurao e tae ai tana tamaiti i Ierutarema no te faaora i to te ao

Te faaite nei ra te Evaneria e, ua māiti te Atua-Metua i te atini, oia hoi, ua māiti oia i te tahi animara tei faaòhipa rahi hia e te feia riirii i te Fenua Paretetina no te uta i ta rātou mau tauihaa.

Te atini e animara haehaa, e au no te feia riirii, e parau faahiahia teie.

I roto i ta Ruta faatiaraa, aita te Fatu i māiti i te atini-metua no te tomo i te oire pû, ua rave ra oia i te fanaua o te atini. Ia hiohia e tano ia parau e, na roto i teie huru : *Te pou nei letu i raro faahou atu a i te haehaa o te feia riirii no tona tau e no te mau tau atoa, no tona tere hopea i roto i te oire pû.*

E hoa here ma,

E parau rahi ravai roa teie no te faaara ia mahuta te hioraa-Atua i mua. Oia mau no te ora noa ia au i te faito e te huru o te feia riirii e te feia haehaa e ere roa atu ia i te mea ohie ; *caha atu a ia te fifi ia ora i raro faahou atu a i te haehaa o te feia riirii?...*

I tera mahana, i tomo ai letu i te oire pû, ua riro te ravea tana i rave ei parau rahi faufaa, no te mea, o te ravea te reira o tei faaite i te taata i te huru mau o letu.

Eita e ore, o te tahi ia no te mau tumu i faatia ai o Ruta e : *I roto i te tīaa rahi i pee ia letu; ua pii ihora te tahi pae i te haamaitairaa i te Atua : Ia ora na te arii i te haerea mai ma te ioa o te Fatu ra; ei hau to te rai e te haamaitai i te vahi teitei*

No tera mau taata, ta Ruta e parau nei e ; e pipi; no rātou, mea papu roa e, i tera mahana : *Ua tupu mau te tahi arepurepu raa i roto ia ratou ; ua tupu mau hoi te tahi òhipa i roto ia rātou, tei faaara e tei turai ia rātou ia arue haamaitai i te Atua.*

Taua arepurepu raa ra, e taua òhipa faaara ra, *O letu anae te tumu no te reira. O letu i roto i tona haehaa hau ê, tei horoa e tei faatupu i te VAHA-PARAU E TE AAU OAOA i roto i tera mau taata.*

Ia hiohia o letu i roto i tona haehaa hau e, te riro nei te reira ei taviri o te tatara nei i te uputa aau o te taata, ia riro ei oire e ei hiero no te Atua. E parautia roa, te hio nei tātou i to te Tamaiti a

te Atua tomoraa hopea i roto i te oire pû, e tona atoa hoi tamāraa i te hiero, teie ra, e ere anei, mea faufaa ae i teie mahana, ia hio i roto ia Ierutarema ta Ietu i tomo, e i roto i te hiero ta Ietu i tamā, i to tātou iho parau.

Tera Ietu tei ora i roto i te haehaa faito ore, teihea roa oia i teie mahana, *tei roto anei i to tātou oraraa, aore ra ua vaiiho noa hia e tātou i nia i te poromu...*

E hoa here ma,

Teie te reo o te papai Taramo 118/ 19-20 :

“ A iriti na iau i te mau uputa parautia ra; e tomo vau na reira, ma te haamaitai ia Iehova ra. O te uputa teie na Iehova e na reira te feia parautia i te tomo”

Mai te mea, e farii tātou i teie huru aratairaa manaò eita e ore e, ua faahaehaa Ietu iana, ia farii atu tātou ia tomo mai oia i roto i to tātou oraraa e ia farii atoa hoi tātou ia tama oia ia tātou, a riro atu ai hoi tātou ei oire moa e ei hiero parahiraa no te varua o te Atua... I Torinetia pene 1/ 16 :

“Aita outou i ite e, o te hiero outou o te Atua e te parahi ra te varua o te Atua i roto ia outou na”

Oia mau, no te apee ia Ietu i roto i teie hepetoma moa e haamata nei, mea faufaa roa ia apee tātou ia Ietu, ia au i te huru no te feia tei ite e, aita Ietu i rapae, tei roto ra i to tātou oraraa, e te òhipa noa nei no tātou.

No reira, i teie hepetoma, ia itoito tātou i te amui raa atu i roto i te feia o tei faariro i te mau iui o te Fatu, ei mau iui atoa no rātou, no te faaara, i te faaroo e te turai i te tiaturiraa i mua.

Ei opaniraa : Apotarupo 3/ 20

“Inaha te tia noa nei au i te uputa te patoto atu nei ; ia faaroo mai te hoê taata i tau reo, e ua iriti i te opani ra e haere atu vau i roto iana ra...

TEHAHE Orometua

Hepetoma-moà 1995

Monire 10 no eperera

Taioraa : Mataio 26, 69-75 (irava 73)

**"... Ua na ô maira tei tià i pihai ihora ia Petero,
No ratou mau â oe, ..."**

Aita o Petero i hinaaro, no to na riàrià i te pohe, ia itehia e e taata o ĩa no Ietu. Aita râ e raveà. Noa atu to na tapuniraa ia ore o ĩa ia itehia, aita o Petero i moè i te mata taata :

"... No ratou mau â oe, ..."

E parau teie tei hinaaro i te faahoi faahou ia Petero i roto i te pupu taata no te Metia o ta na i haapae no to na mataù rahi i te pohe. E parau tei hinaaro i te hoê haapapûraa no roto mai ia Petero e, no te Metia faahou râ anei o ĩa i teie nei e aore ĩa e ere ! E uiraa te tià atoà ia tatou ia ui ia tatou iho i teie mahana, i te mea e, e ere te faïraa ia Ietu ei ora no tatou, i te hoê ohipa o te ravehia i te hoê noa mahana, i te mau mahana atoà râ i roto i te parau no te taviniraa : "No Ietu noa râ nei anei hoi tatou. Aita râ nei anei hoi tatou i tau i te pupu".

Ua tiàturi o Petero e, e tià ia apeechia Ietu na te atea ê e, e ere i te mea fifi ia tavinihia o ĩa ma te aau-piti. Eita atoa e ore e, ua manao o Petero e, ua hau aè o ĩa i to na mau taeaè-pipi : o ratou, ua faarue mai ĩa ia Ietu, o ĩa anaè, i roto i to na mau ati pohe, areà o ĩa ra, o Petero, tei reira ĩa i te hio-noa-raa atu ia Ietu. Aita râ o ĩa e haamanaò ra e, tei faarue ia Ietu e tei ore i faï i to na faaroo ia Ietu, hoê â ĩa ratou huru. Eita e tià ia tatou ia parau e, e taata tatou no te Metia ma te huna i to tatou faaroo e i to tatou tiàraa. Eita e tià ia tatou ia parau e, e taata tatou no te Etaretia ma te ore e horoà i te hoê mau tapaò tei haapapû i to tatou tiàraa. Eita atoa e au, i muri aè i to tatou faïraa i to tatou

faaroo, ia mamû noa i mua i te hoê mau ohipa-tià ore e tupu noa ra i mua i to tatou mata.

E au ra e, te hinaaro ra teie nei parau i te faahaamanao ia Petero i to na tiàraa e, no te tupuraa o te Hau o te Atua i nià i te fenua nei, i titauhia ai o ĩa mai to na atoà ra mau taeaè, ia riro ei auvaha-parau. Aita te Etaretia i titauhia no te hio-mata-noa i te mau ohipa e tupu ra i roto i teie nei ao, no te parau atoà râ.

I te taima i titauhia ai o ĩa ia haapapû i to na tiàraa mero no te pupu taata o te Metia, e toru taima, teie te reo o Petero, e toru atoa taima : "E ere au i to taua pupu ra, e ere au i te taata no Ietu". I te aaoaraa a te moa o tei faahamanao ia na i te parau a Ietu e, "Eita te moa e aaoa, a toru atura o oe hunaraa ia'ù", ua itehia o Petero i te otoraa. No teie taima, aita i tià ia Petero i te faaite e, e taata mau o ĩa no te Metia, i te mahana Penetetote râ, ia ĩ o ĩa i te puai no te Varua-Moà, eita o ĩa e mataù faahou i te pohe e i te faaite i to na tiàraa mau : e pipi na Ietu.

Jacques IHORAI
orometua

Mahana piti 11 no eperera

Taioraa : Mataio 27, 1 à 14 (irava 14)

"... Aita roa râ letu i parau noa atu i taua mau parau atoà ra, ..."

E mea varavara tatou i te iteraa ia letu i te riroraa mai te hoê vâvâ ra te huru ! Ia uihia o ĩa i te hoê uiraa, te pahono nei letu. I ô nei, i mua i te mau pariraa tià-ore a te mau aratai no te faaroo ati-luta e i te uiraa a Pirato, ua parahi mamû noa letu. Ahiri e, o tatou aè terâ e parihia ra e e faahapahia ra, e parau papû maitai e, eita tatou e mamû-noa-raa, e pahono râ tatou no te faatià ia tatou e no te paruru ia tatou. Teie râ, i roto i ta tatou taioraa i teie ahiahi, e ere o tatou o letu. No reira, i mua i te uiraa a te Tavana e haava ra ia na, ua faaea muhu ore noa letu !

No te aha râ letu i faaea muhu ore noa ai letu, o ĩa te hoê taata tei ore i mataro i te faaea muhu ore noa. E tià paha ia parauhia e, piti tumu papû maitai i faaea muhu ore noa ai letu i mua i te mau pariraa a te mau ati-luta e a Piratāhahi : no te mea, aita te mau ati-luta oia hoi te mau aratai no te faaroo ati-luta e hinaaro ra i te tauà-parau e o letu ; A piti : no te mea, ua faaoti aè na ratou (e o Pirato) i te faautuà ia letu i te utua pohe.

A tahi : Aita te mau ati-luta e hinaaro ra i te tauà-parau e o letu : Oia mau. Ahiri e, e hinaaro mau to ratou i te tauà-parau, e vaiiho ĩa ratou ia letu ia paruru ia na, e farii atoà ĩa ratou i te haapae i te mau pariraa haavare o ta ratou i hamani no te turairaa ia letu i roto i te pohe. Aita hoi ratou i tià mai i te vahi haavaraa no te faaroo atoà i te parau, ia faaroohia mai râ ta ratou anaè parau. Aita ratou i haere mai i te haavaraa no te upootiàraa o te parautià, no te manuiaraa râ o te parautià-ore. I mua i terâ huru faanahoraa, e mea maitai aè ĩa e mamû ...

A piti : Inaha hoi, ua faaoti aè na ratou i te haapohe ia Ietu : Eaha iā te ohipa te nehenehe ia Ietu ia pahono : ua faaotihia aè na to na parau hou te tuatapaparaa. To na tiāraa mau, e mea namua te tuatapapa a nehenehe atu ai e raveà i te hoê faaotiraa. I teie i to Ietu, e mea na mua te faaoti a tuatapapa atu ai. I mua i te reira huru faanahoraa, e mea maitai aè iā ia Ietu ia mamû ...

Ahiri te mau parau i tuuhia atu i niā ia Ietu i riro ei uiraa mau, e tiā roa ia Ietu ia pahono. No te mea râ e pahonoraa tei tuuhia atu i mua ia Ietu, e ere râ i te uiraa, e nahea iā e tiā ai ia Ietu ia pahono atu i te mau ati-luta e ia Pirato. Aita râ teie mamû-noa-raa no Ietu i riro mai te tahi pau o te hoê taata i roto i te aroraa, ua riro râ mai te hoê puai, mai te tahi hohoà pahonoraa i te hoê ohipa tiā-ore e faatupuhia ra. No teie taimē, e ia au i te huru o te tereraa o te haavaraa e arataihia ra e Pirato, e mea maitai aè ia te mamû i te pahono. Te vai ra râ te taimē, e parau faahou ai Ietu, ia ineine anaè te aau taata no te faaroo faahou i te parau no te Hau o te Atua. Ia riro râ teie huru i to Ietu ei hioraa atoa na tatou i teie mahana, ia ite tatou i te taimē e au ai ia tatou ia parau e i te taimē atoa e tiā ai ia tatou ia faaea muhu ore noa ... no te upootiāraa o te parautiā !

Jacques IHORAI
orometua

Mahana toru 12 no eperera

Taioraa : Mataio 27, 15 à 30 (irava 22)

"Ua parau atura ratou atoa ia na, la faatataurohia ia."

No te paruru i te taata i te parautià-ore i haamauhia ai te Ture, ia ite te taata i te otià no te mau ohipa te tià ia na ia rave ma te faatura atoa râ i te tiàmâraa o te tahi ê atu. I roto i ta tatou tumu parau no teie pô, aita te Ture i riro faahou ei paruru i te taata i te parautià-ore, ua riro râ ei mauhaa no te tupuraa o te parautià-ore. Aitâ atoà te Ture i riro faahou ei tapao-aratai no te hoê oraraa oaoa e te parautià, ua riro râ ei turu papû no te pôuri e ore ai te taata e ite faahou i te taaêraa i rotopû i te parautià e i te parautià-ore, i te maramarama e i te pôuri, i te parau mau e i te haavare, i te maitai e i te ino ...

"A tuu mai ia Parapa !" oia hoi i te taata rave hara e "A faatatauro atu ia Ietu !" oia hoi i te taata hara-ore, te reo pii ia o te nunaa i te mahana i haavahia ai Ietu. Ua haapapû te nunaa i taua mahana ra i te pae i maitihia e ana : te pohe ! Te mau faanahoraa i haamauhia no te hoê oraraa oaoa e te parautià, aita ia i faatura-faahou-hia. Ua ino roa te faanahoraa hoê â inoraa e te feia atoa i haamau i te faanahoraa. Te huiraatira e te nunaa, ua tuati roa ia i taua mahana ra no te paruru maitai i te parautià-ore i mua i te parautià. Aita te huiraatira e te nunaa i ani ia Pirato ia faateahia Ietu i te oraraa totaiete mai ia Parapa, ua faaoti râ ia tatarahia e ia faaore-roa-hia te parau no te oraraa o Ietu i rotopû ia ratou.

"Ia faatataurohia tena taata !" E tapaò faaararaa teie ia tatou i te ohipa riàrià o ta te patoiraa i te Atua e i ta na Parau o tei riro mai ei taata, e faatupu nei i roto i te oraraa amui o te hoê fenua e o te hoê nunaa, mai ta tatou e ite noa nei â i teie mahana i rapae ia tatou e i ô nei iho, i pihai iho roa ia tatou.

Te riro ra te huiraa e te nunaa i ô nei mai te Atua ra te huru i te faturaa i te oraraa o te taata, mai te mea e, tei ia ratou te parau no te ora o te taata. E ere o tatou te fatu o te taata e o to na oraraa i nià i te fenua nei. O te Atua râ. E to te te Atua hinaaro i te taata e no te taata mai te matamua mai â, o to na ia ora ! I hamanihia ai tatou e te Atua, eiaha no te pohe, no te ora râ !

O te faaiteraa ia ta Ietu i rave i te anotau o to na nohoraa mai i rotopû ia tatou : na roto i te ohipa e te mau tapao o ta na i rave i roto i te oraraa o te taata, ua haapapû Ietu i te upootiàraa no te ora i nià i te pohe e te haamataraa o te hoê apî tei reira mau te parautià i te vai-mau-raa. No taua tapura ohipa ra, ia au i ta tatou taioraa i teie pô, i ririhia ai e i faaoti ai to na mau enemi, i mua i te maitiraa o ta Pirato i tuu atu i mua ratou : "Ia faatataurohia tena taata !" oia hoi : "Ia taparahi-pohe-roa-hia tena taata !"

Jacques IHORAI
orometua

Mahana maa 15 no eperera

Taioraa : Mataio 27, 57 - 66 (irava 55, 57)

"E rave rahi hoi te vahine i reira ... E ahiahi ihora, ua haere maira te hoê taata taoà".

I te taima i pohe ai Ietu i nià i te tatauro, te faahiti-faahou-raa-hia te parau o Maria i Matatara mâ e o Iotefa no Arimataio. Mai te huru e, no te faahaamano ia tatou e, eita te pohe e riroraa ei opani i te ohipa i haamatahia e te Fatu i nià i te fenua nei, e riro râ o ĩa ei puai no te faahaere atu â i te faaiteraa i te parau no te ora i mua. Ua pohe mau Ietu i nià i te raau tarava, te hotu râ no te ohipa i haamatahia mai e ana ua itehia ĩa i taua mahana ra i Toratota !

Inaha hoi, te na ô ra ta tatou tumu parau i teie pô e,

"Tei reira hoi te hoê mau vahine i faaroo ia na i te taima i pii ai o ĩa e: "Ua oti", na reira atoà hoi te hoê pipi ana i te taima i pohe roa ai Ietu. Ei tapao faaite e, te ohipa i pûpûhia mai e te Metua e, na te Tamaiti e rave, ua ravehia ĩa e te toe nei i teie nei te haaparareraa i na poro e maha o te ao nei.

Teie râ, ia hiohia te huru o taua mau vahine ra e o Iotefa no Arimataio i taua mahana ra, mai te mea ra e, ua tiaturi mau ratou e, e eita Ietu e tia faahou mai. Oia atoà te mau aratai o te nunaa ati-luta.

Te ite ra ĩa tatou i ô nei i te tiaturiraa puai o te taata i te parau o te pohe o tei aahia i roto i te aau : ua pohe anaè te hoê taata, eita ĩa o ĩa e tià faahou mai i nià e eita atoa e hoi faahou mai na te menema i te utuâfare. O te tiaturiraa ĩa o ta na mau pipi, o te mau vahine, o Iotefa no Arimataio e o te mau upoo faatere o te nunaa i te mahana poheraa.

I teie mahana, tei roto o Ietu i te menema o Iotefa no Arimataio, areà râ tana poroiraa i tana mau pipi, hou to na poheraa, te na ô ra ĩa : "E pohe rahi to te Tamaiti a te taata nei, e faaruèhia e te feia paari, e te mau tahuà rarahi, e te mau papai-parau, e e taparahi-pohe-roa-hia, e e tià faahou ia tae i te rui toru".

Jacques IHORAI
orometua

FAAITOITORAA NO TE TAPATI TIAFAAHOURAA

(Tapati 16 no Eperera 1995)

Taiòraa : Mataiao 28/ 1-10

**E haamaità i te Atua, e faahanahana i to na iòà, o ia i
faatiàfaahou mai te pohe mai, i te Metia, te Tamaiti fanautahi, te
Ora no te mau nunaa atoà.**

TE ORA I TE VAHI NO TE POHE

I teie poi-poi no teie nei mahana matamua no te hepetoma, i faaite ai te Atua i to na mana rahi. Ua maheu te menema, ua aueue te fenua, ua hurihia te òfai rahi i te ùputa o te menema, e ua itehia te ora i te anaanaraa i te vāhi no te pohe. Aue te puai no te mana o te Aroha o te Atua, tei faaite e tei faatupu i te ora i te vāhi puhaparaa no te pohe e tei horoà i te tino âpī e te tahuti òre ia na o tei Tiàfaahou.

NA ITE MATAMUA NO TE TIAFAAHOURAA

E, e mea na roto i te mata e te tiàturiraa o na vahine toopiti nei, o ta Mataiao e faahiti ra i roto i ta tatou taiòraa, o ia hoi, o Maria i Matatara e te tahi atu Maria, to tatou iteraa i teie ohipa maere e te òaòà rahi o ta te Aroha o te Atua i rave e i faatupu i teie poi-poi no teie nei mahana matamua no te hepetoma.

Te vāhi faufaa toà o teie nei nau vahine, o te mea ia e, o raua atoà o tei ite ia Iotefa Arimataio i to na tuuraa i te tino pohe no letu i roto i te menema (Mataiao 27/ 57-61). Ua riro raua ei ite no te hunaraahia te tino no te Fatu i te ahiahi a pohe ai oia ra, e inaha i teie poi-poi roa te riro nei à raua ei na ite matamua roa no te tiàfaahouraa no to tatou Fatu e to tatou Faaora o letu Metia.

E parau mau, aita o Maria mā i ite e eaha mau na te ohipa i tupu i roto i te menema. E ia au i te faatiàraa a te mau Evaneria, aita roa atu te hoê taata i ite i te reira. Eita e òre e, e te faaite maira te reira ia tatou e, e te ohipa o tei ravehia e te mana no te Aroha o te Atua e mea hohonu ia, e o te òre roa e taeàhia e te ite e te maramarama o te taata. E e na roto anaè i tona tiàturiraa e to na faaroo e ite ai te taata e e ite atoà ai tatou e te hui faaroo i te ohipa rahi o tei ravehia e te Atua i teie poïpoï no teie nei mahana matamua no te hepetoma.

TE NATURA TEI RIRO ATOA EI ITE NO TEI TIAFAAHOU

I te ômuaraa no ta tatou taiòraa no teie mahana, a taa noa atu ai te parau no te tere o Maria mā i te menema, te ite atoà nei tatou i te tahi mau ohipa maere e tupu ra. Te āueueraa o te fenua e te vai atura mai tei itehia i te taima a pohe ai te Fatu i nià i te raau tarava no Toratota (Mataio 27/ 51). Ei tapaò faaite ia tatou e, e mai te mea, e ua âmui te natura i roto i te peàpeà, te òto, te mauui e te pohe no te Fatu i nià i te raau tarava i taua ahiahi ra, te amui atoà nei ia i teie poïpoï i roto i te òaòà no te tiàfaahouraa no Ietu Metia, te Faaora o teie nei ao. E ua riro te Merahi o tei pou mai mai te raï mai, ei faaiteraa i te rahi e te ànaàna no te òaòà o te natura i teie poïpoï, e aita roa te hoê ohipa e mau i mua i te reira, te ôfai i mua i te menema ua huri ê hia ia.

E i roto i te Faufaa Tahito, ua riro ia te âueueraa fenua ei tapaò faaiteraa i te mau ohipa mana e tei ravehia e te Atua.

TE MERAHI, NO TE FAAITE IA I TE ORA

E mai ta tatou i ite, i te ômuaraa no teie nei Evaneria na Mataio (1/ 20), na te Merahi i faahei taòto ia Iotefa no te faaite iana i te Parau Apī òaòà no te fanauraa no te Metia te ora o teie nei ao. E inaha, i ò nei i mua i te menema, te tià mai nei à te Merahi a te Atua, no te faaite ia Maria mā e ua tiàfaahou te Metia, aita faahou o ia i roto i te menema. E mai te mea ra, te ite atoà ra te Merahi e, ua ite teie na vahine i te vāhi i tuuhia ai te tino o te Fatu, i parau ai o ia ia raua e : "a haere mai na a hiò i te vāhi ...".

Ua riro atoà teie reo no te Merahī, ei titauroa i teie nau vahine, eiaha no te hiò i te Fatu ia tià mai mai roto mai i te menema, no te hiò rā e no te haapāpu atoà e ua tià mau te Fatu mai te pohe mai, e ua faaruè mau oia i te menema, te vāhi no te pohe. E te mea o ta raua i faaroo mai roto mai i te vaha no te Merahī e te ohipa o ta raua i ìte i roto i te menema, ua faatupu ia i roto ia raua i te hoê ohipa taaê e te maere rahi o ta Mataio e faahiti ra i te irava 8. Te mataù e te òaòà, ua ānoì noa ia e ua tupu âpipiti noa i roto i to raua aau. Auē ia ohipa i te huru ê e te maere rahi. E na roto i to te Merahī pouraa mai i teie nei poipoì i te menema, te ìte atoà nei tatou i te huru no te mau tiaì o tei tonohia mai e te mau Tahuà Rarahī e te mau Faritea, na roto i te faatiàraa a Pirato, no te tiaì i te menema. Ua î roa ratou i te mataù e ua riro mai te taata pohe ra te huru. O te huru mau teie, e hoa here mā, no te taata o tei ore i tuu i tona tiàturiraa i roto i te Atua, te Tumu hoê roa no te ora. E o to tatou atoà ia huru, e hoa here mā, ia ore tatou ia farii e ua tiàfaahou te Fatu mai te pohe mai, e ia òre hoì tatou ia tuu i to tatou tiàturiraa i roto i tona tiàfaahouraa e oia anaè o te faaâpī i te mau mea atoà.

O Maria mā, o raua o tei tāpapa mai i te menema i teie poipoì roa, o raua na ìte matamua roa no te ohipa maere rahi o ta te mana e te puai no te Aroha o te Atua i faatupu, ua farii raua i teie parau âpī òaòà no te tiàfaahouraa no te Metia e ua tuu raua i to raua tiàturiraa taatoà i roto i to na Tiàfaahouraa. I peepee ai raua i te haere e faaite i te mau pipi i taua parau âpi ra ia au mai ta te Merahī i parau atu ia raua. E inaha, tei nià raua i te èatià, te haere mai nei Ietu e farerei ia raua, e aroha maira raua na ô maira : "Ia ora na".

E hoa here mā, e taimè faufaa rahi teie, i roto i te parau no te farereiraa e te ìteraa ia Ietu i muri aè i to na tiàfaahouraa. O teie nau puè vahine o tei ìte matamua roa i te huru no te Fatu, i muri aè i na ruì e toru no to na parahiraa i roto i te menema. E hau roa atu te faufaaraa no teie nei farereiraa no raua i te Fatu o tei tiàfaahou, i te mea ia e, o te Fatu iho o tei haere mai e farerei ia raua i nià i te èatià. Auê ia parau i te òaòà e. Ei faaiteraa te reira ia tatou e te mau Maru Metia e, i te taimè tatou e tuu ai i to

tatou tiàturiraa taatoà i roto i tona Tiàfaahouraa, o te taima atoà ia e haere mai ai te Fatu i rotopū ia tatou.

E na roto i ta na tonoraa ia Maria mā, no te haere e faaite i ta na mau pipi e haere i Tarirea ei reira ratou e ite ai e e farerei ai ia na, te hinaaro atoà nei te Fatu e tono atoà ia tatou, i teie nei mahana ; tatou tei faī e o letu Metia to tatou Fatu e to tatou Faaora ; i te feiā atoà o tei òre e tiàturi faahou ia na, tae noa atu i te feiā o tei òre i ite ia na. Te faarooraa ia na, o te fariiraa atoà ia i ta na tonoraa ia au mai ta na i tono i ta na mau pipi i te pae hopeà no teie nei pene parau (irava 19-20) i te na ôraa e : "E haere outou e faariro i te mau fenua atoà ei pipi na u, ma te papetito atu ia ratou i te iòa no te Metua, no te Tamaiti, e no te Varua Maitai, e ma te haapii atu ia ratou i te mau parau atoà o ta ù i faaite atu ia outou na. E inaha, tei pihai atoà iho vau ia outou e tae noa atu i te hopeà o teie nei ao ".

No reira, e hoa here mā, te ite ra tatou, i roto i ta tatou taiòraa no teie mahana, i teie nei tonoraa na te Fatu i te feiā atoà o tei faaroo ia na. E òre roa ai e tià ia tatou ia tapeà noa i teie nei parau no te Tiàfaahouraa no tatou anaè, ua titauhia rā tatou ia faaite e ia poro i te reira i te mau taata atoà. Ua ineine ra anei hoi tatou tataitahi. I te mea hoi e, e titauroa e e tonoraa atoà teie i te taata tataitahi, ia haere na te mau vāhi atoà no te haapii e te poro i te Parau Apī òaòà no te Evaneria a te Fatu.

Na tatou te reira e rohi, e na tatou atoà e faaitoito, ia hanahana te iòa o te Fatu o tei Tiàfaahou. Ia ora na.

Thierry TAPU
orometua

TE REVARAA O TE FATU

(Mahana maha 25 no me 1995)

Òhipa 1,1-11, ir. 11

"E te mau taata o Tarirea nei, e aha òutou i tià noa ai e tiàtonu mārō i te raì ra ? O Ietu nei ā, tei ravehia aè nei i nià i te raì, e hoì mai ia mai te reira atoà ra, mai ta òutou i ìte atu ia na i te revaraa atu i nià i te raì ra."

Ei ômuaraa, ia ora na i te Aroha o te Fatu i to tātou fārereiraa i teie mahana tei faataahia e te Hui Faaroo Teretetiāno no te haamanaò i te tahi òhipa tei tupu na i muri aè i to te Fatu tiàfaahouraa mai te pohe mai ; e mahana haamanaòraa teie i te "rave-ê-raa-hia te Fatu i nià i te raì", papaa parau tei mātaroa e tātou i te pii : Te Revaraa.

I roto i te Pipiria, o Ruta anaè teie e faatià nei i te parau no te Revaraa o Ietu, inaha, ua ôpani o Mātaio i ta na pāpai èvaneria mā te parau no te tonoraahia te mau Pipi (Mātaio 28,16-20), ua tāōtià hoì o Māreto i ta na èvaneria i nià i te parau no te tiàfaahouraa (Māreto 16,1-8), e ua haamairi roa hoì o Ioane i te parau no te Revaraa mā te haapāpū e : "E rave rahi ā ta Ietu peu i rave, ahiri i hope atoà i te pāpaihia, te manaò nei au, e òre e tià i to te ao nei ia fārii mai i taua mau puta ra, ahiri i pāpaihia." (Ioane 21,25) E aita atoà hoì te mau èpitolore o te Faufaa Āpī i àimārō no te faatià i teie Revaraa, aore a rātou e muhu, aore a rātou e parau no te huru o te tupuraa o teie reira òhipa. Ta rātou rā parau rahi teie ia :

- "e hoì mai ā te Fatu mai te raì mai" (I Tētāronia 1,10 ; 4,16) ;
- "oti aè ra ta tātou hara i te tāmāhia e ana, parahi iho ra i te mau raì i te àtau o te Atua ra" (Hēpera 1,3) ;
- "i faateitei roa atu ai te Atua ia na, e ua horoà hoì i te iòa i hau ê i te mau iòa atoà (...) ia fāi te mau vaha atoà, e o Ietu Metia te Fatu, e hanahana atu ai te Atua Metua" (Firipi 2,9-11).

No reira o ta tātou atoà, eiaha ia e haamāuà i te taime no te tuatāpapa i te huru no te tupuraa teie Revaraa, e tāuà māite rā tātou i teie nā Taata Āhu Teatea e parau nei i te mau Āpotetoro, e ia tātou atoà : "E te mau taata o Tarirea nei, e aha òutou i tià noa ai e tiàtonu mārō i te raì ra? O Ietu nei ā, tei ravehia aè nei i nià i te raì, e hoì mai ia mai te reira atoà ra, mai ta òutou i ìte atu ia na i te revaraa atu i nià i te raì ra."

1. Te taata faaroo, te raì e te fenua nei

Nā roto i te Òhipa, ia au i te tītauraa a Ietu Metia ia poro-haere-hia te Èvaneria na te mau fenua atoà (Òhipa 1,8), te fānaò nei tātou i te

mau paraparau no te mau òhipa o te Èvaneria tei òmuahia mai e te mau Àpotetoro i Ierutarema (Òhipa 2-5), e i muri mai i Tāmāria e Iutea (Òhipa 8,1), i Tupero e Tīria (Òhipa 11,19-20), i Âtia Nāinaì e te fenua Hereni (Òhipa 13-18), e tae noa atu i Rōma (Òhipa 28,16-31). No reira i te òmua-roa-raa o teie puta, te faarahia mai nei tātou "eiaha e tiātonu mārō i niā i te raì", e tiātiā rā nā te fenua nei mā te Faatupuraa Parau Èvaneria e mā te tiaituru i te hoì-faahou-raa mai o te Fatu.

I te òmuaraa atoà o teie puta, te haamanaòhia mai nei tātou "eiaha e moemoeā i te ìte i te taime e te ànotau no te tupu-hope-roa-raa mai te Pātireia o te Atua", e rohi rā no to na tupuraa i te Nāuaneiraa ra, i teie-nei-raa ra, nā roto i te poro-haere-raa i te Parau o teie Pātireia, oia o Ietu Metia. I ô nei, te faahiroàroàhia mai ra, e i roto i to tātou oraraa tāvini, e TAATA tātou, eere rā i te mau àere atua (Tenete 3,5), e eere atoà hoì tātou i te nuu merahi, e taata rā.

Aita te tōroà Àpotetoro i faaatua, e aita atoà i haamerahi ia Petero mā. Te tauturu nei teie tōroà i teie mau tāvini ia fārii ia Ietu ei Fatu e ei Metia (Òhipa 2,36), e a tāvini atu ai mā te ida o Ietu Metia e mā to rātou TAATARAA (Òhipa 3,6). Aita atoà te tōroà Àpotetoro e faautuā nei ia Petero mā ia fetu nā roto i to rātou anaè pūai taata, e aore ra to rātou anaè māmarama taata, òi hape hoì rātou e o tātou atoà hoì, e te Parau no te Pātireia, o te hoê ia òhipa tei òpua-noa-hia e tei manaò-noa-hia e te taata nei. Te tumu ia i haamatara ai o Ruta i te parau no te Vārua Moà i roto i teie pene matamua no ta na puta oia hoì, ei haamanaò-faahou-raa ia Petero mā e ia tātou atoà e, ei Vārua no ô mai i te Metua ra nā roto ia Ietu Metia, e tiaì i te taata faaroo nei ia haaparare i te Parau o te Pātireia.

Ia òre te Vārua Moà ia òhipa i roto i te taata, eita atoà ia te Parau no teie Pātireia e haaroàroàhia, e e faarooia i niā i te fenua nei. No reira, te Fatu i parau ai i ta na mau Àpotetoro : "Eiaha òutou e haapeapeà no te taime e te ànotau e tupu hope roa mai ai te Pātireia, ta òutou rā e faaitoito, o te faaòhiparaa ia i te mau maitaì atoà e horoàhia mai ra e te Vārua Moà no teie Pātireia." Te maitaì hau ê e horoàhia mai nei e te Vārua Moà, o te faaroo ia o te Metia (Taratia 2,16), no te mea na te faaroo o te Metia e faaò i te taata i roto i teie Pātireia, e te taata e ò atu i reira, e TAATA ÂPĪ ia, e òre hoì te TAATA TAHITO e ò i roto i te reira ao.

Ia ui rā hoì tātou : E aha te faaroo o te Metia ? Mai te peu e ìmi tātou i te pāhonoraā nā roto i te nātura, nā roto i te mau faaapu taro, nā niā i te raì, nā roto i te moana, eita ia e ìtehia ia tātou, no te mea tei roto te pāhonoraā i te Pīpīria, o o ia atoà hoì te tahi fenua o te taata faaroo. Te faaroo o te Metia, to te Atua ia fāraa mai i te taata nei nā roto i te Metia ra ia Ietu e te Vārua Moà (Firipi 3). E i roto i taua

fārereiraa ra, i reira e rahuhia ai te Taata Âpī, te Tamarii Tāvai, e o o ia tē pāhono mā te tauturu a te Vārua Moà, i te Atua e : "E Âpa, e ta ù metua" (Taratia 4,6).

Teie fārereiraa o te Atua e te Taata mā te Metia, o te Tenete ia o te Taata Faaroo. Oia mau, e hopoi teie fārereiraa i te taata i te RAÌ TUATORU (II Torinetia 12,1-4), eita rā teie fārereiraa e faatārere ia tātou ia tautau hānoa nā te reva o te raì a ora moemoeā noa atu ai tātou, inaha, e faahoì mai o ia ia tātou i nià i te fenua nei. Eita atoà hoì teie fārereiraa e fārii ia pātiahia te hoê fare àutā (Māreto 9,5-7) a ora tādotoōā noa atu ai tātou, te faatiāmā nei rā o ia ia tātou ei mau ìte no Ietu Metia, e ei mau tāvini no te mau taata atoà e ora nei I NIÀ I TE FENUA NEI.

2. Te fārerei-faahou-raa i te Fatu

Oia mau, tei rōpū i te mau raì e te fenua nei teie fārereiraa faaora e faatupuhia ai e te Atua no te Taata mā te Metia e te Vārua Moà, e tei nià hoì i te fenua nei to te taata tītau-raa-hia e ora i to na faaroo mā to na taataraa. Ia tāuà-māite-anaè-hia rā ta tātou taiòraa no teie mahana, e ia heheu-maitai-anaè-hia ta tātou ìrava (Òhipa 1,11), teie ia te tahi tiàororaa e tāvevo mai nei : Ia àfai te Fatu i te mata o te taata faaroo i nià i te raì, e tià mai e piti tau puè "Taata àhu teatea" no te faahoì faahou mai te mata o teie taata faaroo i nià i te fenua nei, ei ārai eiaha o ia ia riro ei pou miti mai te vāhine a Rota. Mai te peu rā eere na te Fatu i àfai i te mata o te taata i te raì ra, tià noa mai ā teie nā taata no te faahoì mai i te taata i nià i te fenua nei, eita rāua e tāuàhia, e faaoohia rā rāua, e haavahavahahia rāua.

I te rahiraa o te taime, tei nià to tātou mata i te mau raì tei tāmuthia e tātou, e hau roa atu, te hāmani atoà nei tātou i te Patu no te paùma roa atu i nià i taua mau raì ra (Tenete 11,1-11), no te mea tei reira te hāputu-raa-hia e tātou ta tātou mau moemoeā faahinaaro i te huru atua. I roto i taua reva e hāmani-tādotoōā-hia nei e tātou, ua rau te mau raì nehenehe e te ruperupe atoà hoì : Te reira taata e to na mau raì, te reira pupu taata e to rātou mau raì mai te Raì-Hanahanaha, te Raì-Peretiteni, te Raì-Pāpaiparau, te Raì-Mana, te Raì-Faatere, te Raì-Faahua-Tāvini, te Raì-Iho-Tumu, te Raì-Hiroà-Tumu, te Raì-Moni, te Raì-Fare, te Raì-Pereò, te Raì-Parautūite, te Raì-Reva-Ori-haere, te Raì-Māramarama, te Raì-Âmaa-Òhipa, te Raì-Mātini, te Raì-Paka, te Raì-Àva, te Raì-Àvaàva, e te vai noa atu ra te rauraa o te mau raì oia hoì, te rauraa o te mau ìtoro. E a tae hoì e, eere atoà i te mea òhie i te faahoì faahou mai ia tātou i nià i te fenua nei.

E ia ui hoì te manaò : E tià ānei ia tātou iho, te taata faaroo nei, ia ora mā te HAAPAE ROA i taua mau raì ìtoro ra ? Ei āmaa pāhonoraa

: Eita e tià ia tātou iho, inaha, aore e hotu i nià i te fenua, aore e hotu i raro i te moana, aore e àravahi, aore e ìte, aore e tiàraa ètārētia, e aore hoì e rāau no te rapaau i teie mau mai hāmani raì maoti rā, o Ietu Metia anaè. I roto i te Oraraa Faaroo, e ora âpipiti hānoa te raì ìtoro e te Raì Âpī (Èfetia 2,5), e nā te fārereiraa i te Metia e faaiti i teie mau raì ìtoro, e na na atoà e faarahi i te Raì Âpī i faataahia no te Nūnaa Moà o te Atua (Àpotarupo 21,1; II Torinetia 4,16).

Tei tātou atu ra ia te faarooraa e aore ra te pātoiraa i te tiàororaa a nā "Taata àhu teatea" e parau mai nei : "E te mau taata o Tarirea nei, e aha òutou i tià noa ai no te hiò i te raì ? O Ietu i rave-ê-hia no te raì mai roto atu ia òutou, e haere mai o ia mai ta òutou i ìte ia na i te revaraa atu i te raì ra."

Na teie nā taata e faahoì mai i to tātou mata i nià i te fenua nei, na rāua e horoà mai i te tiaitururaa e e fārerei faahou mai te Fatu ia tātou. Teie nā taata, ei faataiperaa, ei faaauraa parau na e no tātou, o te Ture ia e te Èvaneria. Te ôpaniraa a te Ture, eita o na e tauì, mai ta na i faaìte na i te mau Àpotetoro ra, o te reira atoà ta na e parau mai nei ia tātou i teie mahana oia hoì : Eiaha tātou e reva atu i nià i te raì, no te mea eere tātou i te mau manu-atua, e taata rā tātou, i haamanaò ai ta tātou ìrava : "E te mau taata o Tarirea".

Ta te Èvaneria parau, eita atoà o na e tauì, mai ta na i parau na i te mau Àpotetoro ra, o te reira atoà to na reo ia tātou i teie nei oia hoì : Tei fārerei i te Metia ra ia Ietu no Nātareta, e fārerei ā ia o ia i to na Fatu, i parau ai ta tātou ìrava : "E hoì mai ā o ia".

3. Ei faaitoitoraa

Nā roto i te parau no te Revaraa o te Fatu e himene-rituria-hia nei e tātou, te haamanaò mai nei teie taidraa pīpīria e e feiā hāmani raì atoà tātou mai te mau taata atoà o teie nei ao, e a tirā noa atu rā, te vai nei to tātou nau hoa tauturu, oia teie nā "Taata àhu teatea".

Tāmuta noa atu ā tātou i terā mau raì moemoeā, na rāua e faahoì mai ia tātou i nià i te fenua nei no te pure, himene, ârue i te Atua o te Metia, taiò i te Pīpīria mā te tūrama a te Vārua Moà, poro i te Èvaneria, pāpetito i tei ani mai, faatiā i te Ôroà a te Fatu, rohi i te haapiiraa faaroo no te mau tamarii, te feiā âpī, te feiā paari mā te tiaituru e e fārerei-faahou-hia mai tātou e te Fatu.

Te manaònaòraa rahi e vai nei i roto ia tātou, o te vai-ara-raa ia òre te taata ia haamori i te Revaraa o te Fatu, ia riro rā te reira papaa parau ei haamanaòraa e aita te taata faaroo e tītauhia nei e haamori i te raì,

ua tītauhia rā o ia ia ora i to na faaroo i nià i te fenua nei, inaha, te fenua, o te vāhi ia e taata to reira, e te hinaaro nei te Fatu ia fārii te mau taata atoà o te fenua nei ia na ei Faaora e ei Fatu no rātou.

I te tahi taime, e paruparu atoà tātou, e fiu tātou, e riri tātou, e taahoa tātou, eita e òre i te reira taime ra, ua mau ia to tātou mata i nià i te raì i hāmanihia e tātou. Na tātou rā e faaitoito i te faaroo i te reo o te Ture e te Èvaneria, no te mea te mau tāviniraa atoà ta tātou e ora nei i nià i te fenua nei mā te ida o te Fatu, o ta tātou ia te reira pāhonoraa i ta na tītauraa, oia i faatiāmā ia tātou i te mau òhipa iino. Mai tāvini anaè ia mā te òaàa e te hau, inaha, o o ia tei upootià no tātou te feiā hara nei.

Ei ôpaniraa i teie maa aòraa iti, e reo ia no te Pāpāi Taramo 2 : "O tei parahi i nià i te mau raì ra, tē àta mai." Ia haamaitai mai te Fatu ia tātou e haa nei no te mau taata atoà i nià i te fenua nei. Âmene.

Antonino Tihiri LUCAS, Pipi Òrometua.

TAPATI PENETETOTE

(Tapati 4 no Tiunu 1995))

Taiòraa : Ioane 14/ 15-21
Ohipa 2/ 1-11

Irava tumu : Irava 11 : "Te faaroo nei tatou ia ratou i te faaite raa i roto i to tatou iho reo i te mau ohipa faahiahia a te Atua".

E hoa here mâ to te huifaaroo nei,

Ia ora na i to tatou farerei raa i teie tapati huru taaê rii no te mea i teie tapati e faahaamanao faahou ai te mau teretetano atoà no teie nei ao i te parau no te oro'a Penetetote. E no reira i teie nei mahana, mea maitai tatou ia ho'i i roto i te aai no teie nei oro'a no te mea na te aai no taua oro'a e horo'a mai ia tatou i te hoê auraa hohonu i nehenehe roa'i teie nei oro'a i te faariro hia ei hoê o te mau oro'a tumu i roto i te mau Etaretia teretetano atoa no teie nei ao.

E nehenehe ia parau hia, ua tupu te hoê ohipa maere mau pae ahuru (50) mahana i muri iti noa ae i te parau no to Ietu tifaahou raa mai mai te pohe mai oia hoi ta tatou e parau nei te oro'a Pata. Tauga ohipa maere ra ua tupu ia i te mau taimé rii ropu no te tenetere matamua oia hoi te tau no te Etaretia matamua. Eaha hoi taua ohipa maere ra i tupu ? Teie ia, i te hoê poipoi i tairuru mai ai te mau Ati-Iuta atoa no terâ e terâ vahi mai i Ierutarema no te haapao â i te hoê o ta ratou mau oro'a mai tei mataro hia, ua faaroo hia te hoê haruru no te tahi mata'i u'ana tei farara mai i nia i te fare e putuputu hia ra e te mau apotetoro e taua haruru ra tei faaueue i to ratou fare, ua tau mai te arero maa mai te auahi ra i nia ia ratou, ua tau i to ratou huru e ua riro ratou ei mau taata api e ua parau ratou i te hoê mau reo êê ...

I teie poipoi, te horo'a mai nei ta tatou taio raa no te puta ohipa i te aratai raa no taua ohipa ra i tupu, oia hoi ua pou mai te Varua Maitai i nià i te mau apotetoro, o taua varua ra ta Ietu i poro'i mai ia ratou i roto i ta tatou taio raa no te Evaneria a Ioane

14 Irava 17. E nehenehe e parau hia, na taua Varua ra ta te Fatu i poro'i i ta'na mau pipi i horo'a i te hoê puai taaê mau tei tura'i ia ratou ia haere i rapae i te vahi i mataro noa hia e ratou i te putuputu, na taua Varua atoa ra i faaitoito ia ratou ia parau i te mau parau e te mau ohipa i rave hia e to ratou Fatu. I teiepoipoi, ahiri pai i haruru mai te tahi ohipa i rapae noa mai i ta tatou fare pure, eita paha e ore vêtahi o tatou i te haere i rapae no te hi'o eaha ra taua haruru ra, eita'toa e ore e maere tatou e uiui atoa no te auraa o taua haruru ra.

Mea na roto mai i taua ohipa maere mau, i tupu ai te oro'a Penetetote matamua no roto i te tau no te Fatu tei haamau i te amuitahi raa faaroo matamua roa. Tei roto atoa i taua oro'a Penetetote matamua roa, i faaroo ai te mau taata paieti no te mau fenua atoa i te mau ohipa faahiahia a te Atua, i te faaite raa hia i roto i te reo o terâ e terâ nunaa tei tairuru mai i taua poipoi ra. E no reira, i tapao hia mai ai ta tatou parau no teie poipoi tapati no roto mai i te puta ohipa pene 2 irava 11 mai teie te haere raa no ta tatou parau,

"Te faaroo nei tatou ia ratou i te faaite raa i roto i to tatou iho reo i te mau ohipa faahiahia a te Atua".

E hoa here mâ, i roto i ta tatou parau, te ite nei tatou e ua faaroo terâ mau taata paieti no te mau fenua'toa i haere mai i Ierutarema, no te haapao i te oro'a no te mau oho matamua i te mahana Penetetote, i te parau raa hia i te mau ohipa i tupu i taua mahana ra na roto i to ratou iho reo oia hoi te reo no te fenua no reira mai ratou, no reira to ratou fanau raa hia, te reo ta te hoê pae i ore i ite. Ua ite hoi tatou i te fifi rahi no te haapii raa i te tahi reo ê e tia roa ai ia tatou ia uiui e, mea nahea ia i nehenehe ai te mau apotetoro ia faaite i te mau ohipa faahiahia a te Atua na roto i te reo o terâ e terâ nunaa ?

PENETETOTE, o te hoê ia temeio, o te hoê ohipa api ia tei horo'a mai i te hoê auraa api. I te mau taata atoà e parau nei i terâ e terâ reo, te parau atoa nei te Atua, na roto i te mau apotetoro, i to ratou iho reo. Te faaite nei te Atua, na roto i to ratou iho reo, i te mau ohipa faahiahia'toa ta'na i rave no ratou

na roto i ta'na Tamaiti fanau tahi. Te faaite atoa nei te Atua, na roto i to ratou iho reo, i to'na parau e ta'na mau opua raa no ratou tei tairuru mai i Ierutarema i taua mahana ra. Teie ia te auraa, te mea ta te mau reo atoa no teie nei ao e ore e nehenehe e faaite e e tatara papu, te ohipa ta te ite taata e to'na maramarama e tae noa'tu i te aravihi o te mau aivanaa e te mau firotofo e ore e nehenehe e faaite, i te mahana Penetetote, te faaite nei te Atua. E no te maramarama hoi o ta'na faaite raa na roto i te mau apotetoro, ratou tei i te Varua o te Atua, i putapû ai te aau no na taata atoa e toru tautani (3.000) e ua farii ratou i te papetito raa. Na roto i taua temeio ra no te Penetetote, ua hinaaro te Atua i te vavahi, i te "patu no Babela no te mau reo rau" mai te mea ra ia hi'o tatou, te haafatata faahou nei te Atua ia'na i te mau taata'toa o te ao nei o ta'na iho i haapurara i te taima no te patu no Babela, no te faaite faahou e e Atua oia no te mau huru taata'toa e no ratou paatoa te Evaneria o ta ta'na iho Tamaiti i haere mai e faaite.

I teie mahana, e teie tau ta tatou e ora nei, e i roto roa i teie poipoi tapati, e tiaturi anei tatou i te parau no taua temeio ra ? Ia hi'o hia, aita te temeio e faaea nei i te tupu. Ia hi'o tatou i roto i te Pipiria, te Parau na te Atua ta tatou e taio nei i te mau tapati atoa, ua nehenehe roa ia tatou ia ite i te mau ohipa faahiahia ta te Atua i rave no tatou te nunaa Maohi nei e te reira na roto i te iriti raa hia te Pipiria e na Mitionare Peretane ra o Henry NOTT e o John DAVIES tauturu hia e te Arii Pomare II i te matahiti 1838 na roto i to tatou reo Maohi.

I teie mahana, eaha te mau ohipa faahiahia ta te Atua i faaite ia tatou e to te ao atoa nei ? Tei roto te pahono raa i te a'o raa a Petero tei ore i mata'u faahou i te faaite i to'na faaroo e tae noa'tu i to'na Fatu, o ta tatou e nehenehe e haapoto mai teie te huru,

"O Ietu i Natareta, tei faatatauro hia e te taata, ua faatia faahou hia mai te pohe mai e te Atua e i teie mahana, te mana nei oia i nia i te mau mea ato'a". No te feia atoa tei pupu ia ratou no te Fatu, te haapapû faahou nei te Atua i te ora e vai i roto i ta'na Tamaiti ia Ietu. No te mau tane e te mau vahine, te mau tamarii

tamaroa e te mau tamarii tamahine, o outou paatoa o tei hinaaro i te haapapû i to outou tiaraa i roto i te Etaretia, e mai ia tatou atoa hoi e te mau mero Etaretia, te faahaamanao nei te Atua ia tatou na roto i to tatou iho reo Maohi, i to'na Aroha e ta'na opua raa faaora no tatou i roto i teie ao Maohi.


E no reira, i teie oro'a Penetetote, i nia iho ia tatou nei, i roto i teie moana rahi Patitifa e i roto i te ao atoa nei, a vaiiho ia tatou ia farara hia e ia tau hia e te Varua o te Atua, a nehenehe mau ai ia tatou ia ite e Atua oia no te mau nunaa'toa tei hinaaro ia Ora i roto i to'na Hau.

Ei mana'o faaoti raa, teie te parau i faahiti hia e te apotetoro ra o Pauro i to Roma, (Pene 8 irava 14)

*"O te feia atoa hoi i aratai hia
e te Varua o te Atua ra, e tamarii
ana'e ia ratou na te Atua".*

Ia maitai outou i roto i teie oro'a Penetetote.

TAUIRA Marama
orometua



EKALESIA EVANĒLIA NO POLINESIA FARANI

Veà Orometua EPM

VEA OROMETUA

Episetole papaihia ei faaitoitoraa
e ei taamura a i te mau tavini o te Atua
tonohia e te Ekalesia

327

N° 44
1995

Papeete, i te 21 no Novema 1995.

I te mau tino-orometua o na Tuhaa e 8
o te Etaretia evaneria,


Ia ora na i te here o te Atua i to tatou farereiraa na roto i teie
nei Veà orometua.

Te tae nei tatou i te pae hopeà no teie matahiti 1995 e te
fatata atu nei tatou i te tomo i roto i te matahiti apî 1996.

No reira ia riro ïa teie nei matahiti 1995 e hope nei ei
orometua no te aratai ia tatou na roto i te matahiti apî e fâ mai nei, ia
riro atoà o ïa no tatou ei matahiti oaoa no te taviniraa.

Terâ mai â ïa te hoê mau hohoà poroiraa i faaineinehia mai e
te hoê pae taeae orometua i to tatou ei fautururaa ia tatou i te mau taima
pureraa no te hopeà matahiti e no te matahiti apî :

- Tiairaa I : tapati 3 no titema
(oroà euhari)
- Tiairaa II : tapati 10 no titema
- Tiairaa III : tapati 17 no titema
- Tiairaa IV : tapati 24 no titema
- Noera : monire 25 no titema
(oroà euhari)
- Pô matahiti : tapati 31 no titema
- Matahiti apî : monire 1 no tenuare 1996.



- I te pô tapati 24 no titema, e pureraa Noera ihoa ta tatou, mai tei matarohia.

- No ta tatou pureraa hepetoma no te matahiti 1996, e iriti o ïa i te tapati 7 no tenuare (na roto i te pureraa avatea) e e opani i te tapati 14 no tenuare (na roto i te pureraa avatea).

E faatiahia te oroà euhari i te tapati e iriti ai e e opani ai te pureraa hepetoma no te hoêraa o te Etaretia.


Te tumu parau o te pureraa hepetoma no te matahiti 1996 : "Inaha te tià noa nei au i te ùputa e te patoto atu nei ; ..." (Apotarupo 3, 14-22).

Na tatou ïa teie nei mau faataaraa-ohipa e auraro maite ia ite te paroita e te nunaa taata e tavinihia ra e tatou i te vahi e haerehia ra e tatou.

A faatae atu i te aroha o te Apooraa Faatere i ta tatou mau Apooraa Tiàtono e i ta tatou mau paroita, e tae noa atu i to outou mau hoa e i ta outou mau fetii tamarii.

Ia haamaitai hua mai te Atua Metua, te Tamaiti e te Varua-Moà ia outou e ia tatou i teie oroà Noera e i te Matahiti Apî 1996.

Te peretiteni,



Jacques Ihorai

POROI
NO TE TAPATI TIAIRAA MATAMUA

(Tapati 03 no titema 1995)

Taiòraa : Mataio 24 : 37 - 44

Poroi : Mataio 24 : 44 :

"E teie nei, ia parahi ineine noa outou, ei te hora manaò-ore-hia e outou na e tae mai ai te Tamaiti a te taata".

Tumu parau : Te faufaa no te ineine i roto i te tiairaa i te haereà mai o te Arii.

E hoa here ma,

I roto i teie taioraa tei faataahia na tatou no teie mahana, mea tià roa ia tatou, ia ite i te paari no te tahi mau manaò e horoàhia ra i roto i teie pene parau, o te riro atoà i te faaturori i te manaò o te feia e faaroo i teie parau.

Ia hiò rii mai tatou i te manaò e faahitihia ra i roto i te irava 32 e tae atu i te irava 35, te faaara maira te reira i te tahi mau tapao no te haapapū e te fatata maira te auhune. Te auraa, na teie mau tapao e faaara i te taata no te tahi ohipa e tupu mai. E ua manaò hia e, e na roto i te tahi mau tapao mai teie huru, e noaa atoà ai i te taata ia tohu i te haerea no te piti o te hoiraa mai o to tatou Fatu.

Ia tae mai rà tatou i te irava 36 e tae atu i te irava 41, te faarahia maira i reira e, aore roa e taata e ite i te taima e tae mai ai te Fatu. Aore hoi te mau merahi i ite i te reira taima, aore hoi o Ietu iho, o te Atua anaè rà. E tae mai te reira mahana, mai te tahi matai rorofai tupu taùe i te mahana ua ateatea te raì.

Te faaara nei rà Ietu e, e ore teie ui e mou, e hope teie mau mea atoà i te tupu. Te auraa, eita te ohipa e tupu i taua mahana ra, e hunahia i te mata o te taata. Teie rà, te faanahoraa i te

taime e tupu ai, e tuhaa anaè te reira na te Atua. Eiaha ĩa te taata e faanaho i ta na numera no te taeraa mai o taua mahana ra. Ta na noa tuhaa, o te faaineineraa ĩa ia na no taua mahana ra, ia au i te reo no ta tatou irava : "ia parahi ineine noa outou, ei te hora manaò-ore-hia e outou na e tae mai ai te Tamaiti a te taata". No te mea, e tae rŭ mai o ĩa, e e ati rahi to te feia aore i ineine.

O te ohipa mau te reira tei tupu i te tau no Noa. Te feia aore i faatoro i to ratou tarià i te reo faaara o te Atua, no te mea, ua paremo roa ratou i te oroà tamaà, te inuraa ava, te mau oroà faaipoiporaa etv. ... O ratou mau tei farerei i te tapŭ ati.

E mau parau anaè teie e faaara faahou maira ia tatou i te faufaa rahi no te ineine i roto i te tiairaa i te haereà mai o te Tamaiti a te taata. Te haamanaò atoà maira teie mau parau e, te parau no te ora e no te pohe, tei roto ĩa i te rima o te Atua. No reira, i te taime e tae mai ai te titauraa a te Atua i te poipoi anei, i te avatea anei, i te ahiahi anei, ia vai ineine noa tatou.

Te faaara atoà maira teie mau manaò e, ua riro te haereà mai o te Metia, ei taime no te faataaraa e no te haavàraa, i reira te Fatu e haaputu ai i to na iho ra taata i roto i to na Hau, areà te toeà ra e faautuàhia ĩa.

Te tuhaa rahi e titauhia nei i te taata na roto i teie nei parau, ia vai ineine noa ĩa i te mau taime atoà, e te aroraa hoi i te tahi mau fifi o te tupu tauè noa mai, o te haafifi hoi i taua faaineineraa ra.

1. Te parahiraa i roto i te ineine-ore, e faaoioi mai te reira i te ati. Oia mau, eita te eià e papai mai i te tahi rata no te faaara mai e, te haere maira o ĩa. Ta na mauhaa, o te haere huna noa mai ĩa. E ia ore te maru-metia ia haapao i teie mau faaararaa, te reira mau to na fifi.

2. Ia ara atoà tatou i terā manaò e : "aita e peàpeà, mea roa à te taime". E tiàturiraa hape roa no te hoè tavini tei niu i ta na parau i nià i teie manaò oia hoi, te tauà-ore-raa i te faufaa no te taime hou te hoiraa mai o to na Fatu.

Teie te tahi fapura no te tautururaa ia tatou i te ite papu raa i te auraa no teie manaò.

Te fapura : te vai nei e toru tiaporo tei rave i ta ratou tau haapiiraa e tei hinaaro e haere mai i nià i te fenua nei, no te faaoti roa i ta ratou tau haapaariraa. Ua faaara atura ratou i to ratou orometua haapii (ia Tatani) i ta ratou opuaraa e tamata e e faaino roa i te oraraa o te taata.

- Ua parau atura te tiàporo matamua : "E parau vau ia ratou e, e aita e Atua". Ua pahono atura o Tatani : "Eita tena parau ta oe e tiaturihia mai, no te mea, te tiàturi paatoà ra ratou i te Atua hoê".

- Ua parau atura te piti o te tiaporo : "E parau vau ia ratou e, e aita e pohe". Ua pahono atura o Tatani : "Eita atoà tena parau ta oe e tauàhia mai, no te mea, ua maramarama ratou e, te vai ra te pohe no te feia hara".

- Ua parau atura te toru o te tiaporo : "E parau vau ia ratou e, eiaha e rû, mea roa â te taimè". Ua pahono atura o Tatani ia na : "O oe te haere no tatou, e na oe e aratai mai ia ratou i roto i ta tatou haapaoraa".

Teie te tahi o te mau fifi e farerei pinepine hia nei e tatou i teie mahana, oia hoi, te vaiiho raa i ta tatou mau tapura ohipa i te mau taimè hopeà roa e rave ai. Te reira atoà te manaò e titauhia maira ia tatou ia ara, o te fifi roa atu tatou.

Te tavini o te rave i ta na ohipa i roto i te tiàturi, e horoahia ia na te parahiraa hanahana, areà tei tairipaa i ta na ohipa, e mairihia o ia i te faautuàraa parautià a te Atua.

Te tahi manaò hopeà o te tià ia faahitihia, teie ia, ia hoi mai to tatou Fatu, ia ite o ia e, te haapaò papū ra tatou i te ohipa no te taviniraa.

Ia ora na.

Iotua MAHAA orometua

TIAIRAA II

(Tapati 10 no titema 1995)

Taiòraa : Mataio 3/ 1-12.

E to te hui faaroo, ia ora na tatou i teie tapati piti no ta tatou tiairaa i te haereà mai no Ietu Metia, te Tamaiti Fanau Tahī a te Atua, te Ora o teie nei ao, tei faatenitenihia e te mau Merahi i te na ô raa e : "ia haamaitaihia te Atua i nià i te raì teitei, ei hau to teie nei ao, e ia ìte auhia mai te taata nei".

Ia parahi mai te hau no te Varua o te Atua i roto ia tatou, tatou e hiò àmui nei i ta tatou parau no teie mahana, ia au i te faaiteraa a Mataio 3/ 1-12.

E parau teie no te hoê taata, o Ioane Papetito to na iòà. Ua tãpirihia e ua tãatihia atu teie parau "Papetito" i pihai iho i to na iòà mau ia Ioane, no te mea ia e, e te hoê o ta na ohipa i rave, o te Papetitoraa ia i te feiā atoà o tei farii i ta na pororaa e ta na tiàororaa na te Metepara, e ia tatarahapa no te mea te fatata mai nei hoì te Patireia o te ao ; ia faatitiāifaro e ia haamaitai i te eà o te Fatu. Aita rà te papetitoraa i riro ei ohipa matamua roa na na. Ta na ohipa tumu, mai ta te mau irava matamua no ta tatou taiòraa e faaite ra, o te poro haereraa ia, i te mau taata atoà, ia tatarahapa, e te tiàororaa e, ia haamaitaihia te eà o te Fatu e ia faatitiāifarohia to na haereà.

Ia au i te faaiteraa a te mau Evaneria, ua riro o Ioane ei nāmua i te Metia. Na na e faaineine i te haereà mai no te Tamaiti a te Atua. Faaineine i te nunaa, faaineine i te aau o te taata i te fariiraa i te ora.

Ua riro o ia ei taata itehia i te reira anotau, na roto anei i ta na mau parau, na roto anei i to na huru. E tei te metepara o ia i te pārahiraa, i te vāhi mau e aita e ora to reira, tei reira to na faaiteraa i te ora. Eaha ia huru taata e eaha ia huru faanahoraa.

Haamanaò rā tatou e, o te tere atoà ia o Ietu i te ao nei, no te âfai mai i te ora, no te faaora i teie nei ao mai roto mai i te àti, mai roto i te ìno e te hara.

E, i mua i te reira huru o Ioane, i mua i ta na mau faanahoraa e ta na mau parau, ua horo te taata ia na ra, ua horo i roto i te metepara, to Ierutarema, to Iutea e te mau fenua i te pae Ioritana, no te faaroo ia na. E te mea i itehia, ua faî te taata e rave rahi, i ta ratou mau hara, e ua papetitohia ratou e Ioane i te papetito tatarahapa. E nehenehe ia parauhia, e ohipa âpî teie e e faanahoraa âpî atoà teie e ravehia nei e Ioane, i roto i te oraraa faaroo o te nunaa e i roto i te tiàturiraa o te taata tataitahi, oia hoî te papetitoraa. E eita e òre, ua faatupu te reira i te maere, ua faatupu atoà paha i te au ore e te huru ê, i roto i te mau aratai o te faaroo Ati Uta e te mau faatere o te fenua i te reira tau. O te tumu ia te mau faritea, e te mau tatutea i haere atoà mai ai ia na ra i te metepara. E tere fāfā, e tere hiòhiò e e tere hiòpoà nāmua roa i te mau ohipa e ravehia ra e teie nei taata o Ioane.

Ua ite tatou i te huru no ta Ioane fariiraa ia ratou. Ua faariro e ua faahohoà o ia ia ratou i te mau fanauà ehitana, oia hoi, i te mau fanauà ôfi. Ua ite tatou i te auraa e te parau atoà no te ôfi i roto i te Faufāa Tahito, o te animara ia tei faahema e tei aratō i te taata i roto i te ìno e te hara. Oia hoî, na na i faaatea i te taata i te Atua. O te auraa ia no te mau parau a Ioane i te mau faritea e te mau tatutea. E faaararaa rahi teie ia tatou te feiā atoà e tiāraa aratai to tatou i roto i te nunaa i teie mahana. I roto anei i te oraraa vaamateinaa, i roto anei i te oraraa poritita, i roto anei i te oraraa faaroo, ia ara maitai tatou, ia ore tatou ia riro, na roto i ta tatou mau ohipa e rave nei, na roto hoî i ta tatou mau faanahoraa, ia ore tatou ia riro ei mau mauhaa o tei faaatea i te nunaa i to na Atua, te tumu hoê roa no to na ora. Ia ore tatou ia riro ei mau fanauà ôfi mai ta Ioane e parau nei i nià i teie mau aratai o te faaroo Ati-Iuta. Ia òre tatou ia tiàturi e, e tiāraa aratai to tatou, e tiāraa faatere, e nehenehe ia ia tatou ia rave i te mau ohipa atoà o ta tatou e hinaaro. Aita. Ua titauhia rā tatou, taaê noa atu ai to tatou mau tiāraa, ia aratai i te nunaa i te Atua ra, ia ite te nunaa i te maitai, te oaoa e te hau. E riro ia tatou i reira, ei

mau pipi e ei mau rave ohipa na te Fату e haere mai nei, ia au mai ta Ioane e parau nei : "oia ra o te haere mai i muri iho ia ù nei, e mana rahi to na i to ù, e ore au e au ia hopoi i to na tamaa ; e papetito ia oia ia outou i te Varua Maitai e te auahi".

I roto i te oraraa e te faanahoraa no te reira tau, na te tavini e aore ia na te tītī e tatara i te tiaa o to na Fату. E inaha, na roto i teie mau parau, te faaite mai nei o Ioane Papetito e, eita e tià ia na ia tatara i te tiaa o teie Fату e haere mai nei. Te faaite noa mai nei teie parau e, eere teie Fату mai te mau huru Fату atoà. E Fату rā tei titau i te taata ia tauī, ia tatarahapa e ia riro ei mau tavini mau no na. E Fату mana rahi, o te tāmā i te taata i tona Varua e i te auahi.

O te poroīraa rahi ia o ta Ioane papetito e horoà mai nei ia tatou i teie mahana. Ua ineine anei tatou no te farii i teie Fату e haere mai nei.

E hoa here mā, ia ore tatou ia riro mai te mau faritea e te mau Papai Parau o tei haere mai e tāmātamata e e hiōhiō. No te mea, ua titauhia tatou paatoà ia tatarahapa, ia haamaitai i te eà o te Fату e ia faatitiaifaro i tona haereà mai.

No na anaè te àrueraa, te haamaitairaa e te hanahana.

Ia ora na.

Teiva TAPU orometua

TIAIRAA III

(Tapati 17 no titema 1995)

Taioraa : Mataio 11/2-11

Faaitoitoraa : Mataio 11/6.

"E o te ore e furori ia'u nei, e ao to'na".

Teie ta tātou parau, tei manaòhia ei faaitoitoraa ia tātou i teie mahana tapati, tiairaa toru no te taeraa o te Fātu.

Te tahi uiuiraa tei tupu i roto ia Ioane Papetito i roto i te fare tapeàraa. Te faaroo nei oia i te mau parau no nià ia Ietu e te hinaaro nei ia papu to'na manaò.

Inaha hoi, i roto i te ohipa ta'na i rave mai, no te faaineineraa ia i te vauvau no te taeraa mai te Metia, te faaora o to te Ao, iau atoa ihoa tei tohu hia e te perofeta ra o Itaia oia hoi ta tātou taioraa matamua i te 35/ir.4 v.h. 5 e te 6. "inaha hoi to outou Atua. E faaitohia mai â te riri ; te tahoo a te Atua ra ; oia iho te haere hua mai e faaora ia outou. Ei reira e faaaraarahia'i te mata o te matapo ra, e amaha hoi te taria o te taria turi ra : ei reira te pirioi e ou'aou'a noa'i mai te aili, e himene mai hoi te vaha o te taata vava ra : e pûpû mai hoi te pape na te metepara.

I tono ai o Ioane Papetito i ta'na na pipi no te farerei roa'tu ia Ietu. E teie ta rātou uiraa ia Ietu : O oe anei te tae mai, e tiai atu anei tātou i te tahi e ? Mataio 11/3.

E te pahono nei te Fātu i teie na pipi i te na ò raa e : "A haere, e faaito atu ia Ioane i ta orua e faaroo nei e ta orua e hio nei". Inaha hoi te mau ohipa atoà ta raua e faaroo ra, te mau ohipa atoà ta raua e ite ra o tei tohu hia ia e Itaia i to'na ra tau. Te ite ra ia tātou no te aha teie manaònaò raa i roto ia Ioane.

Te hinaaro nei o Ioane e ite i te parau mau, te hinaaro nei o Ioane ia pāpū to'na manaò. Teie taata ta na i faaineine te eà, teie taata ta na e tia i nei ua tae mai anei. I roto i te taimē tiairaa tera te mau manaò e ô mai. E o tātou i teie mahana, tei hea ta tātou tiairaa i te haamauraa. Aita anei te Fatu e na mua noa i to tātou mata e aita tātou e ite nei. Aita anei tātou e hamani i te tahi hohoà i te tahi huru no Ietu iau i ta tātou e hinaaro. Te hea te utuàfare no te Atua e ta na tiairaa. E aore tei roto mau anei tātou i te tiairaa. Te parau ra hoi ta tātou irava turu e, "E o te ore e turori iaù nei e ao to'na oia hoi e ao to tei haapaò e tei tapeà i taù parau". I roto i ta tātou tiairaa ia vai te parau no te parautià, te haehaa, te aroha e te vai atu ra. Ia ore tātou ia fiu i te tia i tae mai oia i te mahana manaò ore hia. Ia riro tātou mai teie mau pipi a Ioane ta Ietu i parau atu e : "A haere, a faaite atu ia Ioane i ta orua e faaroo nei e ta orua e hiò nei" oia hoi ia riro tātou ei ite no te Fatu.

E taua tiairaa ra, ia ravehia ia i roto i te faaoromai. Iau i ta Iatopo e parau ra i roto i ta'na epitetore 5/7 v. m. "E teie nei, e faaoromai, e au mau faeae, e ia tae mai te Fatu ra". E i roto i te irava 8 te na ô ra "E faaoromai atoà hoi outou, e faaitoito na i to outou auu, ua fatata roa taua haerea mai o te Fatu ra".

No reira to te paroita nei, Ioane i to'na ra tau e ta'na tiairaa. Tātou i teie mahana e ta tātou tiairaa. Eaha te taaêraa ? Tei hea to tātou faaroo te haamau raa hia.

Ia ora na.

Davidson BENNETT
orometua

TIAIRAA IV (Tapati 24 no titema 1995)

Taioraa : Mataio 1/ 18-25

Irava faaitoitoraa : Mataio 1/ 20 (v. h.)

"E lotefa a Tavita ra, eiaha e mafaù i to vahine ra ia Maria ia aratai mai i te ùtuafare, no te Varua Maitai hoi i hapu ai o ia".

E te mau taeae e te mau tuahine,

Ia ora na i te Aroha o te Atua i to tātou farereiraa i teie Tapati.

Ia haamaitai hia te Atua tei aratai mai ia tātou i te mau mahana atoà o to tātou oraraa.

Ia haamaitai atoà hia te Atua no teie horoà ta na i to te ao e na roto i ta na Tamaiti e ite faahou ai tātou i ta na ôpuaraa faaora.

No te Atua atoà tātou i farerei ai i teie mahana na roto i ta na parau teie horoà hia mai e te hoê o to na mau ite ia Mataio.

Te parau ia o ta tātou e hiò âmui i roto i teie tau ta tātou e parau nei e tau no te Tiairaa, te na ô ra te parau :

"E lotefa a Tavita ra, eiaha e mafaù i to vahine ra ia Maria ia aratai mai i te ùtuafare, no te Varua Maitai hoi i hapu ai o ia"

Ia ite maitai mai tātou, te ôpuaraa faaora a te Atua ua faaite ae na mai o ia ia tātou. Ia au i ta te puta Tenete i haapii mai ia tātou e na roto i te mau ohipa atoà ta te Mana o te Parau a te Atua i faatupu. Ua faaite mai te Atua e mea maitai anae. Ua

riro te Rahu a te Atua ei tāpaò faaïte i te Here e te Aroha o te Atua i te taata. Te fifi, aita o Atamu raua o Eva i farii i teie horoà a te Atua. Te vahi i reira te Atua i te tuuraa i te Maitai, aita te taata i hinaaro. Te tumu atoà ai te Atua i tiahi mai ai te taata i rapae i te ô.

Na roto i te parau o ta tātou e hiò nei, te ite nei tātou i to te Atua faaâpi faahouraa i ta na ôpuaraa faaora i te taata na roto i te haereraa mai o ta na Tamaiti. No teie ôpuaraa ta na, e hinaaro te Atua i te taata no te tauturu i teie ôpuaraa ta na. Ia au i ta te mau papai evaneria i faaïte mai ia tātou, ua maiti te Atua i te tahi ùtuafare âpi roa no te farii i teie ôpuaraa ta na. Iotefa raua Maria tei oti i te momoà hia, o raua tei maiti hia e tauturu i te Atua i roto i ta na ôpuaraa.

Te na ô ra ta tātou irava : "E Iotefa a Tavita ra, eiaha e mataù i to vahine ra ia Maria ia aratai mai i te ùtuafare, no te Varua Maitai hoi o ia i hapu ai"

Mai ta tātou i parau na, ua hinaaro te Atua i te taata no teie ôpuaraa ta na. Na roto i teie parau a te veà a te Atua, te imi ra o ia i te raveà no te tatara i te fifi o Iotefa. No te mea ua hapū o Maria, ua pāpū maitai ia Iotefa eere ona te Papa no te tamarii e amo hia ra e Maria. Eita e òre, ua ô mai te manaò huru è i roto ia Iotefa. E ia òre anae e imi hia te raveà no te tatara i te fifi o Iotefa, eita e ore e àmaha teie ùtuafare. No teie ôpuaraa a te Atua, aita te Atua e hinaaro e ia peàpeà teie ùtuafare. Teie parau a te veà a te Atua ia Iotefa no te faahau ia na e ia ìte o ia e hinaaro no te Atua i amo ai o Maria i ta na Tamaiti. Te ite ra tātou i to te Atua tauàraa mai i te taata i roto i tona fifi. Aita o ia i haapaò noa i te tupuraa o ta na ôpuaraa. Teie raveà ta te Atua e faaohipa nei na roto i ta na veà, ua hinaaro te Atua e ia tuàti maitai mai te taata i roto i teie ôpuaraa ta na. Te auraa, mai te peu e te vai ra te tahi fifi to te taata, ia imi hia te raveà. Eiaha ra teie ôpuaraa ia tupu i roto i te tuàti ore o te ùtuafare i maiti hia. Te parau faufaa ta tatou e ite nei, e mea tauà pai te Atua i te taata. I roto i to te Atua hinaaro i te taata no te tauturu i ta na ôpuaraa, e imi atoà te Atua i te raveà e ia mauruuru atoà te

taata. Te auraa e fanaò te taata tei tauturu i te ôpuaraa a te Atua. Eita e òre, ua ìte o Iotefa i te reira, hoê atoà o Maria i farii ai raua e amo i te Tamaiti a te Atua, te Faaora.

Na roto ia Iotefa e o Maria, ia ìte atoà tātou e e te hinaaro atoà mai ra te Atua ia tātou. Ia ìte maitai tātou e tātou te mau tane e te mau vahine e mea hinaaro hia tātou e te Atua. Te vai ra ta te Atua ôpuaraa no tātou, te mau tane e te mau vahine. Ua rave o Iotefa raua Maria i ta raua tuhaa, ta tātou atura tuhaa ta te Atua e tiaì ra. Ia tauturu mai te Atua ia tātou i te ìteraa e te raveraa i ta tātou tuhaa.

**Ia maitai e ia oaoa i roto i te taviniraa.
Ia ora na.**

Tehaapapa TEURURAI
orometua

NOERA

(Monire 25 no titema 1995)

TAIORAA : Ruta 2, 1 - 14

AORAA : Ruta 2, 12

"Teie hoì te tapao e ite ai òutou ia na : e ite òutou i taua tamaiti ra i te vai-noa-raa i roto i ta te puaa vairaà maà, ua vehîhia i te àhu".

Noera, e parau apî oaoa ia...

Ua fatata e 2 000 matahiti i teie nei te tupuraa teie nei oroà Noera o ta tātou e haamano nei i teie mahana. Ua faarahia te auraa no taua oroà fanauraa ra no te taima matamua roa i te hoê mau tiai mamoe no te oire iti no Peterehema i te tuhaa fenua no Iutea. Teie te reo faaara no te veà-tono (merahi) a te Atua ia ratou i taua pô ra te tiai ra ratou i ta ratou mau nana : "Eiaha e mataù, e parau oaoa hoi ta ù e hopoi mai nei ia outou nei, o te riro ei oaoaraa no te taata atoà. I teie mahana i fanau ai te hoê faaora no outou i te oire o Tavita oia hoi te Metia ra o te Fatu ..." Te ite nei ia tatou na roto i teie nei reo faaararaa na te merahi a te Atua i te tumu i fanauhia mai ai teie nei aiù i roto i teie nei ao o ta tatou e ora nei, i fanauhia mai o ia no tatou, e te ite atoà ra tatou na roto i te poroïraa a te veà-tono a te Atua i taua mau tiai mamoe ra i te ohipa o ta taua tamaiti ra e rave no tatou, ia paari o ia, ia au i te tonoraa a to nā Metua ia na i te ao nei : ei faaora ia tatou i te hara e i te pohe, no te haamau i te hoê ao apî aita o reira e feïraa e e mata-ê-raa faahou, no te aratai i te taata ma te parau-tià. Noera, o to na ia auraa oia hoi no tatou ua fanau mai te hoê tama, o te tià ia tatou ia tiàturi no te mea e faaora o ia e e aratai hoi ia tatou i roto i te hoê faaaraa apî o ta to na Metua i faaineine no tatou. Ei tautururaa i taua mau tiai mamoe ra i te iteraa i taua aiù ra i roto i ta ratou maïmiraa ia na i Peterehema, te horoà nei te Atua ia ratou i te hoê tapao : "... E ite outou i taua tamaiti ra i te vai-noa-raa

i roto i ta te puaa vairaā maa, ua vehîhia i te ahū". E parau mau ia e, ia au i te faaiteraa a te mau auvaha-parau (perofeta) no te faufaa matamua, ua faahitihia te parau no te fanauraa o te hoê tama, area râ taua fanauraa ra e fanauraa ia no te hoê aiû hui-arii e e huru-atua. I ô nei, te Fatu hanahana, te Faaora o teie nei ao, te Metia o te tae mai, te itea nei ia i roto i te haèhaa o te hoê aiû e taoto noa ra i roto i te vairaā maa a te animara ! Te haèhaa e aore ia te pouraa i raro i roto anei i to tatou mau tuâtiraa e vetahi ê e aore ia i roto i te taviniraa, e ere ia i te hoê ohipa rave ohie no tatou ! E tià ai ia tatou ia ani i te Atua ia horoà mai i te hoê huru e i te hoê tiàturiraa no tatou mai to teie nei mau tiai mamoe tei ite i roto i te paruparu o te aiû no Noera i te raveà hinaarohia e te Atua no te farereiraa e no te faatuâti-faahou-raa i te taata e no te faaiteraa ia na i to na here. O Noera, ia haapae ia tatou i te mau mea atoà i faarahihia e i haafaufaahia e tatou e o tei faaatea e o tei haafifi i to tatou mau taamuamuraa e vetahi ê ! Noera, te mau mea atoà i ore na i tià ia tatou ia faatitiaifaro i mua ra, e tià ia ia tatou i teie nei !

... no te faatoāraa ...

Tei roto i te hoê tau te manaōnaò ra o Taitara Aututo e o Turenio i te parau no te mana faatere e no te hanahana o to raua tiàraa, to te Atua atoa pouraa mai i te ao nei na roto i ta na tamaiti otahi ia Ietu no te haamanaò ia raua e i te mau aratai poritita atoa i te tumu o to ratou tiàraa e no te mana i pûpûhia mai i roto i to ratou rima : no te maitai, no te oaoa e no te ora o te nunaa e faaterehia ra e ratou. Noera, ia haamanao atoà ia te mau Hau atoa o te ao nei e, te puai i titauhia ia ratou ia faarahi e ia faaohipa, e ere ia o tei haavî i te taata, o tei hamani-ino e o tei taparahi i te taata, o tei here râ i te taata, o tei tauturu i te oraraa o te taata ... Terâ aiû i vai noa i roto i te vairaā maa a te puaa, e tapao faaara ia i te mau fenua atoa o te ao nei e, te mau opuaraa atoà e titauhia ra e ratou i te faatupu i te ao nei no te hoê oraraa hau ma te ore e haapae i te mau mauhaa tamai e i te mau mea atoà o te faatupu i te mataù e i te pohe ... eita ia e tupu ! O te hinaaro ia o te mau fenua atoà o te ao nei, mai ia tatou, oia hoi ia tupu te hau e ia vai noa mai o ia i nià i teie nei paraneta i

horoahia mai e te Atua ei paèpaè e ei utuàfare no tatou. O to te Atua atoa râ te reira hinaaro, hou aè to tatou, mai te matamua mai â. Ahiri e, e raveà te mauhaa tamaì no te tupuraa o te hau i te ao nei, eita ia te Atua, e parau papû, e haere mai i nià i te fenua nei, mai te hoê aiû ra te huru, "eita ia te Atua e haapaeraa i to na huru mau no te rave mai i te huru o te favini", e haere taata paari mai ia o ia i te ao nei. Eita ia o ia e itea i roto i te vairaa maa a te animara, i roto râ i te hoê aorai nehenehe maitai, eita ia o ia e na roto mai i te hoê utuafare haèhaa mai to Maria raua o Iotefa i te haere mai i te ao nei, e na roto mai râ o ia i te hoê utuafare mai to Taitara e to Turenio i te haere mai i ô tatou nei ... Ahiri e, i te omuaraa o ta tatou tumu parau no teie nei mahana no Noera, ua faahitihia te parau no te tahi tau taata tiàraa mana poritita i roto i te oraraa o te nunaa, no te haamanaò ia e, te parau no Noera, no te mau taata atoà ia, no te feia râ na mua roa i haapaehia, i parahi moèmoè noa, i roohia i te ati, i hamani-ino-hia ... Te vai ra ratou i pihai iho ia tatou e i te atea ia tatou mai ta tatou e ite noa ra na roto i te mau raveà faaïteraa e e haapurororaa parau apî i te mau mahana atoà. Ua ere ratou i te maa, ua ere i te ahu, ua ere i te turu i te pae no te nohooa, te pohe ra i te toètoè ... No reira i muri mai i terâ parau no te aiû no Noera i vai noa i roto i te vairaa maa a te puua i Peterehema, te turai-roa-hia nei to tatou mata e to tatou aau i te vahi fifi no te oraraa o te taata, tei reira to te aiû no Noera tiairaa mai ia tatou ia haere atu e farerei ia na, no te haamâmâ i te ati o te taata. Noera, ua faahaèhaa mai te Atua ia na no te farerei ia tatou. Noera, o to tatou ia apitiraa i te ohipa i te parau e aore ia i te parau i te ohipa, i te mea e, i na-muri-hia te parau faaara a te Atua i te ohipa i faatupuhia e ana no tatou. Ei haamanaoraa ia tatou e, tei roto i te ohipa o ta tatou e rave no tei parahi i roto i te pouri no te ati e no te pohe, to te Atua iteraa mai ia tatou, ei mau vahine e ei mau tane, tei maramarama e tei farii i roto i to ratou aau e i to ratou oraraa i te parau no Noera.

... i te mau mahana atoa...

Noera, e ere hoê noa mahana, e ere hoê noa taime i te matahiti, o te mau taime atoa râ e ite ai tatou i te hoê taata i roto i te hepohepo e i te ati no te oraraa. No reira, te haamanaò ra

tatou i te pahonora a Ietu i ta na mau pipi no te parau o te haavaraa hopeà ia hoi mai o ia : "A haere mai outou, e te feia i faaorahia e taù Metua, e parahi i roto i te ao apî i faaineinehia no outou mai te hamaniraa mai o te fenua nei ra : i poia na hoi au, e ua horoà mai outou i te maa naù ; i poihi na vau e ua faainu mai outou iaù ; e taata ê au, e ua ite mai outou iaù ; i veve na vau, e ua faaahu mai outou iaù ; i pohe na vau i te maì, e ua utuutu mai outou iaù ; i roto vau i te tapeàraa, e ua haere mai outou iaù ra. Ei reira te feia parautià ra e na ô aè ai te parau ia na, E te Fatu, i nahea matou i ite ai ia oe i te poiaraa, e ua faaamu ia oe e te poihiàraa, e ua faainu atu ia oe. I nahea matou i ite atu ai ia oe, e e taata ê, e ua ite atu ia oe, e te veveraa, e ua faaahu ia oe. I nahea matou i ite atu ai ia oe i te poheraa i te maì, e i roto i te tapeàraa, e ua haere atu ia oe ra. I reira ia te arii e parau aè ai ia ratou, Oia mau taù e parau atu ia outou nei, O outou i na reira i te hoê taeàè iti haìhaì roa i roto i taù mau taeàè nei, ua na reira mai ia outou iaù ..." (Mataio 25, 34-40).

... o te poihiàraa ia ia tatou.

Ei haamanaoraa teie nei parau ia tatou e, te mea o te faatià ia tatou, e ere ia te manao i tupu mai i roto i to tatou aau e aore ia te parau i faahitihia e tatou, o te ohipa râ i ravehia e tatou no te feia i parahi noa i roto i te ati ... I muri aè i to te mau tiai mamoe iteraa na roto i te veà-tono a te Atua i taua pô ra no te Noera matamua roa i te ao nei i te parau no to te Atua pouraa mai i te ao na roto i te hoê aiù, ua haere roa ratou, ia au i te faaararaa, e hiò i taua tama fanau apî ra ... Aita tatou i ite i te ohipa i tupu i roto i to ratou oraraa, i muri aè i to ratou iteraa i taua tamaiti ra i te vai-noa-raa i roto i ta te puua ra vairaa maa, a tiàturi râ tatou e, ua riro ratou ei feia o tei faaohipa i te poroiraa i noaa ia ratou mai roto mai i taua oroà ra no Noera i roto i to ratou oraraa. Eaha te ohipa o ta tatou e rave i muri aè i to tatou haamanaoraa i teie oroà no Noera, aita vau i ite. Aita râ e auraa to Noera mai te peu e, i muri aè i to tatou himeneraa, i to tatou taioraa i te parau a te Atua, i to tatou parauraa e e pureraa ia

Noera, aita hoê ohipa e tau i roto i to tatou aau e i to tatou oraraa ia hau e ia oaoa tatou e te Atua e te feia i matarohia e tatou ... Ei hau e ia oaoa tatou i teie oroà Noera 1995 !

Jacques Ihorai

Òrometua

PURERAA PO MATAHITI

(31 no titema 1995)

Mataio 2/ 12-15 ; 19-23

E hoa here mā, i te hiti no te matahiti e hope nei e no te matahiti âpī e tae mai nei, ia haamaitāhia te Atua, to tātou metua i te ao ra.

Ia ora na oûtou atoà na i âmui mai i teie pō i to na ra aroha rahi.

Oia mau, mai te mea tei te ôtià tātou, te faaite mai ra ia e, te hope atu ra te tau tahito e te haamata ra te tau âpī. ua riro atoà rā te reira ei taime au no te hiò-faahouraa i te mau òhipa i orahia mai e tātou no te faaineineraa ia tātou i te tomoraa i roto i teie tau âpī. Aita atu ta tātou e tiàturiraa, ia riro teie matahiti âpī, ei matahiti tei hau aè te maitai i tei mahemo.

Te reira te tiàturiraa, no te titauraa i te mea maitai aè, éere ia no te taata tātai tahi noa e aore ia no te hoê noa fētii, no te hoê ùtuafare, no te fenua taatoà rā, no te nūnaa taatoà no teie nei ao taatoà.

Ua ite mai na tātou i te huru no te mau fifi i orahia mai e tātou i teie matahiti, te faaòtiraa a te Peretiteni o te Hau Repupirita e faariro faahou i to tātou fenua ei vāhi faaineineraa no te mau mauhaa-tamai tei òre i hinaarohia e to te ao taatoà, tei pātoihia e te mau Etārētia tei titau i te oraraa hau no te mau taata atoà. Ua tae roa te reira faaòtiraa i te faatupuraa i te inoïno i roto i te nūnaa taatoà. Ua faatupu i te aehuehu i roto i te fenua, ua tapeàhia te tahi pae i roto i te fare tapeàraa, no te mea, na te riri-hae i aratai i ta rātou mau pātoïraa.

Ua hinaarohia ia tito te nūnaa ia na iho, ia parari o ia. E ua tae roa atoà te reira huru turoriraa i roto i te Etārētia no to na hinaaroraa e faaite i to na manaò e i ta na tiàturiraa, arataihia e te parau a te Atua, e tei haapāpū e to na Fatu, e Fatu ia tei hinaaro i te ora no te mau taata atoà.

I roto i teie nei ao, aita te mau fifi i haere i te ìtiraa, ua tae roa iā i te tahi fāito, e òre ai e tano faahou ia tātou ia tāmāu noa i niā i teie huru o to tātou. E mea maramarama, e na roto i teie mau fifi, te vai atoà ra te piiraa a te Atua ia tātou e i te ûputa no teie matahiti âpī, ua titau atoà-hia tātou no te tau i te àveià e no te tamata e faaroo faahou, e aha rā te reo o te Atua ia tātou i teie pō.

I mua i teie mau hiòraa matamua, aita atu e tiàturiraa i roto i te taata, ia manuia te mau mea atoà. Te oraraa, te mau ôpuaraa, te haapiiraa...etv. No te mea rā e, e tiàturiraa noa te reira, aita i pāpū e e tupu ānei mai tei manaòhia, te tuu nei tātou i te tahi mau rāveà no te tauturu i to tātou tiàturiraa.

Te faaòhipa nei te tahi pae i ta rātou faufaa, tei roto ia te tiàturiraa e, na te faufaa e tatara i te mau fifi, na te faufaa atoà e faatupu i te manuia. Te faaitoito atu ra te tahi i roto i te aravehi i noaa ia na mā te tiàturi e, tei roto anaè ia na te manuia no to na oraraa e no ta na mau ôpuaraa. Te horo atu ra te tahi e fārerei i te mau hiòhiò no te titauraa i te ìteraa i te mau òhipa e tupu mai. Areà te taata faaroo, ua titauhia o ia, ia tuu i to na tiàturiraa taatoà i roto i te Atua. Teie rā te ite atoà nei tātou i te taata faaroo i te faaòhiparaa i te tahi atu mau raveà, no te mea te iti ra to na tiàturi i to na Atua.

I roto i ta tātou taiòraa no teie pō, te ite atoà nei tātou i te hoè ùtuafare, te ùtuafare o Iotefa i te ûputa atoà no te hoè tau âpī. Na roto i te tama o ta rāua e farii nei i roto i to rāua ùtuafare te ìriti nei te Atua i te hoè tau âpī no te nūnaa Ìteraera, o tei riro atoà rà ei tau âpī no teie nei ao taatoà.

Teie rā, i mua i te mau fifi rau e fārereihia ra e te nūnaa no te huru faatereraa a te arii ra o Herota, te horoà nei te Atua ia Iotefa i te mau faaararaa e òre ai teie tama e fifi, i roto i to na tupuraa.

Te parau o te tià ia tātou ia hiò i teie pō, o te huru o Iotefa e to na tuātiraa i to na Atua. I roto i te reira huru e ite atoà ai tātou i te mea e tià ia tātou ia rave hou te tau âpī.

Na mua roa, te ite nei tātou i te parau o teie taata, na roto i te mau faatiàraa a na Pāpai Evaneria (Mataio-Ruta). Eere to na i te parau faahiahia roa, aita atoà hoì tātou e faaroo ra ia na i te faahitiraa i te tahi parau. Ta tātou noa i ite, to na ia faarooraa i te mau parau o ta te Atua i hinaaro ia faaroo o ia.

Eere i te mau parau ôhie no te hoê tane faaipoipo âpī. I mua i te mau fifi, ua tià atoà ia na ia imi i te mau rāveà e ora ai to na ùtuafare. E au ra e aita atu ta na e manaònaò-raa ia ora te ùtuafare. Ia ora te feiā ta te Atua i horoà e na na e pāruru.

Eita tātou e hape ia parau e, e taata teie tei fārii i ta te Atua i horoà ei òhipa na na. E taata atoà tei tuu hope roa i to na tiàturiraa i roto i to na Atua ma te vai iho e na te Atua e aratai e e faaòti i to na parau.

Noa atu te mau fifi i fārereihia mai e ana, e to na atoà hoì ùtuafare, aita o ia i òtohe. Aita to na faaroo i tarapape, aita i turori.

Ua pāpū ānei ia na i te ôpuaraa a te Atua no teie tamaiti, e tano ia pahono e, aita, tei pāpū rā ia na, te hinaaro ia o te Atua ia na i teie taima e te òhipa e tià ia na ia rave i teie nei. Ua pāpū atoà ia na e, mai te haamataraa mai, aita te Atua i faarue ia na. E eita te Atua e faarue ia na.

Eere ānei te na reira ra te reo hopeà o Ietu i ta na mau pipi "i pihai atoà iho vau ia òutou e tae noa atu i te hopeà o teie nei ao"

No reira hou tātou a tomo ai i roto i teie tau âpī, e mea titauhia ia tātou ia faaâpī i to tātou tūātiraa i to tātou Atua, ia ite atoà tātou e, e aha rā te òhipa e tià ia tātou i te rave i teie nei ā.

Ia ora na i te matahiti âpī

Taaraii **MARAEA** Orometua

FAAITOITORAA NO TE MATAHITI API 1996

Taioraa : Taramo 121, Numera 6. 22-27

Irava : Numera 6. 24-26.

" Ia haamaitai mai lehova ia oe, e ia tiaí mai ia oe : ia faaanaana mai lehova i te *maramarama* o to na mata i nia ia oe, e ia aroha mai ia oe ; ia nânâ mai lehova i ta na mata i nia ia oe, e ia horoà mai i te hau ia oe."

E hoa here ma ia ora na tatou i teie matahiti api. Ia vai mai â te here o te Atua i nia ia tatou paatoà i te omuaraa o teie matahiti api e ia tiaí mai â te Atua ia tatou na roto i teie matahiti api.

Te parau tei maitihia mai no tatou i te omuaraa no teie matahiti e parau ia tei tupu i te tau no Mote e o Aarona. Te na o ra paha ia tatou eaha hoì i rave hia mai ai te parau o te mau patereareha no teie poipoi api no teie matahiti api. E tano anei hoì to ratou parau no teie tau. Aita atoà o vau iho i papu e eaha te pahono raa tano no teie mau uiui raa ta tatou na te parau ia ta tatou e hio nei e haapapu mai i te reira.

I roto i teie parau ta tatou e hio nei te papu ra ia tatou e e parau teie tei faauehia ia Mote e parau atu ia Aarona. Te tumu no teie ohipa no te haapapu ia i te mana o tei horoà hia i roto ia Aarona e tae noa atu i ta na mau tamarii no te "*faaora i te tamarii Iteraera*". No nia ihoa ra i to ratou tiàraa tahuà, e na ratou e atuatu i te faaroo e te tiàturiraa o te nunaa.

Ua faaue te Atua ia Mote e faaite i ta na haamaitairaa i nia i te nunaa Iteraera, ia tià i te nunaa ia tamau a i te titau i roto i te Atua i te puai e te tauturu no to ratou oraraa i te mau mahana atoà. E ua tae roa taua haamaitai raa na te Atua ra i roto roa i te faufaa api na roto i te haereraa mai o Ietu i roto i teie nei ao.

"Ia haamaitai mai lehova ia oe e ia tia mai ia oe". Te haapapuhia ra na roto i teie parau i te hinaaro o te Atua i te manii i nia i te nunaa i to na here. Ma te papu atoà e na roto i teie parau e ere ia te here o te Atua no te tahi noa taime, e tià ra i te vairaa i te mau tau na roto i to te Atua titauraa ia tatou ia tapiri atu i pihaiho ia na. Te faaite mai nei te **Taratia 4.5** ia tatou i to te Atua ohipa raa no **"te faaora i to raro àe i te ture ra, ia noaa ia tatou te maitai ra e tamarii tavai"**. Mai te mau metua tei hinaaro e tamau noa i te taura no te here e no te tuatiraa i rotopu ia ratou e ta ratou mau tamarii, noa atu ia ua faarue mai te tamarii i te utuafare no te ora i to ratou iho oraraa. Na reira atoà te Atua i te taamuraaa ia tatou i roto i to na here ma te haamaitai ia tatou ia vai noa tatou i pihaiho ia na.

"Ia faaanaana mai lehova i te maramarama o to na mata i nia ia oe".

Aita e maramarama hau atu to te hohoà o te tahi taata maoti ia vai mata ataata mai oia. E te reira te hinaaro tumu o te mau tamarii ia mata ataata noa to to ratou mau metua, ia itehia na reira i te here o to ratou metua ia ratou. Na reira atoà te huru no te Atua i nia i to na nunaa. To na hinaaro tumu oia hoi o te aroha raa ia ia tatou. Terara mea titauphia tatou ia riro atoà mai te mau tamarii ra. I te faaroo maitai raa i ta na mau parau e i te farii raa i te reira ma te hapa ore, e tae roa atu i te faatupuraa i to na mau hinaaro. I roto i te **Taratia 4.6**, te haapii hia ra i reira e no te mea e mau tamarii tatou na te Atua e tia roa ia tatou ia pii ia **O"Apa, e tau Metua"**.

"Ia nânâ mai lehova i ta na mata i nia ia oe, e ia horoà mai i te hau ia oe".

Aita e hau i papu roa atu maoti te hau tei horoà hia e te Atua. Te vai nei te mau patireia rarahi e imi noa nei i te raveà ia tupu te hau. Te imi atoà nei te mau nunaa i te hau, e ia ore atu te maniania o te tamà e te mau aroraa. E inaha te uana roa atura te mau aroraa i roto i te ao. Te vai atoà nei te mau nunaa tei imi i

te hau na roto i te paruru raa ia ratou i muri mai i to ratou puai, te puai no to ratou nuu faehau. Ua patu roa vetahi i te tahi mau mauihaa tamàì riaria roa no te haamou i te tahi mau patireia, mai te tupita atomi. E inaha aita ihoa i tupu te hau.

Ua haere mai na te Arii no te Hau, ua riro to na fanauraahia i roto i teie ao ei haapapuraa i tei tiaturi ia na e te vai nei te hau, e e ora ratou i roto i taua hau ra. E tupu te hau no te feia faaroo tei tiaturi e ta na tiatururaa no ananahi ua haapapuhia ia e te Fatu. E ohie roa atu te oraraa o te feia tei tiaturi i te Atua, i te mau mahana atoà, no te mea ua patu te Atua i to na hau i nia i ta na tamaiti. E taua hau ra o tei tauturu ia e o tei amo ia i te feia faaroo i te mau mahana atoà i mua i te mau fifi o teie nei ao. Mai te hoê metua vahine tei nânâ i to na mata i nia i ta na tamarii, oia atoà te Atua i te imiraa i to na taata no te horoà raa ia ratou i to na hau.

Mai ia tatou paatoà e imi nei ia tupu te hau, e tia ia itoito to tatou aau i te tiaturi raa i roto i te Atua o te hau, oia tei here ia tatou e tei mata ara noa i nia i to na nunaa i te mau taimè atoà. I te omua raa no teie matahiti api, teie te mau parau ta tatou e tapeà mai oia hoi e Atua here to tatou e tei haamaitai ia tatou e tei faatupu i te hau no tatou. Aita atu e parau ta tatou e haamanào i te omuaraa no teie matahiti e no te roa raa no teie matahiti ta tatou e haere atu nei. Ua vai mai ta te Atua haamaitairaa i nia ia tatou, o vai ia te tia i te aro mai ia tatou e te haafifi mai ia tatou i roto i to tatou oraraa.

E haamanào atoà ra tatou e ua titauhia tatou ia ora i taua haamaitairaa, taua here e taua hau o te Atua ra eiaha no tatou anàe. No te mau taata atoà ra e auahaati nei ia tatou. E haamanào tatou e ua pupu hia teie mana i roto ia Aarona e ta na mau tamarii, eiaha ia no ratou anàe, no te nunaa atoà ra. No te mea te tiaturi nei au e ia haamata tatou i te pipiri i teie mau horoà ta te Atua eita tatou e fanào faahou i ta na mau haamaitai raa ia tatou.

I te omuaraa no teie matahiti, teie te mau parau e tià ia tatou e tapeà mai e na te Atua e tauturu mai ia tatou i te oraraa i teie matahiti api ta na i faataa no tatou. Ia tauturu mai te Atua ia tatou.

Ia ora na.

Ralph TEINAORE
orometua